

چمچے

انشائی (پہاڑی)



زلفر کھوکر

اریب پبلیکیشنز، ساج، تھنہ منڈی۔ راجوری

(c) سبھے حق لکھاری نے

کتاٲ ناٲاں: ٲچے

نوٲیت: انشائے

لکھاری: زفر بیگم

قلمی ناٲاں: زفر کھوکھر

سن اشاعت: ۲۰۲۰ء

ترتیب و انتخاب: عبدالواحد منہاس

کمپوزنگ و ترتین: عبدالواحد منہاس / گر میت سنگھ

سرورق: جمیل انصاری

گلتی: ٲانچ سو (۵۰۰)

مئل: ۴۵۰ روٲے

چھاپہ خانہ: کلاسک ٲرنٹرس

CHAMCHAY

Inshaye (Pahari)

By: Zaffer Khokhar

Year of Edition: 2020

Price: Rs. 450/=

R/o Saaj (Bawli), Thannamandi-Rajouri

Contact No: 9858009983

ناں لائی:

میں ایہہ کتاب اپنی پہلی اُستاد اپنی بڑی بہن جان بیگم نے ناناں
منسوب کرنی آں، جہاں آپوں پنجویں جماعت تک نیاں کتاباں
کہر بچ رہی تہ پڑھیاں، کیاں کہ اُس دور بچ اسا ہڑے علاقے
بچ گڑیاں کی سکول پڑھانے نارواج نیہہ سی ہونا۔ فر بعد بچ مگلی
کسے بڑے بندے نے آکھے بغیر ہی بڑے شوق نال پڑھنا لکھنا
سکھایا تہ فر سکول دی ٹوریا

نیب

- 6 اللہ کرے زورِ قلم اور زیادہ! راجہ نذر بونیاری
- 11 پیش گنتار _____ شاعر حسین راہی
- 16 اپنی گل _____ زعفر کھوکھر

انشائیے:

- 20 ۱۔ گال
- 25 ۲۔ غصہ
- 32 ۳۔ تعریف
- 38 ۴۔ سس
- 45 ۵۔ نک
- 49 ۶۔ ٹیڑھا پن
- 53 ۷۔ جوتا

| | |
|-----|----------------------------|
| 57 | ۸۔ گال |
| 63 | ۹۔ اپوزیشن پارٹی |
| 67 | ۱۰۔ ووٹین امپاورمنٹ |
| 73 | ۱۱۔ ووٹین سیل |
| 81 | ۱۲۔ زنانی تہ اپوزیشن پارٹی |
| 87 | ۱۳۔ چچے |
| 95 | ۱۴۔ کھر والی |
| 102 | ۱۵۔ دشمن |
| 113 | ۱۶۔ زبان |
| 123 | ۱۷۔ لاڑی ہورگڈی |
| 130 | ۱۸۔ لڑائی |
| 135 | ۱۹۔ مظلوم |
| 140 | ۲۰۔ کرسی |
| 144 | ۲۱۔ بیگم دولت |



اللہ کرے زورِ قلم اور زیادہ!

زفر کھوکھر پہاڑی زبان دیاں نثر نگاراں دی فہرست بچ ہک معتبر ناں ہے۔
موصوفہ سُن جتھا تخلیقی ادب بچ خوب ناں کمایا ہے، اُتھا تحقیق تہ تنقید جے مُشکل کماں
بچ بھی چچھاں نیہہ رہی۔

بُنیادی طور اُپر اوہ پہاڑی بولی دی ہک نامور تہ مقبول ادبیہ منی جلدی ہے۔ زفر
کھوکھر سن لکھنے دا آغاز افسانہ نگاری نال کیتا ہے۔ اِس ناچیز سُن اُن دے درجن افسانے
پڑھن دا شرف حاصل کیتا ہے۔ ماہری طراں زفر کھوکھر سن بھی ادب تخلیق
کرن دا آغاز اُردو بچ کیتا ہے تہ جدوں جموں و کشمیر بچ پہاڑی زبان کو سرکاری سرپرستی
میلی تہ نال ہی نجی کوششاں دے نتیجے بچ پہاڑی زبان و ادب بچ تقریباً ساریاں
صنفاں بچ اسدے لکھاری لکھن لگے۔ جس دے نتیجے بچ بیش قیمتی ادبی سرمایہ تخلیق
ہوسکيا، جس بچ انشائیہ نگاری دی بے حد مقبول تہ اہم صنف بھی شامل ہے۔ جموں و
کشمیر اکیڈمی آف آرٹ، کلچر اینڈ لیٹریچر دیاں جریدیاں خصوصاً ”اُستاد“ ہور
”شیرازہ“ بچ پہاڑی زبان دیاں ادبیاں دے انشائیے شائع ہون لگے۔ انہاں
ادبیاں بچ محترمہ زفر کھوکھر داناں خاص اہمیت دا حامل ہے۔ اُن دے ”انشائیے“ پڑھ
کے منہ پیندا ہے کہ اوہ انشائیے دی تاریخ ہور تکنیک تھیں چنگی طراں واقف ہن۔

”انشائیہ“ جس کو اسیں ابتداً بیچ ”مضمون“ یہ انگریزی بیچ ”ایسائی“ یا ”ایسے“ (Essay) آکھدے آسیاں، اسیں چوتھی پنجی جماعت تھیں ہی لکھدے آسیاں۔ گائے گھوڑا، بکری، ہمارا سکول، ہمارا گاؤں، تندرستی ہزار نعمت ہے، علم کے فائدے، ایکسکریشن، ہور ایجیاں، ہی بیچ سارے موضوعات اُپر ٹھہر سارے مضامین لکھدے رہیاں۔ اسیں دساں دساں پیہاں پیہاں سٹراں اُپر مشتمل مضامین ضرور لکھدے رہیاں، مگر اسیں اس گل تھیں بے خبر آسیاں کہ انہاں کو اسیں ”ایسے“ یا انشائیہ بھی لکھ سکدے ہاں۔ حالانکہ اسیں جے کچھ بھی لکھ رہے آسیاں سب غیر شعوری محض امتحان دین دی غرض نال لکھ رہے آسیاں۔ اسیں اس گہرائی بیچ نہ گیندے آسیاں کہ انہاں بیچ مضمون کس کو آکھاں تہ انشائیہ کیہڑا اجیا ہے۔ ماہرے ہک محترم اُستاد سُن ہک تہیاڑے مکو آکھیا کہ میں ”اُستاد“ اُپر مضمون لکھ کا آنا۔ میں کھر بیچ کا پہلاں مضمون لکھن داکم شروع کیتا تہ ماہری پریشانی دی حد بھی مک گئی کہ میں شروع کتھوں تہ کس طراں کراں۔ اسیں جد کسے جاندار یا ٹھوس مجرد چیز اُپر مضمون لکھدے آسیاں، مضمون دی شروعات کچھ اس طراں کردے آسیاں:

”..... ہک پالتو جانور یا حیوان ہوندار ہوندی ہے۔ اسدیاں چار جنگاں، دو کن، دو سینگ، ہک دُمر وغیرہ وغیرہ ہوندے ہین۔ مکو پتہ آسا کہ ماہرے اُستاد محترم دیاں بھی دو جنگاں آسیاں، مگر مضمون نہ لکھ سکیاں۔ ہولیاں ہولیاں آساں کو مجرد تہ غیر مجرد اشیاں بیچ فرق محسوس ہون لگا۔ کہوڑے کُتے، تندرستی، کاگ، ماں تہ گاں..... فر اس تھیں اگے اللہ اللہ! آساں مجرد تہ غیر مجرد مری تہ غیر مری تہ خیالی موضوعات اُپر درجنال مضمون لکھ سٹے۔ مگر محض غیر شعوری طور تے۔ ایہہ پتہ نہ آسا کہ اسیں کس قسم تہ کیہڑا اجیا ادب تخلیق کر رہے ہاں۔ آخر کافی چر دے مگروں جد اسیں یونیورسٹی تہ اعلیٰ علمی تہ تحقیقی ادبی اداریاں تہ انہاں نال منسلک ادبی تہ لکھاری شخصیات نال اٹھن پٹھن لگے۔ اعلیٰ علمی سرگرمیاں بیچ شریک

ہوں گے۔ سنجیدہ موضوعات اُپر لکھیاں دیاں تصنیفاں تے کتاباں پڑھیاں شروع کیتیاں تہ
فرکرے جل کے ادب دیاں مختلف اصناف تھیں روشناس ہوئیاں جہاں نچ انشائیے جی سنجیدہ تہ
دلچسپ صنف بھی شامل ہے۔ اس صنف دانہ صرف مطالعہ کرن لگے بلکہ تخلیقی ذہن رکھن آلیاں
طنز و مزاح نال دلچسپی رکھن آلیاں اپنا میڈیم ”انشائیے“ بنا کہندیا۔

کسے نال گل کر دیاں ہوئیاں اچانک غیر شعوری طور تے کوئی دلچسپ لفظ
محاورہ ضرب المثال آگئی تہ ذہنی تہ شعوری طور اُپر اختراعی کوشش نال اس کو صفحہ قرطاس
اُپر کھلیارے دامن بن گیا۔ فرجے کجھ بھی آیا لکھ سٹیا۔ پڑھن والیاں پڑھیا تہ اس کو
انشائیے دی دلچسپ تہ خوبصورت صنف نال جوڑ سٹیا۔ اساں جد آپ پڑھیا تہ اسیں
بھی نہ سمجھ سکے مگر اوٹھاں اُپر مسکان بھی نظر آن لگی۔ ایہہ سوچن دی ضرورت بھی پیش
آئی کہ اساں جے کجھ لکھیا اس کو ادب دی کیہڑی جینی صنف نال جوڑاں؟

مقدمے دی تمہید خاصی لمی ہوگئی۔ بہر حال مکو حکم ہو یا آسا کہ میں زنفر کھوکھر
دیاں انشائیاں دے مجموعے ”چچے“ اُپر اپنی رائے دا اظہار کراں۔ سچ منو کہ میں
پہلاں ڈر گئیاں کہ انشائیاں اُپر کے رائے دیواں اوہ بھی جندی لکھاری ہک کالسری
ہوؤے۔ کوئی منے یا نہ منے پر ایہہ ہک سچائی ہے کہ مرد حضرات دے مقابلے نچ
کالسری زیادہ حساس ہوندیاں ہن تہ انہاں دے اندر تخلیقی مادہ مرد حضرات تھیں
زیادہ ہوندا ہے۔ خصوصاً طنز و مزاح دے فیلڈ نچ اسدا ثبوت ”چچے“ مجموعہ نچ موجود
ہے۔ ”چچے“ تہ اسدیاں ماواں پہنیاں تہ تہنیاں دا چولی دامن دا ساتھ ہوندا ہے مگر
”چچے“ صرف رسوئی خانے نچ ہی نیمہ ہوندے بلکہ برچی خانے تھیں بار جیہڑے چچے
ہوندے ہن اوہ نہ صرف دلچسپی دے حامل ہوندے ہن بلکہ اسدے سماجی تانے
بانے دا ہک لازمی حصہ ہن۔ اس انشائیے نچ ”چچے“ علامتی کردار دے حامل ہن۔

”زفر کھوکھر“ جد سکولانچ پڑھدی ہووے آ، اُس ویلے بھی اُس ”گُرسی“ اُپر مضمون لکھیا ہوسی تہ اُج بھی پتہ نیہہ انہاں ”گُرسی“ ناں دا انشائیہ ”گُرسی“ اُپر بہہ کے لکھیا ہوسی یا صوفے اُپر کھٹا اُپر یا قالینا اُپر۔ اسے طراں جس ”چپھہ“ دا ذکر علامتی اندازنچ اُنہاں اپنے انشائیے نچ کیتا ہے پتہ نیہہ ایہہ ”چپھہ“ اسدے مُنہواں نچ تیز تہ ڈا ہڈیاں دندان درمیاں محض اپنی نرمی دی وجہ نال صحیح تہ سالم موجود رہندی ہے بلکہ کوئی ہور چپھہ ہے۔ زفر کھوکھر سن جس چپھہ کو اپنے انشائیے دامر کزی کردار بنایا ہے اوہ بظاہر ادبی ”چپھہ“ ہے جیہڑی اسدی پیدائش نال ہی اسدے مُنہواں نچ ماسادے ہکی نرم چپھہ دے طور اُساں نال ساری عمر چپندی رہندی ہے۔ ایہہ راز تِساں کو زفر کھوکھر صاحبہ دا انشائیہ ”چپھہ“ پڑھ کے سمجھنچ آسی۔

زفر کھوکھر صاحبہ دیاں دُویاں انشائیاں نچ ”وومن امپاورمنٹ“ خاصا دلچسپ انشائیہ ہے۔ ایہہ کالسریاں نال ہور ہے مظالم تہ اُنہاں نال برتے جان والا ناروا سلوک تہ کالسریاں دے تئیں سماج دے بے بُیاد دعوے ظاہر کردا ہے۔ دُویاں انشائیاں نچ ”کہر والی“، ”عُصہ“ ہور تعریف جئے انشائیے شامل ہین۔ انہاں ساریاں انشائیاں نچ سماج اُپر پُہر پور طنز ظاہر ہوندا ہے جیہڑا سو فیصد سچائی اُپر مبنی ہے۔ ایہہ انشائیے پڑھ کے قاری متاثر ہون تھیں بغیر نیہہ رہندا ہور اسدے اندر بھی اسے صنف دے ادب دی تخلیق دا شوق ہور جذبہ پیدا ہوندا ہے۔

زفر کھوکھر دے انشائیاں دے مجموعے نچ کُل 21 انشائیے شامل ہین۔ ایہہ سارے انشائیے بے حد دلچسپ تہ قابلِ مطالعہ ہین۔ ایہہ نہ صرف انشائیے دے مزاج ہور معیار اُپر کھرے اُتر دے ہین بلکہ قاری دے دل و دماغ کو معطر کر دے ہین تازگی بخش دے ہین تہ معلومات بھی بدھاندے ہین۔ ہک خالص ادبی صنف ہون دی

وجہ نال ایہہ مصنفہ دی اُچی ہور سچی سوچ دے سارے تقاضے پورے کردے ہین ہور
 قاری کو لکھاری دی دُور اندیشی ہور ڈونگی مٹھی ہور پیاری سوچ دا حامی بناندے ہین
 بلکہ اُسدے اندر بھی کچھ لکھن دی تحریک ہور شوق جگاندے ہین۔ مگدی گل ایہہ
 جے انشائیہ لکھنا کوئی سہل کم نیہہ۔ میں محترمہ زفر کھوکھر کو اس کامیاب کوشش اُپر دل
 دیاں عمیق گہرائیاں تھیں مبارکباد پیش کردا ہاں۔ ”چچے“ لکھ کے انہاں پہاڑی زبان و
 ادب بلکہ آر پار برصغیر بچ بسنک پہاڑی بولن والے ست کروڑ لوکاں اُپر جیہڑا احسان
 کیتا ہے، اس واسطے ایہہ قوم اُندی ہمیشہ سپاس رہسی ہور انہاں کو دُعاواں بچ یاد
 رکھسن۔ ”چچے“ پہاڑی ادب بچ ہک باہدے دے طور تے گنیا مجلسی۔
 مگو اُمید ہے کہ ”چچے“ دی مصنفہ زفر کھوکھر اس صنف اُپر لکھنا جاری رکھسن۔
 جس طراں پطرس بخاری ”گٹے“ لکھ کے بس کر سٹیا آسا، اُس مثال کو نہ دُہرا سن۔
 انشاء اللہ اُسدیاں نیک خواہشاں ہور دُعاواں اُندے شامل حال رہسن۔ آمین!

راجہ نذر بونیاری

۳۰ دسمبر ۲۰۲۰ء
 شوکت علی روڈ ممبئی



پیش لفظ

زنفر کھوکھر ہور پیشے تھیں اُستاد ہین، پُرا دبی دُنیا بچ فطرتاً کہانی کار نے طور پُر
متعارف ہوئے ہین۔ انہاں اس وقت لکھنا شروع کیتا، جدوں نسوانی لکھاریاں نی
اواز دُردُور تکر سنائی نیہہ سی دینی۔ میڈم زنفر ہور کہل مکہلے ہی اس سفر اُپر نکل پئے تہ
بچھاں مڑ کے نیہہ تکیا کہ زمانہ کدھر گیا اے تہ انہاں ناسفر کیہڑے پاسے ہو یا۔ اُساں
نے بیمار معاشرے کی اک ادبی حکیم نی لوڑ سی۔ انہاں سُن حرفاں نے وسیلے نال دوا دارو
کرنے نایہڑا چٹک لیا۔

نہ تہ کسے نے انہاں کی اواز دتی، نہ ہی انہاں نے کسے نی اواز سنی۔ اپنا کہلا پن
رکھ کے اس سفر پُر نکلیاں۔ معاشرے نی اصلاح انہاں اکھراں نے حوالے متواتر
جاری رکھی۔ ماحول نے اثر تھیں بالکل بے نیاز، کُہر کوٹھے نے رکھ رکھاؤ تھیں وقت
چوری کر کے اپنیاں دلچسپیاں کی قائم رکھیا۔

آل دوالے نے دُکھ درد کی ناپنا، پرکھنا تہ اسی تک پہنچال کرنی انہاں نا شُغل
رہیا۔ وقت نا جائز استعمال کرنا انہاں فی فطرت رہی اے۔ انہاں فی زندگی نے باغاں
بچوں صرف پھل نیہہ کھا ہدے، سگوں اس نے پھلاں فی حفاظت کیتی۔ اُچے بوٹیاں
توں عظمت سکھی۔ بدلاں توں عوامی زندگی نا مفاد سکھیا۔

موصوفہ اپنی دنیائی آپ دریافت رہی اے۔ پیشہ ورانہ ذمہ داریاں ہوں یا خانگی ماحول نابیناؤ سنگار ہووے، لکھنے پڑھنے ناوقت کڈھنا ہووے یا باقاعدہ طور اس منزل اُپر اپنا قبضہ جمانا ہووے، پر متواتر اپنے قول و امور اُپر غیر متزلزل تہ قائم رہیاں ہیں۔ باوجود گونا گوں مصروفیات نے انہاں نے اندر نادبی انسان دن پہر مشاہدہ کرنا تہ نیندر توں وقت چُرا کے لکھنے پڑھنے والے پاسے اُکسانا رہیا۔

ایہہ واحد نسوانی آواز اے جیہڑی کہانی کرنے نے مزاج کی آبرورکھنی رہی۔ انہاں نی تلاش بچ وی مرحلہ روڑا بن کے چہل ماری میہہ سکیا۔

شروعات اُردو نے دسترخوان تھیں ہوئی۔ متا سارا لکھیا تہ صاحب دیوان نے کھاتے بچ وی اپنا ناں درج کرایا، پر کوئی حادثہ اے یا شوق کہ ایہہ اپنی ماء بولی والے پاسے مُو کے اپنی ممتا نے دُده نا قرض چُکانے واسطے مصروف لکیاں۔

اس وقت انہاں نا میدان ”انشائیہ“ تجویز ہو یا جد کہ پہلاں انہاں سُن افسانوی ادب نیاں زُلفاں سنواریاں تہ سجا نیاں۔ موصوفہ سُن اپنی چدّت پسندی نی دولت نے وسیلے نال ایہہ کم شروع کیتا۔ متا سارا لکھیا۔ اپنے تخلیقی جذبیاں نی خوب پرورش کیتی۔ مواد تہ ہیئت نی دولت سمہالی ہر گل کی اس نی تہہ تک تلکا کھوج کرنا تہ اس نے اندر دفن موتیاں کی کھگانے نا سلسلہ قائم رکھیا۔ کسے جگہ تہ ضرورت توں زیادہ موضوع نے حصے بکھرے کیتے۔ اس نا پوسٹ مارٹم تک کرنے بچ وی کوئی کوتاہی میہہ برتی۔ اسنے اجزائے ترکیبی نے سارے جُویات اُپر تبصرہ کرنا، انہاں نی لیاقت نی نشانی اے۔

ایہہ تبصرہ میں انہاں نے دس پندراں انشائیہ جیہڑے ماہریاں نظراں توں گزرے، مثال نے طور اُپر ”مظلوم“، ”لڑائی“، ”چپھ“، ”گال“، ”تعریف“، ”غصہ“، ”چچے“، ”دُشمن“ وغیرہ جیہے انشائیہ پڑھ کے لکھ رہیا ہاں۔

جدوں چھہ (زبان) نی گل ہووے، ایہہ سارے ناسارا مضمون اپنی حدوں نے اندر ہی رکھیا گیا اے۔ دراصل انشائیے نی ابتداء انگریزی ادب توں اُردو بچ داخل ہو کے نویاں نویاں وادیاں بچ گزرتک محدود اے۔ خورے پہلا انگریزی ادب نا انشائیہ لکھنے والا فرانسس بیکن (1561-1626) سی۔ اس نیاں قائم کیتیاں راہواں اُپر اُردو تہ فردو نیاں زبانوں نے ادبیاں سُن اِس صنف کی اپنایا اے۔

ہُن اِس حوالے نال چھہ نی گل جدوں چھڑنی اے تہ ایہہ سارا انشائیہ تاریخ، جغرافیہ، تمہید توں ٹپ کے ڈوہنگے تبصرے نی صورت بچ ظاہر کیتا گیا اے۔ انسان حیوانِ ناطق اے۔ چھہ نافرک کس طراں نال محسوس ہونا اے۔ تیز طرار برتاؤ، زبان شیریں ملک گیری نا انداز اک حقیقی کہانی نے روپ بچ ظاہر ہونا اے۔ لمی چھہ، چھوٹی چھہ، زبان نا باہمی میل جول، زبان کرنا، زبان دینا، زبان اُپر پورا اترنا وغیرہ وغیرہ نا تذکرہ۔ زبان میل ملاپ وی بنانی اے تہ دُریاں وی۔ زبان قینچی ہاروں وی چلنی اے۔ داندوں بشکار زبان نا ہونا وغیرہ نا خوبصورت تبصرہ موصوفہ نی قادر الکلامی نی علامت اے۔

اک ہور انشائیہ ”تعریف“ اِس بچ موصوفہ سُن بہت ساریاں نرالیاں گلاں نا انکشاف کیتا اے۔ مثلاً زندگی بچ تکیا ایہہ گیا تہ مرنے توں بعد تعریفاں نے ٹھیر بنا رکھنا، اپنے منہ میاں مٹھو بننا جیہاں ترکیباں نال حُسن بیان قائم رکھیا اے۔ نکتہ چینی کوئی برداشت نیہہ کرنا۔ منہہ اُپر تعریفاں لیڈراں نی کمزور رگ اے، جس اُپر قابو پایا جاسکنا اے۔ میاں بیوی نیاں رشتیاں بچ تعریفاں نا ذکر حالات نے تقاضے نے مطابق خوشگوار زندگی نا باعث شمار ہونا، ہر جگہ جائز تہ ناجائز تعریفاں نال دشمن، دوست، ناواقف، واقف، ناہموار کی ہموار کرنے نا سبب ہتھ آنا اے۔ چاپلوساں نی دنیاوی اسے طراں آباد ہوئی جانی اے۔

ایہہ انشائیے ”گال“ تہ ”غصہ“ وغیرہ نے ضمن بچ موصوفہ اس نے نقصانات اُپر عادلانہ تبصرہ کیا اے۔ گستاخ لوکاں نال برتاؤ نیک لوکاں نی موجودگی نی ضرورت وغیرہ۔ غصہ کئی بار اچھا تہ کئی بار نقصان دہ ہونا اے۔ اس تعلق انسان نی جبلت نال ہونا اے۔ ڈرائیور نا غصہ گڈی اُپر بڈھی نا کھندو لے اُپر جینا ماحول زمانے نے دستور نال جڑو یا ہو یا اے۔ اس نے آفادی پہلو اُپروی سوہنا تبصرہ کیا گیا اے۔ ظالم و مظلوم نی آپسی کھینچا تانی، نفرت، کدورت تہ بغض پیدا ہونے نی اک مشین سمجھی جانی اے تہ اس توں بچنے واسطے کجھ تدبیراں نا ذکر وی اے۔

ہو راک ”گال“ والا انشائیہ اس طراں خاوند بیوی نے رشتے بچ پائی جان والی دراڑ، چچے، بیلے، باورچی خانے نے اندر گہننے والے سارے ہتھیار، گالی گلوچ، مارنا، تلخیاں تہ کڑواہٹ نے ماحول نا سارا کچا چھٹا وغیرہ اپنے بیانیے بچ آن کے حقیقت نے کجھ اک کپڑے لوانے نا کم وی موصوفہ نے بڑی خوبصورتی نال پورا کیا۔ اس ضمن بچ ”حقوقِ نسواں“ نا دفتر وی کھول کے رکھ دتا تہ اپنی جنس نی حمایت بچ کھڑی ہوئی گئیاں ہن۔ مظلوم نی صفت بچ مرداں نی مجبوری وی باندے با چھڑ دہی کہ اس کی کس طراں تنگ کیا جانا اے۔ اس طراں انہاں نے دیانت دارانہ علمی ثبوت بچ وی پیش کیے۔

اسی طراں کجھ ہو ر تخلیقات نے ذکر بچ موصوفہ اک تماشابین نی طراں کھلی سارے معاملات نی عکس گیری کر رہی ہونی اے۔ ہر گل نے بچھے نیڑے توں ادھیڑے تہ انہاں نی ٹاکیاں لانے نا کم وی سؤنی طراں کیا اے۔

”گال“ نے انشائیے کی وی اپنی کمال نی فہم و فراست نال تجربہ کاری کیتی اے۔ اس طراں نے تبصرے تہ انہاں اُپر قلم چکے توں پہلاں ستر تحقیقی نظریہ اس گل نی دلیل اے کہ موصوفہ انہاں کرداراں نا گویا اک حصہ رہی ہن۔

اس سارے علمی مطالعے تھیں ایہہ گل ثابت ہوئی اے کہ موصوفہ اپنے ڈوہنگے علمی مشاہدے سے مطالعے تھیں نہ تو نیاں نویاں گلاں نی گتھی ادھیڑ نے بچ مہارت رکھنیاں ہین۔ موصوفہ اپنی منزل والے پاسے گامزن ہین تہ پڑھنے لکھنے، مشاہدہ کرنے تہ برتنے نا زندہ شعور لے کے انہاں ندی نالیاں توں پار اتر رہی ہین۔ آنے والے وقت کی ایہہ لٹریچر بچ جو کھا مقام حاصل کرن بچ کامیاب ہون گئیاں تہ پہاڑی ادبی ورثہ کی مالا مال کرنے بچ اپنا حصہ شامل رکھسن، جس اُپر انہاں قلم تہ تجربہ شامل ہوسی۔ ایہہ نویاں نویاں تحریراں اس ادب کی اک ابھیا مقام عطا کرسن جس نی ضرورت اج محسوس کیتی گئی اے۔ اس توں بدھ کے اس گل کی منا پیسی کہ اس طراں نا ادب نسوانی ذہن نی پیمائش کرنے بچ متی ساری اہمیت نا حصہ دار ہوسی۔ کیاں جے اس میدان بچ بڑا کہٹ سرمایہ جمع ہو سکیا اے۔ جس بچ اک خاتون نا میلان طبع نی نشانہ ہی ملنی اے۔

خدا کرے موصوفہ اس ادبی سلسلے نال بغیر کسے تساہل نے جویاں رہون تہ ہور گچھ اپنی تحریر نے حوالے کرنے بچ مصروف رہوون تاں جے آنے والے کل نا طالب علم اس مزاج و تخلیقی سرمایے توں فیض یاب ہو سکے۔

نثار حسین راہی

۲۵ نومبر ۲۰۲۰ء

دودا سن بالا۔ راجوری



گجھ اپنے بارے پنج

اپنے بارے پنج کجھ لکھنے تھیں پہلاں میں اللہ تعالیٰ نالکھ لکھ شکر ادا کرنی ہاں کہ جس نی خاص عنایت تہ رحمت نے طفیل میں اس قابل ہوئی ہاں کہ اپنے بارے پنج کجھ لکھی سکاں۔ نال ہی میں اپنی سب تھیں بڑی پہنیں مرحومہ جان بیگم واسطے دعا گو ہاں۔ اللہ انہاں نے جتناں پنج ڈیرے لائے کہ جہاں مگی سب تھیں پہلاں لکھنے پڑھنے نی راہ اُپر لایا۔ سکول جانے نی عمر تھیں پہلاں ہی کھر پنج بڑے لاڈ پیار سنگ الف ب والا قاعدہ پڑھایا، گنتی سکھائی، پہاڑے یاد کروائے تہ فرجدوں سکول جانے ناموقعہ ویلہ آیا، سویرے سویرے چاء نہاری کھلائی پلائی مگی سکول وی ٹوریا۔ ایہہ انہاں نامنڈھ باہیا ہو یا اے کہ اج میں محکمہ ایجوکیشن پنج چالی سال نوکری کرنے نے نال نال کجھاں کتاباں نی مصنفہ بھی اکھوانی ہاں۔

سکول ریکارڈ نے مطابق ماہری پیدائش ضلع پونچھ، تحصیل مینڈھڑ گراں کاہنڈی گلو تہ پنج ۱۹ دسمبر ۱۹۵۷ء پنج ہوئی۔ ایہہ تاریخ پیدائش کہٹ بدھ وی ہوئی سکئی اے۔ ماہرے پہنیا محمد شفیع کھوکھر پڑھے لکھے ہوئے سن۔ انہاں ضرور تاریخ پیدائش ناریکارڈ رکھیا ہووے اے، مگر راجوری پونچھ نے جہاں لوکاں کی ہندوستان پاکستان نیاں جنگاں تہ لڑائیاں پنج تہ رار پارنی گولہ باری پنج کئی کئی پرت لگے ہوون، کئی کئی بار کھر دوار چھوڑنے پئے ہوون، دھن دولت جئے اثاٹھے پھٹئی گئے ہوون، انہاں کی نکلیاں مٹیاں یاداں تہ ریکارڈاں ناگتھے ہوش رہنا اے۔

ماہری ابتدائی تعلیم گورنمنٹ پرائمری سکول کا ہنڈی گلو تہنچ جناب ماسٹر محمد خلیل
ہوراں نے ہتھوں ہوئی۔ انہاں ساریاں پچیاں کی بڑی محنت تہ ہمدردی نال پڑھایا۔
کوئی چینگ کرنے والا نیہہ سی ہونا۔ اس نے باوجود اوہ کدے لیٹ نیہہ ہوئے۔
کدے چھٹی جلدی نیہہ کیتی تہ کدے غیر حاضر نیہہ رہے۔ اک دوبار اپنی کسے مجبوری
نے تحت اوہ جدوں آپوں نیہہ آسکے، انہاں اپنی جگہ کوئی دوا بندہ ضرور مقرر کیتا۔ ایسا
کدے وی نیہہ ہو یا کہ سکول بند رہیا ہووے۔

پرائمری سکول تھیں بعد میں ہائی سکول ہر نی چنچ داخلہ کھندا۔ ایہہ سکول کھر تھیں
خاص دور در اہڈے سی، مگر اُتھے وی اُستاد نہایت ہی اچھے لھے۔ جہاں نہ صرف محنت
نال پڑھایا بلکہ ماہری قابلیت نی تعریفاں کری ماہری حوصلہ افزائی وی کیتی۔ اُس
زمانے چنچ اس اہڈے گراں تہ علاقے چنچ گڑیاں چڑیاں کی سکول ٹورنے تہ پڑھانے نا
رواج نہ نے برابر ہونا سی، مگر ماہری خوش قسمتی کہ میں اپنے گراں نی پہلی گڑی ساں
جس ۱۹۷۵ء چنچ اچھے خاصے نمبر ہنی میٹرک نا امتحان پاس کیتا سی۔ اُسے ہی سال شادی
بیاہ نے نتیجے چنچ میں ضلع راجوری نے ساج گراں چنچ بھگی۔ کھر سسرال نا ماحول بڑا ہی
سازگار رہیا تہ اگے نی ساری پڑھائی میں پرائیویٹ طور اُپر حاصل کیتی۔

۱۹۷۸ء چنچ محکمہ ایجوکیشن چنچ ٹیچر نے طور اُپر ماہری نوکری لگی، جیہڑی سینئر لکچر
نے عہدے تک بھگی تہ دسمبر ۲۰۱۷ء چنچ ریٹائرمنٹ اُپر اختتام پذیر ہوئی۔
جتھے تک لکھنے پڑھنے نی گل ہے، ۱۹۹۰ء نے کول کال میں اُردو چنچ افسانے
لکھنے نی شروعات کیتی، جیہڑے ہند سماچار چنچ لگا تا شائع ہون لگ پئے تہ ماہرا حوصلہ
وی بدھن لگ پیا۔ ماہرا پہلا ہی ارسال کیتا ہو یا افسانہ ہند سماچار چنچ کجھاں ہی دناں
نے اندر اندر ہی شائع ہوئی گیا سی تہ فرایہہ سلسلہ لگا تا رہی چل پیا سی۔

مگر اصل گل ایہہ اے کہ میں افسانے لکھنے نی طرف راغب کس طراں ہوئی۔ جد کہ ماہرے کنبے کھرانے بچ تہ اڑوس پڑوس بچ وی نہ کوئی شاعر تہ نہ ہی کوئی ادیب ہو یا اے۔ دراصل ماہرے کھروالے ماسٹر محمد حنیف کھوکھر ہوراپنے اک خاص دور بچ ادبی رسالے خریدنے پڑھنے تہ ”شمع“ ادبی معمع حل کرنے ہونے سن۔ انہاں اک دفعہ ”شمع“ ادبی معمع نا پہلا انعام دی جتیا سی۔ بس کھربچ آئے ہوئے شمع بیسویں صدی روبا تہ ہور متے سارے معیاری ادبی رسالیاں کی بچوں بچوں پڑھنے نا نتیجہ ایہہ نکلیا کہ کجھ عرصے بعد ماہرے دل بچ وی افسانے لکھنے نا خیال پیدا ہوئی گیا۔ کدے کدے سوچنی ہاں کہ اگر مگی اس وقت اوہ رسالے پڑھنے واسطے میسر نہ ہونے تہ شاید میں اج اس مقام اُپر ہی نہ ہوواں اے تہ دوئی گل ایہہ کہ اپنے ادبی سفر بچ میں پہاویں ہی کہل مکہلی ہی نکلی ساں تہ اپنی کشتی نی واحد کہلی ہی مسافر ساں، مگر ریاستی کلچرل اکیڈمی نا ماہرے اس سفر بچ بڑا ہی اہم رول رہیا اے۔ کلچرل اکیڈمی نی طرفوں اگر مگی اک سٹیج، اک پلیٹ فارم نہ ملنا، حوصلہ افزائی نہ ہونی تہ شاید ہی ماہری بیڑی بٹھے لگے اے یا نہ لگے اے۔ اُس دور بچ ڈاکٹر صابر مرزا ہور اکیڈمی آف آرٹ، کلچر اینڈ لینگویج سب آفس راجوری نے افسر اعلیٰ ہونے سن۔ انہاں کی جیسا ہی ماہرے بارے بچ علم ہو یا کہ میں لکھنی لکھانی ہاں، بس انہاں مگی اکیڈمی نی طرفوں منعقد ہونے والے ادبی پروگراماں بچ بلا نا شروع کری ہندا۔ اس طراں ماہر احوصلہ بدھنا گیا۔

بے شک افسانے لکھنے نی ماہری شروعات اردو افسانے تھیں ہوئی اے۔ ہند سماچار تھیں علاوہ بیسویں صدی پرواز ادب، شاعر انشا، کسوٹی، رنگ، تریاق، شگوفہ تہ نگینہ جیسے معیاری رسالیاں بچ وی ماہرے افسانے شائع ہوئے ہین۔ اُسے دوران ہی میں بچوں بچوں پہاڑی افسانے وی لکھنے شروع کری ہندے۔ خاص طور اُپر جدوں

کچلرل اکیڈمی نے سرپرست اعلیٰ جناب ظفر اقبال منہاس ہوراں اپنی پوری ٹیم سمیت راجوری تہ پونچھ نا دورہ کیتا، دور دراز علاقیاں تک جگہ جگہ پہاڑی ادبی پروگرام منعقد کیتے، ماہری وی اکھ گھلی۔ میں سنجیدگی سنگ پہاڑی بچ افسانے لکھنے شروع کیتے۔ ماہرے کئی افسانے تہ انشائیے پہاڑی زبان بچ نکلنے والے ”شیرازہ“ تہ ”استادب“ بچ شائع ہوئی چکے ہین۔ جناب سید اقبال ملنگامی ہوراں نی سرپرستی بچ ریاستی کچلرل اکیڈمی نی طرفوں جموں بچ منعقد ہونے والیاں دو بڑیاں پہاڑی ادبی کانفرنساں بچ وی جانے ناموقعہ ملیا۔ بہت سارے پہاڑی شاعراں تہ ادیبوں کی سنی بجھی کے ماہرا لکھنے نارجان بدھنا گیا۔

اردو بچ افسانے تہ طنز و مزاح اُپر مشتمل ماہریاں چار کتاباں شائع ہوئی چکیاں ہین، مگر پہاڑی بچ انشائیاں اُپر مشتمل ”چچے“ عنوان نے تحت ایہہ ماہری پہلی کتاب اے۔ میں اس کتاب نی اشاعت نے سلسلے بچ جناب ڈاکٹر مرزا فاروق انوار تہ جناب عبدالواحد منہاس ہوراں نی بے حد شکر گزار ہاں کہ جہاں مگی کتاب شائع کرانے واسطے نہ صرف بار بار آکھیا سگوں کتاب نی اشاعت نے ہر مرحلے بچ پوری پوری مدد وی کیتی اے۔ میں جناب نثار راہی، جناب راجہ نذر بونیاری، جناب پرویز مانوس تہ انہاں ساریاں ناشکر یہ ادا کرنی ہاں جہاں کتاب نی اشاعت نے سلسلے بچ مگی زبانی، عملی تہ قلمی تعاون دیتا ہے۔

زفر کھوکھر

ساج۔ راجوری



گاں

انساناں تہ جانوراں نا ہمیشاں تھیں ہی سنگ ساتھ تہ آپسی تعلق رہیا ہے۔ اتھے
تکر جے انسان کی وی سماجی جانور آکھیا جانا ہے۔

اَجکل نے حالات بچ لفظ ”سماج“ اُگر کئی وی دتا جائے یعنی سماجی جانور آکھنے
نے بجائے صرف جانور ہی آکھیا جائے تاں وی کوئی فرق میہہ پینا۔ اَجکل انساناں تہ
جانوراں نا آپسی تعلق اتنا کھنیرا ہوئی گیا ہے جے دوئے اکس دُوئے بچ گڈ ہوئی گئے
ہین تہ دواں بچ فرق کرنا ہیوں ہی اوکھا ہوئی گیا ہے۔ ایہہ گل اُس انساناں نے کجھاں
طور طریقیاں کی تکلنے ہویاں آکھنے ہاں۔ مثلاً اُدھی گل سُنی تہ مشتعل ہوئی جانا، بغیر
چھان بین کرن تھیں ہی کسے کی مارنا، قانون تھیں باہدا کرنا وغیرہ وغیرہ۔

بے شک پالتو جانوراں جتھے انساناں کی طراں طراں نے فائدے بخشے، اتھے
اُنہاں کی وی ”گھر سکھ تہ منہہ چرا“ جیاں کئی سہولتاں تہ سکھ نصیب ہوئے۔ اِس
طراں دوئے اکس دُوئے کولوں فیض تہ فائدہ پنے آئے ہین۔

اَساں انساناں نی طراں جانوراں نے وی اپنے اپنے کُتے، کھرانے تہ
خاندان ہونے ہین۔ کجھ جانور پالتو ہونے ہین تہ کجھ جنگل بچ رہنے نی وجہ تھیں جنگلی
آکھوانے ہین۔

تکلیا جائے تاں اُس انسان پہناویں بستیاں تہ شہراں بچ رہنے ہاں، وراپنے گجھاں کارنامیاں تہ طور طریقیاں نے طفیل آرام سنگ جنگلی وی آکھوائی لینے ہاں۔ اساہڑے اگے چکھے بھوں سارے پالتو جانور ہین۔ انہاں پالتو جانوراں بچوں تکلیا جائے تاں منج تہ گاں ناکتبہ کھرانا اک ہی ہے۔ معمولی جے فرق نال دواں ناجسم، جسامت، قد کاٹھی تہ رنگ روپ وی اک ہی ہے۔ نین نقش وی اک ہین۔ رو، کھووی اک ہے۔ دواں ناچار پانی وی اک ہے۔ دوئے ہی دودھ دینیاں ہین، مگر دواں نی قسمت اپنی اپنی.....! کسے سچ آکھیا ہے جے ”کوئی کسے نی قسمت ناشریک نیہہ ہوئی سلکنا“۔

اللہ جس کی چاہوے نواز دینا ہے تہ جس کی چاہوے دیسی وی تہ موڑی پھتا ہے۔ اساہڑے کول ابھجیاں کئی مثالاں ہین۔ بھوں پُرانیاں وی تہ کل کل نیاں نویاں وی۔ اسان کنیاں نی جے جے ہونیاں ”میں میں“ ہونی تکی ہے۔ کئی تخت والے بے تخت ہونے تکی تہ کئی بد بخت تختاں اُپر تکی۔

منج تہ گاں نے مزاج تھیں کون اوپرا ہے دواں نامزاج لگ بھگ اکوجیا ہی ہونا ہے۔ دوئے سِدھے سادھے مزاج نیاں حامل.....! جس تھاں کوئی بچھے، اُسے تھاں نیاں ہوئی جانیاں ہین۔ رُکھا سکھا، جیجا کھجیا کھائی تہ دوئے دودھ دینیاں ہین، مگر شریف تہ معتبر ہونے ناجیہہ اعزاز گاں کی لہھا ہے، منج اُس ناپسنگ وی حاصل نیہہ کری سکی۔ کسے خوش نصیب کی اگر مقدر نال سِدھی سادھی شریف جی لاڑی لہھی جائے تاں اُس کی گاں نال تشبیہہ دتی جانی ہے۔ اُس واسطے آکھیا جانا ہے جے ”اوہ تہ نری گاں ہے“۔ کوئی بندہ آپوں ہی اگر سِدھا سادھا تہ شریف جییا ہے تہ اُس واسطے وی آکھیا جانا ہے جے ”اوہ اللہ نی گاں ہے“۔

ایہہ ساریاں گلاں کرنے نامطلب ایہہ ہے جے گاں حقیقت بچ اک شریف
جانور ہے تہ اپنے کُتے کُہرانے نے باقی جانوراں نالوں خوش نصیب تہ معتروی ہے۔
شاعراں اس کی اپنی شاعری ناموضوع وی بنایا ہے۔ منج واسطے شاید ہی کسے اس انداز
بچ آکھیا ہوسی ۔

رَب کا شکر ادا کر بھائی
جس نے ہماری گائے بنائی

اس تھیں علاوہ گاں نا ایہہ اپنا مقدر ہے جے اُس کی اک پوری قوم تہ انساناں نی
ماء ہونے نافخروی حاصل ہے۔

اَساں سمیت اساہڑے اُگے چکھے ایجئے لوک وی ہین جیہڑے اپنی ماء کی وی ماء
نیہہ سمجھنے مگر گاں نی ایہہ اپنی قسمت تہ شناخت ہے جے اُس کی ماء نادرجہ نصیب ہويا
ہے تہ اُس نی ماء جی خدمت تہ سیوا وی ہونی ہے۔

مگر اَساں لوکاں نی ایہہ بے وقوفی جے اُس کسے نی عزت افزائی تہ حوصلہ افزائی
کی برداشت کری ہی نیہہ سکے ہاں۔ ایہہ حوصلہ افزائی تہ عزت افزائی کسے جانور نی
ہوؤے یا فر کسے انسان نی تہ بندہ پہناویں پی۔ ایم کیاں نہ ہوؤے اُس بس ساڑاں
سڑی جانے ہاں۔ سڑی بلی جانے ہاں۔ اُس ایہہ گل پھٹکی جانے ہاں جے قدرت نے
فیصلے مننے پینے ہین۔ اُس ایہہ گل پھٹکی جانے ہاں جے ڈاڈیاں تہ متیاں نے فیصلے مننے
بچ ہی بہتری ہونی ہے۔ مگر اَساں بے وقوفاں نے پلے ایہہ گل پووے وی تاں
نا۔ اَساں کی اچھائیاں اپنے آپ بچ ہی دُسنیاں ہین تہ بُرائیاں صرف دُویاں بچ۔ اُس
عینک ہی اوہ لانے ہاں جیہڑی صرف دُویاں بٹیاں بُرائیاں نکنی ہے۔ البتہ اُس پہاڑ نال
نچی کدی ٹکر لائی پنے ہاں پہناویں اپنا سر چڑو چڑو رہوئی جائے۔

انسان پہناویں ہی اشرف المخلوقات ہونے کا دعویدار ہے، مگر بہتیاں گلاں بچ جانوراں نا پلڑا پہنا را دینا ہے۔ مثال نے طور اُپر جانوراں اپنی تباہی نے سامان کدے وی پیدا نہیں کیے۔ اوہ جن اُپر پہناویں ہی نہیں بچے، مگر توپ، گولے، تھیم بم وی نہیں پیدا کیے۔ جانوراں جدوں وی نقصان چکلیا، محض انساناں نے پیروں ہی۔ اس تھیں علاوہ تہذیبی طور اُپر تکیا جائے تہ جانوراں اچھیں توڑیں اپنے آپ کی لالچ، حسد، رشوت تہ ہوس تھیں بچائی رکھیا نا ہے۔ چوری، اغوا، رپ تہ قتل جیاں وارداتاں جانوراں نے کلچرنا حصہ ہی نہیں ہن۔

بہر حال اسا ہڑا خاص موضوع گاں ہے۔ سکول بچ داخل ہوئی تہ سب تھیں پہلاں گاں اُپر ہی مضمون لکھنا پینا ہے۔ انگریزی پڑھن لگنے ہاں تہ اُتھے وی گاں اُپر ہی مضمون لکھنا پینا ہے۔ غرض ایہہ جے گاں ہمیشاں تھیں ہی اہمیت نی حامل رہی ہے۔

پہناویں جے شاعراں تہ ادبیاں گئے کی ادب بچ بڑا رتبہ تہ مقام دتا ہے۔ بطرس بخاری ہوراں نا مضمون ”گئے“ تہ عابد مغز ہوراں نا مضمون ”سگ گزیدہ“ نی بدولت اُردو ادب کی چارچن لگے ہن۔ گئے نی وفاداری وی کوئی ہنگی چھپی نی چیز نہیں ہے۔ اس تھیں علاوہ گئے کی بڑیاں لوکاں نے کھراں بچ بستر بچ سینیاں تہ لکشری (Luxury) گڈیاں بچ سیر کرنے ہویاں وی تکیا جائی سکنا ہے، مگر انہاں ساریاں سہولتاں تہ خوبیاں نے باوجود کتنا اسا ہڑی گاں نے مقابلے بچ پسنگ وی نہیں ہے۔ اک مشہور محاورہ ہے جے ”کولہونا داند“۔ مطلب ہے محنت مشقت کرنے والا۔ تہیا رات مشین نی طراں چلنے والا۔ لگا تار کم بچ جُتیا رہنے والا تہ کولہونا داند کولہو وی چلانا ہے، ہل وی باہنا ہے۔ گاہ وی گاہنا ہے، مگر اک محاورے تھیں اگے تجاوز نہیں کری سکیا۔ حالاں کہ اس کی گاں ماتا

نی اولاد ہونے نا شرف وی حاصل ہے، مگر گاس نی اہمیت تکو جے شاعراں اس کی
 موضوع بنایا۔ سیاسی پارٹیاں اس کی اپنی پیشان نا نشان بنایا۔ ڈاکٹراں کی اس نے دُده
 بچ عقل مندی لہی۔ اک پوری قوم نے اس نی حفاظت تہ نگہبانی نا بیڑا چکیا۔ صرف ایہہ
 ہی نیہہ سیاست دان تہ کوئی موقعہ تھوں نیہہ جان دینے۔ اوہ گاس ماء ہوراں کی سیاست
 نے میدان بچ وی لئی آئے ہین۔ ہُن بس لوڑ اس گل نی ہے جے اس اپنے خول بچوں
 باہر نکلاں۔ کھلے دل سنگ گاس ماء ہوراں نی سیوا وی کراں تہ نال و نال ہی سیاسی
 فائدے وی حاصل کراں۔ ماء تہ آخر ماء ہی ہونی ہے، اوہ فر پہاویں اپنی ہووے یا
 پرانی۔ سیوانی تہ حقدار ہونی ہے.....!!



عُصَّہ

حضرات! تِس سارے عُصَّہ تھیں واقف ہو سو گے۔ عُصَّہ انسان فی اک
خُصَّہ طاقت ہے۔ اک پوشیدہ تہ چھپی فی دولت ہے۔ ہر کوئی اِس دولت سنگ پُہر یا
پُہنگنیا نا ہونا ہے مگر اِس دولت نا کسے دُوے یا تر یئے کی اتہ پتہ نیہہ ہونا۔ جس
طراں باہر نے مُلکاں بچ جمع امیراں تہ وزیراں فی دولت نا کسے دُوے تر یئے کی
عِلْم تہ اتہ پتہ نیہہ ہونا ہے۔

ایہہ اک مُفت فی دولت ہونی ہے۔ یعنی اِس دولت فی روپے پیسے فی طراں
کمانی نیہہ ہوئی سکنی۔ ایہہ خُدا طر فی دولت ہونی ہے۔ اک باہدے فی صلاحیت ہونی
ہے جیہڑی ویلے سرے کم آئی سکنی ہے۔ اس نے طفیل بندہ اپنی اک بکھ شناخت بنائی
سکنا ہے۔ کدے کدے اِس نا استعمال مہنگا وی پئی سکنا ہے۔ اِس واسطے اِس دولت کی
روپے پیسے فی طراں احتیاط تہ سوجھ بوجھ سنگ استعمال کرنا پینا ہے۔

عام جئے حالات بچ اک بندے کی اپنی اِس صلاحیت نا عِلْم ہی نیہہ ہونا ہے۔
اِس نا اتہ پتہ تہ دُویاں فی مدد سنگ ہی چلنا ہے۔ جدوں توڑیں کسے گستاخ تہ گنہگار نا
واسطہ نہ پوڑے تدوں توڑیں بندے کی اپنی اِس خُدا طر فی دولت تہ اپنی اِس باہدے فی
صلاحیت نا عِلْم تہ حساب کتاب ہی نیہہ ہونا ہے۔

اک شاعر نے مطابق ۔

ہم سوئی چھو کر دیکھ لیتے ہیں
کس میں کتنا پنہاں ہے عُصّہ

آہاں جی! ایہہ بالکل صحیح ہے بے پتھر توڑیں کوئی چھیڑ چھڑ جیہا معاملہ
سامنے نہ آوے جس طراں وکی لیکس تہ پانامہ پیپر زتھیں پہلاں کسے کی وی
کسے نی تھن دولت نی کوئی خبر نیہہ سی بالکل اسے طراں جدوں تکر بندے نال
کوئی چھیڑ چھاڑ نہ ہووے کسے کی تہ خود بندے کی وی اپنی اس دولت نا تہ پتہ تہ
حساب کتاب نیہہ ہونا ہے ۔

کدے کدے عُصّہ جانی کجھی تہ کدے کدے اپنا آپ منوانے واسطے وی کیتا
جانا ہے ۔ ابھی حالت بچ کوئی وی بے قصور تہ بے گناہ عُصّے نی زد بچ آئی سکنا ہے ۔ عقلمند
لوک اس قسم نے عُصّے تھیں بچنے واسطے آکھن ہین ۔

بکھ بکھ قسم نے لوک بکھ بکھ طریقیاں سنگ اپنے اپنے عُصّے نا اظہار کرنے ہین ۔
گجھ چیخنے چلانے ہین تہ گجھ بالکل خاموش ہوئی جانے ہین ۔ یعنی اک طراں نال رستی
جانے ہین ۔ کہر والی نا عُصّہ اپنے بال بچے اُپر نکلتا ہے یا فر اپنے مسکین تہ عاجز جے کہر
والے اُپر ۔ بال بچہ تہ ماؤ نا عُصّہ سہاری پھتا ہے مگر کہر والا اپنا عُصّہ کسے ہور مسکین اُپر تہ یا
فر دفتر بچ اپنے ماتحتاں اُپر کڈھنا ہے ۔

عُصّے نا جواب عُصّے نال وی دتا جائی سکنا ہے تہ تدبیر نال وی ۔ پہلے طریقے نال
بندہ مار وی کھائی سکنا ہے تہ دُوے طریقے نال کامیاب رہنا ہے تہ نالے عزت وی
بٹوری سکنا ہے ۔ اپنے کہر بچ کیتا جانے والا عُصّہ کہر والیاں کی سمجھانے واسطے ہونا ہے
تہ آفس بچ رُعب جمانے واسطے نالے اپنیاں کمزوریاں چھپانے واسطے ہونا ہے ۔ اپنی

کہر والی اُپر غصّہ زیادہ چرتوڑیں نیمہ چلی سکن۔ ہاں جے کر کوئی سدھی سادھی گاں جی
ہوؤے تاں گجھاں دناں توڑیں چلی وی سکن۔

اک بندے نی گل ہے کہ اُس اوّل روز تھیں ہی اپنی کہر والی کی اپنے غصّے ناعادی بنائی
رکھیا ناسی۔ اوہ ہر گل اُپر اُس کی آکھنا رہنا سی جے ”خبردار! اگر توں ایہہ کم کیتا! خبردار! جے توں
کہر بچوں باہر قدم رکھیا وغیرہ وغیرہ۔“ کہر والی ڈرنی رہی تہ غصّہ منہہ زور تہ بے لگام ہونا
رہیا۔ ایہہ طور طریقہ کئی سالوں تکر چلنا رہیا۔ اک روز کہر والی پیو کے جانے نی اجازت منکن
لگی۔ کہر والے پہلاں نی طراں ہی آکھیا ”خبردار! جے توں کہر بچوں باہر قدم رکھیا۔“

بس فر کہہ سی کہر والی اک ٹپس چر کیتیاں پیر پٹا کنیاں ہونیاں بوہا کھولیا تہ
تہمکی نے انداز بچ آکھیا ”میں ایہہ جائی رہی ہاں ہمت ہے تہ آؤ، مگی روکی تکو۔“
کہر والے واسطے ایہہ نواں انداز سی۔ بس اوہ فر مٹی ہوئی تہ رہی گیا۔

عام طور ور آکھیا جانا ہے جے غصّہ بے وقوفاں کی آوتا ہے۔ شاعر لوک وی اس
گل نی تصدیق کرنے پین۔

عقل سے رہتا ہے کوسوں دُور
نا سمجھ اور نادان ہے غصّہ
بھڑاس اپنی نکال کر بیٹھ جاتا ہے
پھر پچھتاوے کا سامان ہے غصّہ

آہاں جی! اگر ایہہ حقیقت ہے تاں اس حقیقت نا جینا جاگنا ثبوت خود اساہڑی
اپنی ذات ہے۔ جس وی کوئی اُساں کی ”بے وقوف“ آکھنا ہے تہ بس اس طراں
لگنا ہے جے کسے اساہڑی دُکھنی رگ اُپر ہتھ رکھی چھوڑیا ہے۔ اساہڑا خون اُلی جانا
ہے۔ بس اپنے ہتھ تہ اپنے بس بچ کچھ نیمہ رہنا۔ اٹ نا جواب پتھر نال دینے ہاں تہ

اس ویلے توڑیں اُس بندے فی خلاصی نبہہ کرنے ہاں جدوں توڑیں اپنی بے وقوفی خود
اسا ہڑیاں اکھیاں بچ نہ دے۔

ایاں غورنال تکیا جائے تاں غصہ صرف بے وقوفاں کی ہی نبہہ سگوں عقلمنداں تہ
پڑھیاں لکھیاں لوکاں کی وی آونا ہے۔ اُچیاں عہدیاں اُپر بچے ہوئے لوک جس ویلے
گرسیاں تہ مائیک اک دُوے اُپر پھینکنے ہین اُس ویلے اوہ مذاق تہ نبہہ کری رہے ہونے۔
حقیقت بچ غصہ کوئی نکلی جی چیز نبہہ ہے۔ نہ ہی ایہہ کسے مخصوص فرد یا مخصوص مذہب
فی ملکیت تک محدود ہے۔ ایہہ ساری دُنیا نے لوکاں ناسا نچھاسر مایہ ہے۔

اکس شاعر نے مطابق ۔

چاہے کوئی تو روک لے اسے

ہندو ہے نہ مسلمان ہے غصہ

آہاں جی! غصہ پہناویں ہی پل کھڑی نا ہونا ہے مگر ایویں ہی غصہ کسے کی نبہہ
آونا۔ غصہ اُسے ویلے آونا ہے جس ویلے کوئی غصہ چڑھانا ہے۔ تُس ہی دہسو کہ نگ
بچ تہلی جائے تہ نچھ نہ آوے ایہہ گل وی ہوئی سکنی ہے۔ غصہ اصل بچ اک طراں نا
جواب ہی ہونا ہے۔ کئی دفعہ غصہ اک فی طراں پہن کی جانا ہے۔ اس حالت بچ بندہ بغیر
سوچیاں سمجھیاں غصہ کرنا ہے۔ ایہہ ہی غصہ ساریاں غصیاں تھیں پہنیزا ہونا ہے۔
اسے غصے نے بارے بچ اک شاعر نے اکھیا ہے ۔

لاوے کی کان ہے غصہ

خطرہ جان ہے غصہ

تہ اسے غصے نے طفیل متے سارے لوک غصے نے خلاف بولنے رہنے ہین۔
انہاں نے سامنے اگر ایہہ گل آکھی جائے کہ غصہ اپنے آپ بچ اک طاقت ہے تہ اوہ



ایہہ گل مننے نے بجائے آکھنے ہین ۔

ناک پر مکھی نہیں بیٹھنے دیتا

تم لاکھ کہو پہلوان ہے عُصّہ

گجھ بہادر قسم نے لوک تہ چلیج دیئے دینے ہین تہ لکاری تہ آکھنے ہین ۔

آؤ دو دو ہتھ کری تہ تکی ہٹاں

کیہڑے نا کتنا جوان ہے عُصّہ

گجھ ملاں مولوی قسم نے لوک عُصّہ نہ کرنے نیاں ہدایتاں تہ نصیحتاں کرنے

رہنے ہین۔ عُصّے نے نقصان گلنے رہنے ہین۔ اصل بچ ایہہ سادہ تہ شریف لوک ہونے

ہین۔ عُصّے نے بارے بچ انہاں نی جانکاری بڑی محدود چھئی ہونی ہے۔ اوہ اس گل کی پہلی

جانین کہ جس ویلے کہیوسدھیاں انگلیاں نال نہیہ نکلتا، اُس ویلے عُصّہ ہی کم اشنا ہے۔

تکلیا جائے تاں عُصّے نے اپنی جگہ بے شمار فائدے وی ہین۔ لوڑ بس اک ہی گل

نی ہے جے عُصّہ کرنے ہوئیاں تہ عُصّے نال مقابلہ کرنے ہوئیاں اپنی عقل تہ سوجھ بوجھ

کی حاضر ناظر رکھیا جائے۔ اس تھیں علاوہ بشکارتھوڑا جینیا فاصلہ وی رکھیا جائے، اس

واسطے کہ کدھرے ہننے نے بجائے دینے نہ پئی جان۔

سُنی بجھی نی گل ہے کہ اک منتری ہوراں کسے دفتر کی چیک کرنیاں ہوئیاں اُتھے نے

کسے ملازم کی عُصّے بچ چنڈ ماری دتی۔ بس فر کہہ سا۔ اُس بندے پل کہڑی نی دیر کیتیاں بغیر

موڑی چنڈ منتری ہوراں نے منہہ اُپر ماری تہ اتنی زور سنگ ماری کہ منتری ہو رہیاں ہی نہیں گئے

تہ اوہ بندہ انہاں اُپر چڑھی تہ لت چھڑ کرن لگا۔ ایہہ سب گجھ پل کہڑی بچ ہوئی گیا، نالے

کیمرے بچ وی آئی گیا۔ اس گل تھیں ظاہر ہونا ہے کہ عزت عکلیاں بندیاں کی وی پیاری ہونی

ہے۔ اس واسطے عُصّہ کرنیاں ہوئیاں اگلے بندے تھیں ہوشیار وی رہنے نی ضرورت ہونی ہے۔

کچھ لوگ تہ ایہہ آکھنے رہنے ہین کہ ”اساں کی عُصّہ میہ آونا۔ اُس بڑے ٹھنڈے مزاج نے بندے ہاں۔“ مگر ایہہ گلاں صرف آکھنے نی حد توڑیں ہی ہونیاں ہین۔ جس ویلے وی کوئی جنگی مندی گل ہوئی تہ انہاں نا عُصّہ ستویں آسمان اُپر جائی پہنچتا ہے۔

حقیقت بچ انسان نا مزاج کچھ کچھ جذبیاں نا مجموعہ ہونا ہے۔ بندے نے اندر ایہہ جذبے ہی ہونے ہین کہ اوہ کدے رونا ہے کدے ہسنا ہے کدے کسے نال دوستی تہ کدے دشمنی کرنا ہے۔ عُصّہ وی انہاں ہی جذبیاں بچوں اک جذبہ ہے۔ پہناویں جے کوئی اس جذبے تھیں مگر نا ہی رہوے۔ اصل بچ مگر نے نی وجہ ایہہ ہی ہے کہ لوک عُصّے نے بارے بچ پوری جانکاری ہی میہ رکھنے۔ ہر چیز نے دو پہلو ہونے ہین۔ مگر لوک اک ہی پہلو کی پکڑی پٹنے ہین تہ بڑی تنگ نظری نا ثبوت دینے ہین ہور ایہیاں گلاں کی پٹڑے بچ بھی پٹنے ہین۔

بھائی کو بھائی سے لڑا دیتا ہے
ضدی، اڑیل، نادان ہے عُصّہ

جی! منیا کہ عُصّہ ضدی، اڑیل تہ نا سمجھ نادان ہونا ہے مگر پھر کی وی پھر آنے بارے بچ سوچنا چاہی نا ہے نا۔ ممکن ہے کہ پھر اڈاپنے پھر انا عُصّہ دبا ئی رکھیا نا ہووے۔ اصل بچ کچھ ماڑے ریڑے کم عُصّے نے بغیر ہوئی ہی میہ سکے۔ مثلاً جس ویلے کسے تانا شاہ نال پہنا پئی جائے تاں بندہ اُس بیٹیاں مٹناں خوش آمداں کری کری تھکی جائے تہ اُس ویلے عُصّے تھیں بغیر ہو رکیہڑا ہتھیار باقی رہی جانا ہے۔ کسے نا سر تہ پھاڑیا میہ جائی سکنا۔ اُساں کئی کم کانج عُصّے نی مدد نال ہونے تکے ہین۔ کئی بار تہ کسے نا عُصّہ کسے دووے نی طاقت بنی تہ ظاہر ہونا ہے۔ جدوں وی کسے کی عُصّے نال آکھیا گیا کہ ”ایہہ کم تو اہڑے تھیں میہ ہوئی سکنا“ ایہہ تو اہڑے بس ناروگ میہ ہے.....!“ بس اتنا

سُنئیاں ہی سامنے والے کی بہت کچھ کری دہسنے نا حوصلہ بھی جانا ہے مگر انہاں شاعر
لوکاں کی کہہ گلا یا جائے جیہڑے کچھ اس طراں آکھنے ہین ۔
پنّا مُشکل ، ہضم کرنا بھی مُشکل
زہر بھرا پکوان ہے غُصّہ

مگر تکیا جائے تہ غُصّہ پینے نی ضرورت ہی کہہ ہے۔ اپنی اپنی سوچ سمجھ کی حاضر
ناظر رکھی تہ غُصّے نا گھلم گھلا اظہار کرنا دواں فریقاں واسطے نہایت ہی صحت بخش تہ فائدہ
مندوی ہونا ہے۔

طعنہ مہنہ وی غُصّے نی اک قسم ہونی ہے۔ کئی کُہر والیاں اسے قسم نے غُصّے نی مدد
نال اپنے کُہر والیاں کی دوا بیاہ کرانے بچ کامیاب ہوئی گئیاں ہین۔ اسا ہڑے اک
جانکار بندے کی بڑی لڑاکو تہ ضدی کُہر والی سنگ پہنا پئی گیا۔ اوہ ہر ویلے کھلی دُخی سی تہ
آکھنی سی کہ ”ایہہ میں ہی ہاں کہ جس تئی پسند کیتا، تئی کسے ہو رہے پسند ہی نہیہ کیتا۔
ماہڑے نصیب سڑے نے نکلے کہ میں تو اہڑے پلے پئی گئی ہاں۔“ کُہر والے اُس کی
بڑا سمجھایا مگر بے بس ہوئی تہ رہی گیا۔ آخر اُس خاموش رہنے بچ ہی اپنی عافیت سمجھی۔
وقت گزرنار ہیا مگر تیز طرار کُہر والی نے مزاج تہ دستور بچ کوئی فرق نہیہ آیا۔

آخر اک روز اوہ بندہ ہسنی کھیڈ نی اپنی دوئی کُہر والی کی اپنے دواں بچیاں
سمیت کُہر ہنی آیا تہ پہلی کُہر والی کی آکھیا ”توں کھٹی بد نصیب نہیہ ہیں۔“
مختصر گل ایہہ کہ ضروری نہیہ ہے کہ لڑائی چھکڑا تہ کھول کھلیا جائے۔ کسے نے
غُصّے تہ طعنہ مہنہ نا جواب اس طراں وی دتا جائی سکنا ہے۔



تعریف

تعریف تمہیں کون واقف نہیں؟ تعریف تمہیں کون خوش نہیں ہونا تہ اوہ کون ہے
جیہڑا اپنی تعریف نہیں چاہنا؟
ممکن ہے کوئی اک اڈھ بندہ ایہجا نکلی آئے جس کی اپنی تعریف سُننا گوارہ نہ ہووے۔
مگر تکتے تہ سُننے بچ آیا ہے جے زیادہ تر لوک تعریف نے پہنگھے ہونے ہین۔ اکثریت
بچ اوہ لوک ہین جیہڑے اپنی تعریف سُننا بے حد پسند کرنے ہین۔ اتھے تک کہ جیہڑے
لوک سر تمہیں پیر توڑیں آپوں ہی تعریف ہونے ہین، یعنی کہ ہر فن مولیٰ ہونے ہین،
زمانے بچ بڑاناں کمایا ہونا ہے۔ اپنی صلاحیت تہ قابلیت نے بل بوتے پر کئی کئی اعزاز تہ
انعام حاصل کری چکے ہونے ہین، اوہ وی چاہنے ہین جے آخری ساہ توڑیں اُنہاں نی
تعریف تہ توصیف ہونی رہوے۔ مگر مشکل تہ ایہہ ہے جے کتنے ایہجے ہونے ہین
جیہڑے کسے نی تعریف گھلے دل سنگ کرنے ہین۔ تکیا گیا ہے جے تعریف کرنے بچ
لوک بیہوں کنجوسی کرنے ہین۔ تجربہ تہ مشاہدہ دہسنا ہے جے اکثر لوک دُویاں نی بُرائی تہ
تنقید کرنا زیادہ پسند کرنے ہین طراں طراں نے الزام لانے ہین۔ مندا چنگا آکھنے ہین۔
کسے نی اچھائی بچ وی بُرائی نا کوئی نہ کوئی تکتہ لوڑی لینے ہین تہ اس طراں دُویاں نا جینا
مرنا اوہکھا کری رکھنے ہین۔

اسا ہڑے پاسے تہ ایہہ رواج ہے جے پتھر کوئی جینا ہے اُسنی پرواہ مت کرو۔ جتنا ہوئی سکے اُس کی تنگ کرنے جاؤ۔ اُس نے نگ بچ دم کرو تہ جس ویلے مری جائے تاں اُس نیاں تعریفاں نے پُل بٹھنے جاؤ۔ جد کہ حقیقت بچ تعریف نی ضرورت زندیاں کی وی ہونی ہے، مگر جہنیاں کسے نی تعریف نے بجائے تنقید تہ بُرائی کرنے نا نتیجہ ایہہ نکلتا ہے جے لوک دُویاں نال نال اپنا سکھ چھین تہ امن وامان وی تباہ کری چھوڑ نے ہین۔ اس نے برعکس (اوہ کجھ گئے چُنے لوک) گنتی نے دوچار اوہ لوک جیہڑے تعریف نی اہمیت تہ افادیت تھیں واقف ہونے ہین، اوہ نہ صرف خود اک کامیاب زندگی جینے ہین سگوں دُویاں کی وی اک کامیاب زندگی جینے نے رستے اُپر لائی چھوڑ نے ہین۔ بے شک انہاں لوکاں نی تعداد آٹے بچ لون نے برابر ہونی ہے، فر وی انہاں تھیں جو وی ہوئی سکنا ہے اوہ کسے نی جو وی تعریف ممکن ہونی ہے اوہ کرنے ہین۔ اتھے توڑیں وی جے ایہہ لوک اپنے مخالفان تہ دشمنان نے اندر تک چٹا کئی تکی تہ انہاں نیاں اچھائیاں لوڑی لوڑی تہ انہاں نی تعریف کرنے ہین تہ اس طراں دشمنان کی وی اپنا دوست بنائی پٹنے ہین۔

اک تجربے نے مطابق جیہڑے لوک دُویاں کی مندا چنگا آکھنے ہین تہ دُواں کی اپنی تنقید نا نشانہ بنانے ہین تہ کو سنے رہتے ہین، آکھیا جانا ہے جے ایہہ لوک نفسیاتی مرض بچ مُبتلا ہونے ہین تہ دُویاں نی بُرائی کرنے نے کجھے انہاں نا اصل مقصد ایہہ ہی ہونا ہے جے اوہ وی اپنی تعریف تہ توصیف نے خواہش مند ہونے ہین۔

ایہہ ہی وجہ ہے جے بعض سیانے تہ جانکار لوک ایچھے لوکاں نی دکھنی رگ اُپر ہتھ رکھی دینے ہین۔ انہاں نی تعریف تہ توصیف کری تہ انہاں کی مزید کسے نی بُرائی کرنے تھیں بچائی پٹنے ہین، مگر افسوس جے معاشرے بچ ایچھے سیانے تہ جانکار

لوکاں نی تعداد نہایت ہی کھٹ ہے۔ اسے واسطے تہ کجھ لوک اپنے منہ میاں مٹھو بنے رہنے ہین۔

اپنا راگ آپے آلا اپنے رہنے ہین۔ یعنی اکثریت تعریف نی پہنکھی ہونی ہے تہ لوک ہین کہ دویاں نی تنقید تہ بُرائی کی اپنا وصف بنائی چکے ہین۔ کسے کی اپنے گماہنڈی بچ عیب نظر آنے ہین۔ اوہ اپنے گماہنڈی بنیاں سو سو خامیاں گنتا ہے جد کہ حقیقت بچ اپنے نزدیک ترین والیاں بچوں اپنا گماہنڈی ہی سب تھیں زیادہ توجہ تہ تعریف نامستحق ہونا ہے۔ مگر ہونا ایہہ ہے جے اس دؤر پار نے لوکاں سنگ دوستی بنائی رکھنے ہاں مگر اپنے گماہنڈیاں کی نظر انداز کرنے رہنے ہاں۔ دؤر والیاں واسطے دعوتاں نا اہتمام کرنے ہاں تہ گماہنڈی آلی بکھی کندھ چاہڑی چھوڑنے ہاں۔ اس کی کہنلیاں چھوڑی چھوڑنے ہاں۔ کسے گماہنڈی نے کھر عیش عشرت تکی تہ آساں ناسکھ چین اڈی جانا ہے۔ اُس نے کھر بچ مال شال آئی رہیا ہووے تاں بغیر کسے ثبوت تھیں آساں نی شک نی سوئی اُس نی حرام نی کمائی آلی بکھی اٹھی جانی ہے۔ مختصر ایہہ جے پڑوس نے حوالے سنگ آساں نا نقطہ نظر گرے وی چنگا نیہہ ہونا۔ جد کہ گماہنڈی سنگ دوستی پہنائی چارہ خود اساہڑی اپنی پہنائی تہ بہتری نا ضامن ہونا ہے تہ ایہہ اُسے ویلے ہوئی سکنا ہے جے اُس ویلے کو یلے گماہنڈیاں نی تعریف کرنے رہواں تہ اس کی اہمیت دینے رہواں۔

اک خبر نے مطابق اک کھر بچ شادی بیاہ نا کھانا پکٹ رہیا سی۔ کھانے نی خوشبو تہ چلھے نا تھواں گماہنڈی نے کھر بچ جان لگا۔ تھواں اُپر اعتراض ہو یا۔ نتیجے نے طور وردواں بچ لڑائی ہوئی۔ ڈانگاں، سٹیاں چلیاں تہ کئی پہلوان زخمی ہوئے تہ شادی نی تقریب ماتم بچ بدل گئی۔ گماہنڈیاں سنگ آساں نا رویہ تہ نظریہ ہر صورت بچ چنگا ہونا چاہی نا ہے۔ ورنہ گماہنڈی کہہ نیہہ کری سکنا۔ اغوا ڈکیتی تہ چھپی لگی واروی کری سکنا

ہے۔ ترقی نے رستے بند کر دی سکنا ہے۔ اس واسطے ضروری ہے جے گما ہنڈیاں سنگ دوستی پہنائی چارہ رکھنے ہوئیاں ہمیشہ انہاں نی تعریف وغیرہ کہتی جائے۔ تعریف نے معاملے پنج اکثر لوک اپنے کُہر والیاں کی نظر انداز کر دی رکھنے ہیں۔ جد کہ کُہر والیاں کی وی تعریف نی لوڑ ہونی ہے۔ اکثر ماء پیا اپنے بچیاں نی نااہلی تہ نالائق کی کوسنے ہیں۔ ایہہ پہنکی جانے ہیں جے انہاں نی تعلیم تہ تربیت نا بھی گچھ قصور ہے۔ میاں بیوی وی اک دُورے نیاں خامیاں تہ عیب لوڑن لگنے ہیں۔ کدے دُورے اک دُورے نی تعریف کرنا سکھی جان تاں کئی کُہر اُجڑن تھیں بچی جان۔ ایہہ تکیا گیا ہے جے نہہ سوہریاں نی بُرائی تہ بدنامی کرنے پنج لگی وئی ہے تہ ایہہ تھمکی وی دینی ہے جے اپنے آپ کی اُگ لائی چھوڑساں۔ پہاویں مری جاساں مگر انہاں کی جیل پہچائی چھوڑساں۔

ہُن تعریف نہ کرنے نا معاملہ جیہڑا کُہر نے گما ہنڈ تھیں شروع ہونا ہے اوہ اُگے جائی تہ ملکی سطح اُپر قدرے خطرناک صورت پنج نظر آونا ہے۔ اپوزیشن پارٹی حکومت نے کسے چنگے کم نی وی تعریف نہہ کرنی۔ تعریف تہ توصیف کرنا اپوزیشن پارٹی اپنے ایجنڈے پنج شامل ہی نہہ رکھنی ہے۔ اس واسطے قدم قدم اُپر بُرائی تہ تنقید کرنا اپنا فرض سمجھنی ہے۔ حکومت نے ہر کم کی بُرائی نے لیبل پنج پہنکی تہ پیش کرنی ہے۔ حکومت کی نااہل آکھنے ہوئیاں اس نے استعفیٰ نی مانگ کرنی ہے۔ جوابی کاروائی کرنے ہوئیاں حکمران پارٹی وی اپوزیشن پارٹی اُپر حملہ بولنی ہے۔ اس طراں آپس پنج اُلجھی تہ پارتاں عوام کی درکنار کری چھوڑنیاں ہیں۔

حکومت پہاویں لکھ وی پہنڈی ہووے مگر اوہ عوام نی پہنکی تہ اچھائی کرنے نی ہر ممکن کوشش کرنی ہے۔ تاں جے آونے والے الیکشن پنج فر اُس کی کامیابی ملے۔ مگر لوک ہیں جے حکومت نے کم کاج نی تعریف کرنے نے بجائے نکلیاں نکلیاں گلاں تہ

مسئلیاں کی ہنی تہ زوردار احتجاجی مظاہرے کرنے ہین۔ ہڑتالاں کرنے ہین۔ توڑ پھوڑ کرنے ہین تہ آگ لانے ہین۔ ایہہ سب کچھ اصل بچ اسے واسطے ہونا ہے جے لوک تعریف کرنے نی اہمیت تہ افادیت تھیں نا واقف ہین۔

سیاسی پارٹیاں وی اکثر اک غلط فہمی نا شکار رہنیاں ہین تہ اوّل روز تھیں ہی اک دُوے اُپر حملہ آور ہونے کی ترجیح دینیاں ہین۔ اک دُوے نی تنقید کرنیاں ہین تہ چکڑ اُچھالنیاں ہین۔ ہر پارٹی ایہہ سمجھنی وُنی ہے جے دُوئی پارٹی کی مندیاں آکھی تہ اوہ زیادہ تھیں زیادہ عوامی حمایت حاصل کری ہنی۔ جد کہ حقیقت ایہہ ہے جے کسے دُوے نی بُرائی کرن والیاں کی کدے وی کوئی چنگا نیہہ آکھنا ہے تہ تعریف کرن والیاں کی کدے وی مندا نیہہ آکھیا جانا ہے۔ سیاسی پارٹیاں اگر اک دُوے نی بُرائی تہ تنقید کرنا تہ اک دُوے اُپر الزام لانا چھوڑی دین تاں اوہ زیادہ تھیں زیادہ عوامی حمایت حاصل کری سکنیاں ہین تہ زیادہ دُسر سکون حالات بچ حکومت کری سکنیاں ہین۔

آج کل اسمبلی حال تہ پارلیمنٹ ہاؤس بچ جو کچھ تئکنے جو گے لہی رہیا ہے ایہہ سب کچھ اک دُوے نی تعریف کرنے نے بجائے تنقید تہ بُرائی کرنے نا ہی تہ نتیجہ ہے۔ اتھے توڑیں جے بڑے بڑے تہ نمائندہ لوک نکلیاں والیاں حرکتاں کرنے نظر آونے ہین۔ کسے زمانے بچ آکھیا جانا ہے جے اسمبلی حال تہ پارلیمنٹ ہاؤس نے اندر ہونے والی مار جہاڑ تہ غنڈہ گردی والیاں حرکتاں معاشرے بچ بگاڑ پیدا کرنیاں ہین۔ آج کل آکھیا جانا ہے جے اسمبلی ہال تہ پارلیمنٹ ہاؤس نے اندر ہونے والی مار جہاڑ معاشرے بچ بگاڑ تہ منفی اثرات پیدا کری رہی ہے۔ اک دُوے نی بُرائی تہ الزام تراشی کرنے کرنے ایہہ لوک آپس بچ گہٹ پینے ہین تہ گہلندیاں گہلندیاں کہہ کہہ تماشے دہسنے ہین۔ اُنہاں کی کدے کدے کیمرہ وی دہسنے تھیں شرمائی جانا ہے۔ ایہہ سب شاید اسے

واسطے جے لوک تعریف تھیں انجان ہین۔ اس واسطے ضروری ہے جے ایہہ سمجھیا جائے
 جے تعریف کہہ چیز ہے تہ تعریف نی مکمل تعریف تہ وضاحت کیتی جائے۔
 اصل بچ تعریف اک نسخہ کیمیا ہے۔ اک خوبصورت ہتھیار ہے جس کی استعمال
 کری تہ کنیاں مسئلیاں تہ پریشانیاں تھیں بچیا جائی سکنا ہے۔ تعریف اک ایہجا مصالحہ
 ہے جس بچ ہینگ لگے نہ پھٹکڑی۔ کسے کمزور نی تعریف کیتی جائے تاں اوہ بہادر بنی جانا
 ہے۔ بزدل کی حوصلہ ملنا ہے۔ تعریف دشمن کی دوست بنانی ہے۔ بندے نی ترقی نے
 رستے کھولنی ہے۔ تعریف اک ہمدردی ہونی ہے۔ اس نا تعلق بندے نی اصلاح نال
 ہونا ہے۔ خوشامد تہ چا پلوسی کی تعریف نے کھاتے بچ میہ رکھیا جائی سکنا۔ تعریف اللہ کی
 وی پیاری ہے۔ اس واسطے ضروری ہے جے اک صحتمند معاشرے نی تشکیل واسطے
 تعریف کرنے نارواج عام کیتا جائے۔



س

رشتے ناطے کئی طراں نے ہونے ہیں۔ کچھ قدرتی تہ کچھ بنائے جانے ہیں۔ ماء پیو، اولاد، بہنیں، پہراتہ اسے طراں کئی ہو ررشتے قدرتی ہونے ہیں۔ دوست یار بنائے جانے ہیں۔ کوئی شادی بیاہ نہ کرے تہ سس، سوہرا، دیر، جیٹھ، دُرانیاں، چٹھانیاں تہ سالے ہو رسالیاں جے رشتے میہہ بنی سکے ہیں۔

رشتے کچھ لیچے وی ہونے ہیں کہ انہاں ناناں لیڈیاں ہی منہہ مٹھا ہوئی جائے تہ کچھ لیچے کہ کڑواہٹ گہلی جائے۔

اصل بچ رشتے سارے ہی ضروری تہ چنگے ہونے ہیں۔ توجہ تہ احترام نے مستحق ہونے ہیں۔ مگر کچھ رشتے بڑے ہنگامہ خیز، نالے مشہور تہ معروف ہونے ہیں۔ مثلاً متریری ماء تہ سس وغیرہ۔

جتھے توڑیں سس نا تعلق ہے، سس دو طراں نی ہونی ہے۔ اک سس جمائی نی جیہڑی کدے کدائیں ہی نظر آونی ہے یعنی جس ویلے تھی نے کھر بچ نازل ہونی ہے۔ دوئی مشہور تہ معروف اوہ سس ہونی ہے جس نا اک نو نہہ کی مقابلہ کرنا پینا ہے۔ ایہہ سس اک بکھی تہ کسے نی ماء اپنی عزت بٹورنی ہے تہ دوئی بکھی کسے نی سس بنی بدنام ہونے نی حد توڑیں مشہور تہ معروف ہونی ہے۔

دراصل ایسا بھی میہہ ہے کہ ہر سس بُری تہ ظالم ہونی ہے۔ اگر ایہہ گل ہونی تہ فر شائد ہی کوئی کھر آباد ہووے آ۔

اصل بچ سساں ہوں چنگیاں بھی ہونیاں ہیں۔ زیادہ تر کھر سساں فی وجہ تھیں ہی بسنے نہ پھلنے پھلنے ہیں۔ کچھ سساں تہ ماؤ کولوں بھی چنگیاں ہونیاں ہیں۔ بڑیاں ہی ہمدرد، پیاریاں تہ مہربان۔ سکھ تہ آرام دینے والیاں تہ دُعائیاں دینے والیاں۔ ہر سس کی مندیاں آکھنا بڑی بے وقوفی ہے۔ اخلاقی جرم ہے تہ سس فی ذات نال زیادتی تہ نا انصافی بھی ہے۔

اتھے اُس اُس سس نے حوالے سنگ گل کر رہے ہاں جس نے اپنی کارکردگی نال کچھ ایچے اثرات مرتب کیے ہیں تہ کچھ ایچے ٹھوس ثبوت پیش کیے ہیں، جنہاں فی بدولت سس ذات نے اوہ شہرت حاصل کیتی ہے جیہڑی باقی دنی تکر اُس نے نال رہسی گی۔ سس نے نال نال سوہرا بھی ہونا ہے۔ مگر اوہ کسے شمار بچ نیہہ آؤنا ہے۔ سوہرا پہناویں ہی سس نوہہ جیسے چکی نے دواں مضبوط ہواں بچ کھن فی طراں پین ہونا ہے، اوہ کدے مل مین نارول بھانا ہے تہ کدے کدے اُس کی تھالی نا بھینکن بھی بننا پینا ہے۔ مگر فر بھی اوہ اُس شہرت نا پسنگ بھی حاصل نیہہ کری سکیا جیہڑی اک سس نے حصے بچ جانی ہے۔

ایاں تہ سس فی چچھان اُس نیاں ساریاں خوبیاں تہ صفتاں نا پورا پورا علم اک نوہہ کی ہی ہونا ہے۔ مگر مرد لوک بھی اس مشہور ہستی فی کوئی کہٹ جانکاری نیہہ رکھنے ہیں۔ اک بندے کولوں کچھیا گیا کہ سس فی چچھان کے ہے تہ اوہ بندہ چھٹ چھٹ بولیا ”جس اپنے کھر والے کی ساری عمر منہ نہ لایا ہووے، مگر نوہہ کولوں ایہہ اُمید رکھے کہ نوہہ اُس نے پتر نے پیر تھوئی تہ پیئے تہ اُس کی زندگی نا ہر سکھ دے، اوہ سس ہے۔“ مزید وضاحت کرنے ہوئیاں انہاں آکھیا ”جس اپنے سس سوہرے کی اک اکھی نال نہ تکیا ہووے تہ نوہہ کولوں ایہہ اُمید رکھے کہ اوہ جی جان نال اُس فی سیوا تہ خاطر داری کرے، اوہ سس ہے۔“

اک جگہ دو چار نوہواں بیٹھیاں آپس بچ اپنی اپنی سس فی زیادتیاں نارونا
 رورہیاں سن۔ کول ہی بیٹھا اک ہشیار جیہا بچہ ماؤ کی کچھی بیٹھا ”ممی ممی! ایہہ سساں
 آنیاں کدھروں ہین۔ کس فیکٹری بچ تہ کس چیز نال بنیاں ہین۔ میں بڑا ہوئی تہ اس
 فیکٹری کی ساڑی دیساں گا۔“

ہن اُس بچے کی کہ پتہ کہ سساں فیکٹری بچ نہیہہ بلکہ اسے زمین اُپر ہسنے بسنے
 کھراں بچ تیار ہونیاں ہین تہ سس فی زیادتیاں نارونا رونے والیاں ہی اگے جائی تہ سس
 بنی جانیاں ہین۔

ویسے سس تہ ماء وی ہونی ہے تہ ماء نے رُتے تھیں کس کی انکار ہے۔ لفظ ماء
 آکھنیاں ہی منہہ بچ مٹھاس پھری جانی ہے۔ تہیاں پتر ٹکے ہوؤن یا بڑے ماء
 ساریاں واسطے اک اہم تہ مقدس ہستی ہونی ہے۔ جیہڑی اپنے بچیاں کی ہر سکھ تہ آرام
 دینی ہے۔ ہر سہولت دینی ہے۔ نصیحتاں تہ ہدائتاں دینی ہے۔ اپنے بچیاں نے مستقبل
 واسطے فکر مند ہوئی ہے۔ دُعاواں دینی ہے۔

ایاں تہ ماؤ نے قدماں بچ جنت ہونی ہے۔ مگر قدماں تھلے جنت رکھنے فی دعویدار
 ایہہ ہی ماء جس ویلے سس نے روپ بچ ظاہر ہونی ہے اُس ویلے اوہ اپنی جنت کی اپنے
 پیراں تھلے روندنی نظر آونی ہے۔ کھر بچ نہیہہ نے آونے اُپر اوہ ڈکٹیٹر بنی جانی ہے۔ اپنے
 نال نال ہوراں ناجینا وی اوکھا کری چھوڑنی ہے۔ اوہ اپنیاں گلاں باتاں تہ طور طریقیاں نال
 نوہیہہ کی دہسنی ہے کہ اس کھر بچ اگر کوئی پاورفل ہستی ہے تہ اوہ خود اُس فی اپنی ذات ہی ہے۔

اُس نے تہیاں پتر ہی میہہ بلکہ کھرے نے باقی سارے لوک بھی اُس نے رحم و
 کرم اُپر ہین تہ میاں جی وی اُس نے سامنے ہتھ بدیاں کھلے رہنے ہین۔ لہذا اُنہواں کی
 وی سس نے سامنے صرف نظراں ہی میہہ تھلے رکھنیاں ہین بلکہ سر وی جھکائی رکھنا

ہے۔ زبان کی تالانتہ اٹھائیں اور مہر لائی رکھنی ہے۔ صرف ہتھ پیر کھلے رکھنے ہیں، کھر بار نے کم کاج واسطے تہ سس اماں نی سیوا تہ خاطر داریاں کرنے واسطے، کیاں کہ نہہ نے جس خوبصورت کھر کی اپنے واسطے چڈیا ہے تہ ڈولی بچوں نکلی تہ جس کھر بچ اپنے قدم جمائے ہیں اوہ سارے ناسارا سس اماں نا بنایا تہ سجایا ہو یا ہے۔ میاں تہ انہاں نے اعلیٰ درجے نے فضول خرچ رہے ہیں تہ آج وی ہیں۔ کھر بچ جس چیز نی ضرورت نیہہ اوہ وی چکی لئی آونے ہیں مگر صبر تہ تحمل نی دولت سنگ مالامال ایہہ تہ سس اماں ہی ہیں کہ جہاں پائی پائی جوڑی تہ ایہہ خوبصورت کھلا، کشادہ تہ پھر یا نا کھر بنایا ہے جیہڑا جے سن مقدر سنگ انہاں نی نہہ کی نصیب ہو یا ہے۔ جس بچ اوہ رہنیاں ہو یا عیش عشرت کرسی گی راج کرسی گی تہ دُعاواں دیسی گی، صرف سس اماں کی کہ جس نی بدولت اُس کی ایہہ بنایا کھر ملیا۔ جد کہ سس اماں نی جگہ کوئی ہو رہونی تہ ایہہ کھر آج جیسا پھر یا تہ پھنگیا نا نہ ہووے آ۔ بلکہ دانے دانے کی محتاج ہووے آ تہ آج اس کھر نی نہہ افسوس کرنی، روئی تہ اپنے نصیباں کی کوئی ہووے آ۔ ایہہ تہ سس ہو رہی سن کہ جہاں اپنے سلیقے تہ عقلمندی سنگ اپنا کھر نہ صرف بسایا تہ بنایا بلکہ اس نا کونا کونا بھی سجایا تہ اپنے سارے کنبے قبیلے نیاں خاطر داریاں بھی کیتیاں تہ آج نہہ کی اپنے اس پھرے پھنگے کھر بچ لانے والی بھی اوہ خود ہی ہیں۔ انہاں نا پتر تہ اس بیاہ واسطے منی ہی نیہہ سی رہیا۔ آکھناسی ”ایہہ بھی کوئی گروی ہے جس نال بیاہ کیتا جائے“۔

تہ پتر اسٹراں کیاں نہ آکھے آ۔ اُس کی تہ چنگی تھیں چنگیاں گرویاں لہمی رہیاں سن۔ مگر ایہہ سس اماں ہو رہی سن کہ جہاں آکھیا ”ایہہ ہی گروی چنگی ہے۔ ماڑی تہ کنزور ضرور ہے مگر ماہڑے پھرے پھنگے کھر بچ کھائی پئی تہ چنگی صحت مند ہوئی جاسی گی۔

ہُن سس اماں نی ایہہ لمی چوڑی تقریر تہ اسے طراں نیاں کئی گلاں باتاں سنی تہ

نہہ واسطے ضروری ہونا ہے کہ اوہ کھر نی اس پاورفل تہ مایہ ناز ہستی نا اپنے دل نیاں گہرائیاں نال احترام کرے نال ہی اس نی احسان مندر ہوے کہ جس اس کی پسند کری تہ آندا ہے۔ البتہ اگر کوئی نہہ اپنی نا سمجھی نی وجہ تھیں اس مایہ ناز ہستی نیاں گلاں تہ اشارے کنایے سمجھنے بچ ناکام وئی ہے تہ اتھوں ہی اس نی بد بختی شروع ہوئی جانی ہے۔

سس نی اہمیت تہ شہرت اس گل بچ بھی مضمر ہے کہ نہہ نے آونے اُپر اوہ کھر نا کوئی کم کرے یا نہ کرے اس کی اختیار حاصل ہونا ہے۔ مگر اوہ اپنے کچھ خاص خاص کم بخوبی نبھانی وئی ہے۔

سرکاری تہ غیر سرکاری اداریاں نے ملازم اپنے اپنے فرض انجام دین بچ غفلت کرن تہ پئے کرن ہیرا پھیری کرن تہ پئے کرنے رہن مگر سس پھٹکی تہ وی اپنے خاص کماں کی نبھانے تھیں باز نہہ وئی ہے۔

ہر سس نے خاص خاص کم تہ خاص رول اپنے اپنے ماحول تہ ضرورت نے تابع ہونے ہین۔ انہاں نی تعداد مقرر تہ مکمل نہہ ہونی۔ ایہہ سس نی ذات اُپر منحصر ہے کہ اوہ اپنی توفیق نے مطابق جتنا چاہے نبھائی سکنی ہے تہ طول بھی دتی سکنی ہے۔

بہر حال کچھ خاص خاص کم اس طراں نے ہونے ہین:

نہہ کی کھوریاں نظراں سنگ تکلنا تہ کنکھیاں تکلنا۔ اشاریاں، کنائیاں بچ گلاں کر نیاں کم کاج بچ نقص کڈھنا۔ دُوے کھر نی نہہ نیاں اچھائیاں نا ذکر کرنا تہ اس نیاں صفتاں کر نیاں۔ پُتر نال گوشیاں گوشیاں بچ گلاں کر نیاں۔ مثال نے طور اُپر نو نہہ تیز طرار ہے، فضول خرچ ہے تہ کچھ اسے طراں نیاں گلاں تہ شکایتاں اپنے کھر والے نے کٹاں بچ بھی بسائیاں (باہنیاں)۔ اوہ گماہنڈن جس نال ساری زندگی ان بن رہی اس نے نال دوستی کری کدے اس کی اپنے کھر بکائی ہتا تہ کدے آپو اُسے نے کھر توڑیں جانا۔

دوئیاں تریاں گماہنڈناں کی وی نہہ نیاں چنگیاں مندیاں گلاں تھیں واقف کرانا۔ مثال نے طور اُپر ”پہینے کے کجھنی ہیں۔ میں تہ حور نے بجائے لنگور لئی آئی ہاں۔ پورے پھائی میٹر نی جیہہ ہے اس نے منہہ بچ۔ ذرا ذرا گل اُپر تک ناساں چڑھائی ہئی ہے۔ میں تہ کجھ عرصہ مکنی ہاں اپنے منڈے کی دوا بیاہ کراساں گی.....!“ اس تھیں علاوہ نہہ نی کوئی گل چنگی لگے یا اوہ شکل صورت تھیں چنگی ہووے تاں وی اُس نی تعریف نیہہ کرنی، محض اس واسطے کہ نہہ بگری نہ جائے۔ نہہ کتھے کتھے جانی ہے۔ ہُو بچ لگے رہنا پیو کے والیاں نے طعنے میعنے دینے، کتے تہ نکھٹو ہین۔ داج نہ نے برابر دتا ہے نے۔ اپنی برتری تہ اچھائی کی اُچھالنا، اشاریاں بچ گلاں کرنیاں نہہہ کی بیاہی آنے نا احسان جتلانا، اُس نے خلاف جانے والی گل کی اُچھالنا نہہہ نے حوالے سنگ کوئی موضوع تھکھنا ہووے تہ اُس کی ہوا دینا تہ بلنی اُپر تیل باہنے نام کرنا وغیرہ وغیرہ۔

ہر حال ہر کمال کی زوال دی ہوتا ہے۔ اسے گل نے برابر اک سس اپنا رول نبھانیاں بلیں بلیں مگر لگاتار اپنی ساری پاور ہنر تہ سارے کمال اپنی نہہہ نے حوالے کرنی دئی ہے تہ اک دن اپنی اچانک موت نی وجہ ناں ساریاں کی مٹھٹکارہ دینی ہے یا فراس گل نے بجائے اُس نے زوال نے دن آوے شروع ہوئی جانے ہین۔ اوہ بلیں بلیں کمزور تہ بڑھی ہونا شروع ہوئی جانی ہے۔ جسم اٹھنے تہ بیٹھنے نے اہل نیہہ رہنا۔ ہتھ پیر کم کرنے تھیں رہتی جانے ہین۔ دند اک اک کری تہ ساتھ چھوڑن لگ پینے ہین۔ کھانے پینے نے مسئلے انی لگنے ہین۔ اکھیاں نی لوہ کمزور ہونیاں ہونیاں غائب ہی ہوئی جانی ہے۔ اک تھیں بعد دوئی بیماری حملہ کری ہئی ہے۔ کدے لقوہ تہ کدے فالج بے بس کری تہ رکھنا ہے۔

اس طراں کجھ عرصہ پہلاں تک ہر ظلم و ستم جھلنے والی نہہہ نے دن بھر ن لگنے ہین۔ ہُن اوہ اپنا سراپا کری تہ ٹرن لگنی ہے۔ اُس نے اوٹھ ہلن، مسکران تہ جیہہ چلن لگنی

ہے۔ ستائی ہوئی نہہ اپنے بال بچے کی بھی آگاہ کری دینی ہے کہ اس چڑیل کولوں دُور ہی رہو۔ اپنے وقت بچ اس مگی بڑا ستایا ہے۔

اُس ویلہ چوڑھی کھرنے کسے گھند کو نے بچ بیٹھی نی یا فر کسے کھٹ گھٹلے اُپر بیٹھی نی بڑھی کھرنے اک اک بندے واسطے تر سنی ہے۔ ”کوئی تہ ہووے جیہڑا اُس نال گل کرے، پہناویں پل دو پل ہی سہی، اس نے کول کوئی بہوے۔ اس نا حال چال چکھے۔ اُس نے دُکھ درد تہ تکلیفاں دُور کرے.....!“

اس حال تک بچیاں بچیاں اوہ سسو والا دبہ بہ تہ ططنہ کدے ناں واسطے وی باقی میہ رہنا ہے۔ اوہ اپنی کیتی کرنی سب پہنکی بیٹھی ہونی ہے۔ اُس نے کھرن بچ تہ دُنیا بچ کے گجھ ہوئی رہیا ہے اُس نی بلا جانے! اوہ تہ بس اپنی جان نے مسئلے مسائل، تکلیفاں تہ ضرورتاں بچ کھیری نی ہونی ہے۔

دھک دھک اندر باہر ٹرنی پھرنی تہ بچ کد کرنی نہہ کی تکی تہ دل دل بچ آکھنی ہے ”تو وی تہ اک دن ماہرے حال کی بکھیں گی۔ ایہہ تہیاڑے تو اہڑے اُپروی آوسن گے۔ تگی ہنیاں!“

کھرن آنے جانے تہ ملنے ملانے والیاں کی اپنی اک اک تکلیف دہسنی ہے۔ گلے شکوے کرنی ہے تہ اگر تھوڑی بہتی ہوش و حواس بچ ہووے تہ صبر شکر کرنا سکھی گئی ہووے تہ بس خاموش تہ چپ چاپ رہنی ہے۔ سب گجھ اللہ اُپرٹی چھوڑنی ہے۔ اُتھے ہی پیاں پیاں اک دن پوری ہوئی جانی ہے۔

باقی رہی جانیاں ہین کھٹیاں مٹھیاں گجھ گلاں تہ گجھ یاداں!



نگ

نک انسانی جسم نہایت ہی اک اہم حصہ ہے۔ ہر انسان نے چہرے و رٹوان
وَن نی صورت بچ اک عدد نک نمایاں طور ورا بھریا ہو یا اپنے وجود نے ہونے نا کھلم
گھلا اعلان کرنا نظر آوتا ہے۔

نمایاں ہونے نے کارن لڑائی چھگڑے تہ دنگے فساد نے موقعیاں ورا کٹر کم آوتا
ہے۔ نک نہ صرف سو گھنے تہ ساہ پنے نے کم آوتا ہے بلکہ اس سنگ ٹس آونے والے
خطرے نی مُشک وی محسوس کری سکنے ہو۔ اس تھیں علاوہ وی نک نا بکھ بکھ طریقیاں
سنگ استعمال ہونا ہے۔

کالسریاں عام طور ورا نک بچ نتھ تہ کوکا باہی تہ اپنے حُسن کی دُگنا کرنیاں
ہین۔ نک نی سیدھ بچ چہر کڈھنیاں ہین تہ عینک نے ضرورت مند لوک اس ور عینک
اڑکانے ہین۔ گجھ لوک تہ نک کی چھولے چہوانے واسطے وی استعمال کرانے
ہین۔ کیاں جے دندان سنگ صرف لوہے نے چھولے ہی چہوائے جاسکنے ہین۔
اگر کسے توڑیں کم پئی جائے تہ اُس نے اگے نک دگر یا وی جائی سکنا ہے۔ اگر
ٹس غصے نا اظہار کرنا چاہو تہ نک جھکلی وی سکنے ہو۔ نک بچ دم کری سکنے ہو۔ اگر
غصہ دبایا نہ جائی سکے تہ اوہ نگ اُپر تہر یا جائی سکنا ہے۔

مہینیاں تہ سالان ناچکرا اُکھیاں نی لوہ ختم کری دینا ہے۔ دندا اک کری تہ
جُدا ئی ناصدمہ دین لگ پینے ہین۔ کن سُننے بجھنے تھیں لا پرواہ ہوئی جانے ہین، مگر نک
آخری دم توڑیں اپنی جگہ اُپر قائم تہ دائم رہنا ہے۔

پرانے زمانے بچ جس ویلے قطب نما ایجاد نہیہ سی ہو یا ناتہ لوک سدھا رستہ
چلنے واسطے نک نی سیدھ بچ چلنے نی تاکید کرنے ہونے سن۔ بچھ مارنے تہ نہ مارنے نا
پورا اختیار نک نے جھے بچ آونا ہے۔ غرض اک نک تہ ہزار فائدے، مگر ایہہ گل
بڑے افسوس نی ہے جے اسا ہڑے شاعراں تہ ادیبوں نے نک کی بہت کہٹ
تکلیف دتی ہے۔ جد کہ چہرے نے دُوے ہصیاں کی مثال نے طور وراوٹھ اُکھیں،
زُلفاں پُہر مئے رواٹھے وغیرہ ہمیشہ تھیں شاعراں تہ ادیبوں نی نیک توجہ نا مرکز بنے
رہے ہین تہ نت نویں کہانیاں افسانیاں تہ شعراں کی جنم دینے نا ذریعہ بنے ہین۔
شاعراں تہ ادیبوں اگر کدے کسے نک نا ذکر کیتا وی ہے تہ صرف سکھونک کی ہی
گجھ اہمیت دتی ہے حالانکہ شریقی اُکھیاں نرگسی اُکھیاں تہ نیلی اُکھیاں نی طراں نک
نیاں وی درجن ساریاں قسماں ہین۔ طوطی نک وی نک نی اک اعلیٰ قسم ہے۔
پہاویں ہی ایہہ طوطے نی طراں رنگدار نہیہ ہونا ہے، مگر اس نی بناوٹ قطعی بکھری وی
نہیں ہونی ہے۔ مٹھے تھیں ہتی تہ نوک تک طوطے نی چنچ نی طراں گول گول نک رکھنے
آلے لوگ خاص کاروباری ذہن نے مالک ہونے ہین۔ تجارت تہ سیاست نے میدان
بچ لگا تار ترقی کرنے رہنے ہین تہ ہر گل بچ اپنے ذاتی فائدے کی مد نظر رکھنے ہین۔

نادر شاہی نک وی نک نی اک خاص قسم ہے تہ عروج نا حامل ہے۔ لہٰذا
نک خوبصورتی نا ضامن ہونا ہے تہ نادر شاہی نک کی خوش بختی نی علامت سمجھیا
جانا ہے۔

کچھ لوک چڑے تہ تہستے ہوئے نک کی ناپسندیدہ نظراں سنگ تکلے ہین تہ رائی
برابروی اہمیت میہ دینے ہین۔ جد کہ حقیقت ایہہ ہے کہ نک کبجادی ہووے تہ کتنا ہی
ڈنگا کیّاں نہ ہووے اس نی حفاظت تہ احترام بے حد ضروری ہے۔ بے شک چہرے
نے دُورے جھٹے مثلاً اکھیں کن تہ اوڈھ دودو ہین مگر اک عدد نک ہی اکثر نک بچ دم
کری چھوڑنا ہے جے دُورے نک نی خواہش ہی نہیں وُنی ہے۔

کچھ لوک تہ ہر گل کی اپنے نک نامستلہ بنائی رکھنے ہین تہ اپنے نک اُپر مکھی
وی میہ بہن دینے۔ مگر ایہہ وی اک حقیقت ہے جے کجھاں نانک ہی اتنا گندہ ہونا
ہے جے مکھی آپوں ہی بہنا پسند میہ کرنی۔ کجھاں لوکاں نی آن بان تہ ساری نی ساری
شان نک بچ ہی انکی وُنی ہے۔ ایچے لوک نک نی سلامتی تہ حفاظت واسطے گلے
توڑیں کٹنے کٹوانے اُپر لک بٹھی رکھنے ہین۔ تکیا گیا ہے جے دُنیا بچ فتنے تہ فساد تہ
لڑائی چھگڑے صرف تہ صرف نک نی بدولت ہی ہوئے ہین۔ ہر دو فریق اپنے
اپنے نک نی برقراری واسطے آخری دم توڑیں لک بٹھی رکھنے ہین۔ خاصاں تہ
عاماں دواں کی ہی نک نی خاطر پا پڑیلینے پینے ہین کیّاں جے کوئی وی نک
کیّا اُکھوانا پسند میہ کرنا ہے۔

جس طراں ہر انسان تہ حیوان نے چہرے اُپر اک عدد نک ہونا ہے اسے طراں
ہر خاندان ناوی اک مخصوص نک ہونا ہے۔ ایہہ نک ساریاں نگاں تھیں زیادہ اہمیت
نا حامل تہ حساس نک ہونا ہے۔ ایہہ کدے بہوں اُچا ہوئی جانا ہے تہ کدے نیواں تہ
بد قسمتی سنگ کدے کدے بالکل ہی کپٹن جانا ہے۔ مگر ابجھا ہونے نی نوبت ہی بہوں
کہٹ آون وُتی جانی ہے۔ کیّاں کہ اس نی پلاسٹک سرجری میہ کرائی جائی سکنی۔ اس
واسطے اس نی حفاظت بچ بڑی چوکسی برتی جانی ہے۔

اس فی سالمیت کی برقرار رکھنے تہ اس نے حدود و اربعہ کی مزید وسعت دینے واسطے دوتیاں ضرورتاں کی چھ کڑی تہ بخت ناک بڑا حصہ اس ور خرچ کیتا جانا ہے۔

خاندانی نک نے عتاب ناشکار زیادہ تر تھواں تہ تہیاں ہونیاں ہین۔ داج نہ لہنے فی صورت بچ خاندانی نک بچ جیہہ افرق پینا ہے اس نابدلہ تہہ کی اُگی بچ ساڑی ہندہ اجانا ہے۔ خاندانی نک کی نیواں کرنے والی تہی نا انجام وی داج نہ آنے والی تہہ نے انجام تھیں بکھرا تہہ ہونا۔ صرف ایہہ ہی تہہ اس نک فی برقراری واسطے جتنے ظلم تہ ستم تہائے جانے ہین انہاں تھیں کئی گنا زیادہ سہے تہ چھپائے وی جانے ہین۔

خاندانی نک چہرے نے نک فی طراں زور آور تہہ ہونا جے کسے فی تہی کٹی جنگ پھٹی تہ رکھی چھوڑے۔ بلکہ ایہہ موم فی طراں نرم تہ نازک ہونا ہے۔ ذرا وی گرمی لگنے اُپر گلی جانا ہے۔ اس واسطے اس کی ہر طراں فی گرمی تھیں محفوظ رکھنے واسطے بڑے جو کم تھنگے جانے ہین۔ در پردہ قتل ہونے ہین۔ ارماناں نے خون ہونے ہین۔ خواہشاں زخم بنی تہ سپیاں بچ دفن ہونیاں۔ ایہہ ہی وجہ ہے جے خاندانی نک فی بچ ور ہمیشہ سُرخ چھائی دینی ہے۔

تکلیا گیا ہے جے سیاستداناں نا سرے تھیں ہی کوئی نک تہہ ہونا ہے تہ اوہ آزادی سنگ کدے وی گھومی پھری سکے ہین۔ ایہہ ہی وجہ ہے جے اوہ کدے اک پارٹی بچ تہ کدے دوئی پارٹی بچ اُپے ہوئی تہ بولنے نظر آونے ہین۔ کدے تہ سی۔ ایم فی گرسی اُپر جلوہ افروز ہونے ہین تہ کدے کورٹ کچہری نے چکر لائی تہ جیلاں کی وی رونق بخشے ہین۔



ٹیرھاپن

اَساں کی اعتراض ہے اُنہاں لوکاں ورجیہڑے گتے کی اس نی ڈھنگی پہنڈھی دُم
ناطعنہ دینے ہین۔

اسا ہڑے اعتراض کرنے نی پہلی وجہ تہ ایہہ ہے کہ ہُن اَس عمر نے اس موڑ ورجیہڑے
نے ہاں کہ جتھے انسان اعتراض کرنے تھیں علاوہ ہور کوئی کم کری ہی نیہہ سکنا۔

بچپن بچ انسان اعتراض نے باوجود اپنی مرضی سنگ نچنا کد ناتہ کھانا پینا ہے۔
جوانی بچ بچہ تہ گجھ بھوں ہی من مانی کرن لگنا ہے۔ اتھا تکر کہ اعتراضات نے باوجود
خود کشی کرنے تھیں وی باز نیہہ رہنا۔ مگر بڈھیمے بچ بچہ تہ سر پیر تکر آپ اک اعتراض
بنی جانا ہے۔ اللہ نے فضل و کرم سنگ اَس اس منزل کی پائی چکے نے ہاں تہ انسانی
فطرت نا ایہہ تقاضا وی ہے کہ انسان کی گجھ نہ گجھ کرنا رہنا چاہی نا ہے۔ اس لحاظ سنگ
اَس اپنے آپ کی اعتراض کرنے بچ حق بجانب سمجھنے ہاں۔

ایہہ تہ اسیں جانے ہاں کہ گتے کی اکھیں، نکت، گن تہ دتد سب گجھ ہی ہونا ہے۔
نکت تہ بے حد مثالی ہے جیہڑی خفیہ معلومات حاصل کرنے بچ ماہر سمجھی جانی ہے تہ دتد
گجھ بھوں ہی مثالی تہ اہمیت نے حامل ہونے ہین جیہڑے نہ صرف پنیاں کی گد گدانے
ہین بلکہ ہڈیاں کی سُر مہ بنانے نی صلاحیت وی رکھنے ہین۔ مگر لوکاں کی نظر آئی تہ صرف
دُم.....!

ادبیاں سنگ کوئی گلہ میہ، کیاں کہ انہاں جتھا گئے فی ٹیڑھی دُم ناؤ کرکیتا ہے
اُتھا ہی کُتیاں فی نفسیات کی وی جانچیا، پرکھیا ہے تہ کُتیاں کی ادب بچ انہاں ناجائز
مقام وی عطا کیتا ہے۔

مگر عجب گل ایہہ ریتی ہے کہ کسے شاعر کی اگر گُتے نے گن، اُکھیں، نگ تہ دُتہ
نظر میہ آئے تہ دُم وروی نظر میہ پئی۔ خورے اس واسطے کہ شاعراں کی ہمیشہ نیلا ہی نیلا
نظر اچھنا ہے۔ اُکھ زگس فی قد سرونا، گردن صراحی فی راگ بلبل ناتہ چہرہ گلاب نا۔
مگر عام لوکاں کی گُتے فی دُم تھیں علاوہ ہور کجھ نظر ہی میہ آونا۔ کہہ پتہ کہ اگر گُتے
فی دُم سدھی ہونی تہ اُس فی وفاداری جیہڑی اوہ قدیم زمانے تھیں حضرت انسان سنگ
برتنا آیا ہے نہ ہووے ہے۔

انسان تہ انسان نا وفادار ہونے تھیں رہیا۔ کدے وی کسے کُہر والی یا کُہر والے
کی وفاداری نے ثبوت نے طور وری پیش میہ کیتا۔ کدے وی کسے ایہہ میہ سُنیا کہ
دوست پُہر ایا گمہانڈی وفادار ہونا ہے۔ وفاداری نے ثبوت نے طور وری کدے وی کسے
ملازم یا نوکر کی پیش میہ کیتا ہے۔ اُساں تہ کدے ایہہ وی میہ سُنیا کہ اولاد وفادار ہونی
ہے، اگر سُنیا تہ اوہ ایہہ کہ اولاد جائیداد فی وارث ہونی ہے تہ اولاد کی فرمانبردار بنانے
واسطے طراں طراں نے حربے آزمائے جانے ہین۔ اچھے اچھے سبق پڑھائے جانے ہین
'مگر کُتیا بغیر کسی محنت ہور ریاضت نے تہ بغیر کسے حربے تہ معاوضے نے آخری دم تکر
وفاداری نبھانا ہے تہ جس ویلے موت آونی ہے تہ اوہ آپوں ہی مالک نے کُہر تھیں دُور
ویرانے بچ جانا اُٹھی ہے۔ اس خیال سنگ کہ مالک کی اس فی لاش چھنگنے فی تکلیف نہ
ہووے۔ فروی انسان اس گل تھیں پریشان ہے کہ گُتے فی دُم ٹیڑھی۔

کیاں دوڈیاں نیاں خامیاں کی اُچھالنا، کسے فی گل کُتیا، گروپ بندی کرنا، لگائی

بجھائی کرنا، تاک جھانک کرنا، رائی نا پہاڑ بنانا، دوئیاں نی آپسی دوستی کی برداشت نہ کرنا، کسے نی گل نامذاق اُڑانا، ایجا ہسا ہسا جس بچ دوئیاں واسطے نفرت ہووے، دوئیاں کی خواہ مخواہ شک بچ بتلا کرنا، دوئیاں نے عیب گنتا تہ اپنے عیاں ور اُچی آواز نال پردہ باہنا، دوغلا پن برتنا تہ اسے طراں نیاں کئیں ہو رگلاں انسان نے ٹیڑھے پن نیاں علامتاں نیہہ ہین۔

مگر انسان ہے کہ اس کی ٹیڑھا پن گتے نی دُم بچ ہی نظر آوتا ہے۔ اتھا تکر کہ کسے وروی غصہ آیا تہ حوالہ گتے نی دُم نا ہو رتکلیا جائے تہ ایہہ حوالہ وی کتنی سخت جان چیز ہے۔ انسان مرکپ جاسی گا، صدیاں گزری جاسن گئیاں، مگر حوالے جان نیہہ چھوڑن لگے۔ تاریخ کی سبجیکٹ نے طور ورا سے واسطے مشکل سمجھیا جانا ہے کہ اس بچ حوالیاں سنگ دوچار ہونا پینا ہے۔ لیاں تہ حوالیاں نے حوالے سنگ بھوں گجھ یادوی رہنا ہے مگر جدوں حوالیاں بچ تھدا آوتا ہے تہ تاریخ نے طالب علم نس پینے ہین ہو ر جیہڑا تاریخ تھیں نٹھا، اس نی پہچان گئی۔

پہچان واسطے ضروری ہے کہ اس کی زندہ تہ برقرار رکھیا جائے۔ لیاں تہ پہچان نے طور ورا سب تھیں پہلاں ناں کی ہی اہمیت دتی جانی ہے مگر گجھ لوک اپنی پہچان واسطے اپنے بزرگاں نا حوالہ دینے ہین۔ کالسریاں نی پہچان دوواں حوالیاں سنگ ہونی ہے۔ ڈاٹراف یا فر وائف آف۔ انہاں تھیں علاوہ اگر کوئی کالسری اپنی پہچان آپوں بنائے تہ اس نی مرضی مگر اکثر کالسریاں مذکورہ حوالیاں سنگ پہچانے جانے بچ اپنی عافیت سمجھدیاں ہین۔

تاریخی حوالیاں تھیں ہٹی تہ تکیا جائے تہ ادب بچ حوالے بڑے کار آمد ثابت ہونے ہین۔ کیاں کہ حوالیاں نے حوالے سنگ اک نویں کتاب تیار ہوئی جانی ہے تہ اس

طراں کوئی وی بڑی آسانی سنگ صاحب کتاب یعنی کہ مصنف ہونے نا اعزاز حاصل کری
سکنا ہے۔

بے شک حوالیاں فی اہمیت ہو رافادیت اپنی جگہ مسلم، مگر کوئی گتے فی دُم نا حوالہ
دئے ایہہ اساں کی بے حد نا گوار گز رنا ہے۔ جی ٹیڑھا پن اپنیاں اکھیاں بچتہ حوالہ گتے
فی دُم نا.....!

آکھیا جانا ہے کہ ٹیڑھا پن دو طراں نا ہونا ہے۔ اک اوہ جیہڑا نظر آونا ہے اپنے
آپ کی وی تہ دوویاں کی وی۔ ایہہ قابل علاج ہونا ہے تہ اس گلوں خطرناک نیہہ سمجھیا جانا۔
جد کہ دوے ٹیڑھے پن واسطے مشہور ہے کہ اوہ نظر نیہہ آونا۔

بالکل اسے طراں جس طراں کسے کی اپنی اکھ نا ٹیڑھا پن نظر نیہہ آونا۔ ایہہ نا
قابل علاج وی ہونا ہے تہ اسے واسطے خطرناک سمجھیا جانا ہے۔ آکھیا جانا ہے کہ کسے نے
ٹیڑھے پن کی درست کرنا نہایت ہی اوکھا کم ہونا ہے۔ کجھ لوک کسے نے ٹیڑھے پن
کی پہاویں اوہ گتے فی دُم نا ہووے یا کسے فی ذات نے اندر چھپیا نا ہووے برداشت
نیہہ کری سکے تہ اس کی سدھا کرنے واسطے جھٹھی جانے ہین۔ مگر کامیاب ہونے نے
بجائے آپ ہی ٹیڑھے پن نا شکار ہوئی جانے ہین۔ لہذا انسانیت نا تقاضا ایہہ ہے کہ
کسے نے ٹیڑھے پن کی ٹیڑھا ہی رہن دتا جائے۔ پہاویں اوہ کسے نے اندر ہووے
یا پہاویں گتے فی دُم نا ہووے۔

اساں نا اعتراض اگر کسے کی مندالگے تہ اس کی وی اساں فی ذات نا ٹیڑھا پن
سمجھیا جائے، مگر گتے فی دُم نا حوالہ.....! اللہ فی پناہ.....!



جوتا

جوتے نی اہمیت تھیں کس کی انکار ہے۔ جوتا ہر زمانے بچہ تہ ہر دکھ سکھ بچ لوکاں
ناسنگی ساتھی تہ سہارا رہیا ہے۔

بندہ بنگے سر رہی سکنا ہے تہ عام طور ور رہناوی ہے۔ مگر بنگے پیراں کدے نیہ
رہنا۔ سوائے کسے خاص موقعے یا مالی مجبوری نے۔ جس طراں پگ سر واسطے عزت نا
دجر کھنی ہے اسے طراں جوتا پیر نی عزت تہ آبرو ہونا ہے۔ پیراں کی کنڈیاں تھیں بچانا
ہے۔ ٹھوکر لگنے تھیں بچانا ہے۔ پیراں کی خوبصورتی بخشا ہے۔ صرف ایہہ ہی نیہہ پیراں
نے عیب تہ نقص وی چھپانا ہے۔ کدے جوتے نی ایجاد نہ ہوئی ہونی تہ یقین
مٹو اساہڑے پیراں نی ایہہ موجودہ شکل تہ صورت بالکل نہ ہووے ہے۔

اک فنکار نے ہتھیاں نی سخت محنت تہ تراش خراش تھیں بعد بنی تہ جوتا جس ویلے
پیراں بچہ ہونا ہے تہ اُس ویلے اوہ بندے نی شخصیت نا اک خاص حصہ بنی جانا
ہے۔ جس طراں لباس نے لحاظ سنگ کسے بندے نی شخصیت نا اندازہ لایا جانا ہے
اُسے طراں جوتے نے انتخاب بچہ وی بندے نی شخصیت نا بڑا دخل ہونا ہے تہ
جوتے نا کم کاروبار وی بڑا وسیع ہے۔ جوتا قد کاٹھ بدھانے بچہ وی معاون تہ مددگار
ثابت ہونا ہے۔ کسے توڑی کوئی کم کاج پی جائے جوتا کہسائی تہ کم کاج کڈھیا جائی سکنا
ہے۔ اس تھیں علاوہ چنے نچانے تہ نسے پچنے بچہ وی جوتا اک خاص رول ادا کرنا
ہے۔ غرض ایہہ جے جوتا ہر زمانے بچہ ہر لحاظ سنگ بندے ناساتھی تہ مددگار رہیا ہے۔

دال واسطے پہناؤ ے برتن تھوڑے ہوئی جان تہ جوتیاں بچ دال بندی جانی سکنی
ہے۔ کسے سنگ اُن بن تہ لڑائی چنگڑا ہوئی جائے تہ اُس کی جوتے نی نوک اُپر رکھیا جانی
سکنا ہے۔ توبہ تاب کرنے واسطے وی جوتے اُپرنگ رگڑیا تہ رگڑایا وی جانی سکنا ہے۔

پہناویں جوتے تہ سر ناسنگ ساتھ کدے دی نیہہ رہیا مگر ایہہ وی اک حقیقت
ہے جے اک دُوے کولوں دُو ردو ر رہنے تہ اپنی اپنی جگہ اُپر ڈٹے رہنے نے باوجود کسے
نہ کسے وسیلے سنگ دواں ناملاپ تہ آپسی رابطہ بحال ہی رہیا ہے۔ کدے کدے سر نی
چادر ٹہی یا پگ شگ کسے دُوے نے پیراں بچ سٹی تہ اپنی گل منوائی ہندی جانی ہے یا
بگڑے ہوئے معاملے کی درست کری ہندا جانا ہے۔ اس طراں نے فعل بچ
عاجزی، حلیمی تہ معافی شامل ہونی ہے تہ اگلا بندہ پہناویں کتنا ہی بڑایا مغرور کیاں نہ
ہوؤے اوہ سر ن ادب کرنے ہویاں دُوے بندے نی گل مٹی پتا ہے۔

مگر پیراں نا جوتا جس ویلے سر توڑی جانی پُچھنا ہے تہ اُس نا انداز کجھ ہو رہی ہونا
ہے۔ بلکہ چادر ٹہی تہ پگ وغیرہ نے بالکل ہی برعکس ہونا ہے۔

کجھاں سیانیاں نا خیال ہے جے کسے کی جوتا دہسنا اک مُشکل کم ہے۔ کسے کی
مارنے واسطے جوتا چکنا ہو روی مُشکل کم ہے تہ کسے نے سر توڑی جوتے کی پُچھا نامتتا ہی
مُشکل تہ اوہ کھا کم ہے۔ لیکن انسان آخر انسان ہے تہ اوہ ہر مُشکل کم کری دہسنا ہے۔

آکھیا جانا ہے جے جوتے نی مار سب تھیں بڑی مار ہونی ہے۔ اتھے توڑی جے
بندوق نی گولی توپ نے گولے میزائل، ہوائی بمباری تہ بم دھماکے تھیں وی زیادہ
خطرناک تہ نقصان دہ ہونی ہے تہ اگر کوئی گولی، گولے میزائل، بمباری تہ بم دھماکے نی
مار تھیں پچی جائے تہ اوہ خوش قسمت ہونا ہے۔ اُس نی قدر تہ اہمیت بچ اضافہ ہوئی جانا
ہے۔ اُس کی وی۔ آئی۔ پی نی حیثیت حاصل ہوئی جانی ہے تہ نالے اُس نی سیکورٹی

بدھائی کری دیتی جانی ہے تہاگر کوئی مری وی جائے تہا وہ شہید اکھوانا ہے۔

مگر جوتے نی مار.....!! اللہ نہ دہسے۔ ایہہ مار اُس ویلے تہہور زیادہ مندی تہہ سخت ہوئی جانی ہے جس ویلے کسے نکلے جئے بند ہے نے ہتھوں جوتا اک بڑے بندے نے سر توڑی جائی پھینا ہے۔ جوتا نشانے اُپر لگے یا مٹھی جائے اس گل نال کوئی فرق نیہہ پینا۔ کیاں جے ہر دوں صورتاں بچ اس نا خاطر خواہ نتیجہ نکلتا ہے۔

ایاں تہہ جوتا مارنے نامطلب کسے کی جان تھیں مارنا بالکل نیہہ ہونا، بلکہ اُس کی ایہی کیفیت بچ مٹلا کرنا ہونا ہے جے اوہ جی سکے تہہ نہ مری سکے تہہ نال ہی نال اُس نی ہمیشہ ہمیشہ واسطے عزت تہہ شہرت وی ہوئی جائے۔

اُج نے ترقی یافتہ دور بچ جوتے نے ایہہ ثابت کری دہسیا ہے جے اوہ کسے تھیں وی کہٹ تہہ چکھے نیہہ ہے۔ بلکہ اک کامیاب ہتھیار ہے۔ اک بڑی طاقت ہے تہہ اک خود کش حملہ آور ہے۔

طاقت نے طور ورجوتے ایہہ ثابت کری دہسیا ہے جے اوہ اُچی تھیں اُچی ڈاری لائی سکنا ہے تہہ بڑی تھیں بڑی طاقت نے سر توڑی جائی پھینے نی ہمت تہہ دم خم اپنے اندر محفوظ تہہ موجود رکھنا ہے۔

بہر حال جوتے نی اس طراں نی کارکردگی تہہ اہمیت نی وجہ تھیں ساری دُنیا کی اک ہور بابدے نا خطرہ ہوئی گیا ہے۔ آکھیا جانا ہے جے ہُن کوئی وی کانفرنس، کوئی وی جلسہ یا جملگٹھا جوتے نے خطرے تھیں خالی نیہہ ہون لگا تہہ کوئی وی نکا یا بڑا بندہ جس کی کسے سٹیج اُپروں بولنا پیسی گا، اُس کی ایہہ خطرہ لگا رہسی جے کسے پاسوں اُس اُپر جوتا حملہ نہ کری چھوڑے۔ جوتے نے خطرے نی وجہ تھیں ہُن اوہ دن دُور نیہہ ہے جے سیکورٹی نی خاطر تلاشی نے دوران جوتے اتروائی تہہ لوکاں کی جلسیاں بچ جانے نی اجازت دیتی جائے۔

صرف ایہہ ہی میہہ جوتے کھیل نے میدان بچ وی اپنا پورا پورا حصہ نبھایا ہے۔ آج کل انٹرنیٹ اُپر جوتے سنگ نشانہ لانے والا کھیل دُنیا ناسب تھیں زیادہ پسند کیتا جان والا کھیل بنی گیا ہے۔ اس کھیل نی پسند تہ کامیابی تھیں ظاہر ہونا ہے جے اوہ دن دُور میہہ ہے جے جس ویلے لوک کرکٹ نے بجائے جوتے کی فوقیت دین لگ پُسن۔ کیاں جے اس کھیل بچ جوتے نا نواں یا پُرانا ہونا یا نکا بڑا ہونا ضروری میہہ ہے۔ بس جوتا ہونا ہی کافی ہے۔ جوتے نی کارکردگی تہ اہمیت کی مد نظر رکھنے ہویاں جوتے واسطے اک پنٹھ تہ دو کاج آکھنے نے بجائے اک پنٹھ تہ سو کاج آکھیا جائی سکنا ہے۔

جوتے نی اہمیت تہ ضرورت نا اس گل تھیں وی اندازہ لایا جائی سکنا اے کہ نماز پڑھنے نے دوران مسجد بچوں جوتے چوری ہوئی جانے ہین۔ دراصل ہُن جوتا بین الاقوامی شہرت نا حامل ہوئی چکيا اے۔ جدوں تھیں جوتے بین الاقوامی شہرت حاصل کیتی اے اس نے ناں کی چار چن لگ گئے ہین۔ قیمت بچ وی بہت زیادہ مہنگا ہوئی گیا اے۔ سچ کھوتہ جوتے نے پیر تہرتی اُپر میہہ لگنے ہین۔



گال

گال اصل بچ گل نی ہی اک قسم ہے جس کی برتنے ہویاں ہر کوئی اپنا اپنا کمال تہ جو ہر دہستی سکنا ہے۔

ایہہ اللہ تعالیٰ نی طرفوں بخشی نی اک باہدے نی صلاحیت ہونی ہے۔ کسے کی گال کڈھنے نے مسئلے بچ کمال حاصل کرنے واسطے کسے طراں نی محنت تہ مشقت نی بالکل ضرورت نیہہ ہونی۔ البتہ گال کڈھنے نا اک موقع تہ ویلہ ضروری ہونا ہے جیہڑا جے کسے بندے نی معمولی جی لا پرواہی تہ یا فراپنی تھوڑی جی کوشش سنگ لہی ہی جانا ہے۔ مگر گجھ لوک تہ کسے خاص موقعے تہ ویلے سرے تھوں بغیر وی اپنی زبان اُپر گال تہری رکھنے ہین۔ اصل بچ ایچے لوکاں نی گال بچ وزن وقار تہ اثر باقی نیہہ رہنا تہ نہ ہی انہماں نی کڈھی ہوئی گال کسے کی زخمی کری سکنی ہے۔

اصل بچ گال کڈھنا اک فطری عمل ہے جس ویلے کسے بندے کی کوئی تکلیف یا تنگی جھننی ہے تہ رد عمل تہ جوابی کاروائی نے طور اُپر اوہ پہلا فریضہ گال کڈھنے نا ہی انجام دینا ہے۔ یعنی کہ ضرورت نے وقت اللہ تعالیٰ نی بخشی نی ایہہ صلاحیت اپنے آپ ہی ظاہر ہوئی جانی ہے۔ گال کڈھنے نا وی اک فن ہے۔ اک ہنر ہے تہ اک رواج وی ہے۔

آکھیا جانا ہے جے اِس فن نالین دین کرنے تہ برتنے نال اِس بچہ چدّت اونی
ہے تہ نالے باہداوی ہونا ہے۔ آکھیا جانا ہے جے ایہہ اپنی قسم ناکہلا خزانہ ہے، جیہڑا
مٹے تھیں مٹا استعمال کرنے نے باوجود وی ختم نیہہ ہونا ہے۔ کجھ لوک تہ گالیاں نالین
دین تہ تبادلہ کرنے تھیں بچنے نی ہی کوشش بچ رہنے ہین تہ اِس طراں اپنے آپ کی
شریفاں نی فہرست بچ شامل رکھنے ہین۔ مگر ایہہ وی ضروری نیہہ جے جس نے منہہ بچ
گال کڈھنے آلی چمھ نہ ہووے، اوہ ہر لحاظ سنگ شریف ہی ہوسی گا، کیاں کہ کجھاں
سَدھے سادھے تہ شریف لوکاں بٹیاں سَدھیاں سادھیاں گلاں وی گالی جیا دم خم
رکھدیاں ہونیاں ہین۔ بلکہ گالی تھیں وی زیادہ تاثر والیاں ہونیاں ہین۔ گالی نی
خصوصیت ایہہ ہے جے گال کڈھنے ویلے دند رکھنے نی نوبت آئی جانی ہے۔

گال کڈھنے نارواج تہ رسم ہر زمانے تہ ہر قوم بچ رہتی بسی نی ہونی ہے۔ گال
صرف جاہل تہ انپرٹھ لوک ہی نیہہ کڈھنے بلکہ بڑے بڑے ادیب تہ پڑھے لکھے وی
بڑے شوق سنگ اِس نا استعمال کرنے ہین۔ ادب نی تخلیق بچ جس وی جتنی بڑی گال نا
استعمال کیتا، لوکاں اس کی اتنا ہی بڑا رتبہ تہ معیار دتا۔ گال کڈھنے ناک باعزت ناں
الزام لانا تہ چکڑا چھالنا وی ہے۔ اِنج کل الزام لانے تہ چکڑا چھالنے نارواج عام طور ور
حاکم تہ سیاسی لوکاں بچ بڑا نظری آونا ہے۔ الزام لانے تہ چکڑا چھالنے نے پردے بچ
(اصل بچ) گالیاں ہی کڈھیاں جاناں ہین۔

اکثر لوک گالی نا جواب گالی سنگ ہی دینے ہین۔ اخلاقی طور ور ایہہ ہی طریقہ
چنگا ہے، مگر جاہل قسم نے لوک اِٹ نا جواب پتھر نی طراں گال نا جواب ڈنڈے سنگ
دینا شروع ہوئی جانے ہین۔ ایہہ طریقہ نہ صرف گالی نی شان نے خلاف ہے بلکہ
انتہائی حد توڑیں غیر واجب ہووے نقصان دینے آلاوی ہونا ہے۔

گجھ لوک کسے نی گال آرام سنگ ہضم کری کہننے ہین۔ گال ہضم کرنا اصل بچ
بڑا دل گردے ناکم ہے۔ ایچے لوک بڑے گھلے دل والے ہونے ہین۔ گجھ لوک گالیاں
پی وی پنے ہین۔ گال پی جانا ہضم کرنے نی بہ نسبت متا اوکھا کم ہونا ہے۔ گالی پنے نادم
خم صرف دیہاتی تہ گرائیں زنانیاں کی ہونا ہے جیہڑیاں اٹھنیاں بہنیاں کھر والے نیاں
گالیاں ہچکی ہچکی پینیاں رہنیاں ہین تہ اُف تکر نہیہ کرنیاں۔

تکلیا جائے تہ گالیاں نے بے شمار فائدے ہین جس ویلے بندے کسے گل اُپر
پہڑکی تہ بہادری دہسنے ہین تہ ایچے موقعے ور ہراوہ وار متا صحت بخش ہونا ہے جس نے
نال اک گال وی ہونی ہے۔

اصل بچ گال اک کارگر تہ فائدے مند ہتھیار ہے جیہڑا لاسنس تھیں بغیر ہر
ویلے ساہڑے کول رہنا ہے تہ ایہہ ٹساں نی مرضی جے ٹس کیہڑے ویلے کس طراں
کیہڑیاں موقعیاں اُپر تہ کتنی مقدار بچ اس نا استعمال کرنے ہو۔ بے شک ہر گل نے دو
پہلو ہونے ہین۔ اک فائدے مند تہ اک نقصان دینے آلا۔ سچ کچھو تہ گال بچ فائدے
ہی فائدے ہین۔ نقصان اگر ہین وی تاں وی بہوں کہٹ۔

فرض کرنے ہاں جے ٹساں کی کسے اُپر سخت غصہ آئی گیا ہے تہ ٹس اُس کی ٹھل
مارنا چاہنے ہو مگر اوہ بد بخت ٹساں تھیں اتنا دؤر ہے جے ٹس اُس توڑیں ٹھل نہیہ پہچائی
سکنے تہ ایچے بے بسی نے موقعے ورفوٹ اک موٹی جی گال ٹساں نی چپھ اُپر چڑھسی
گی۔ اک تھیں بعد دوئی تہ فرکئی گالیاں ٹس اپنے دشمن کی کڈھی تہ اپنے آپ کی نہ
صرف پُرسکون بلکہ کامیاب محسوس کر سوغے۔

بس کلینڈر ٹساں نا بقایا دینے تھیں ٹال مٹول کرنا رہیا ٹساں نی منزل آنی پہچی،
ٹساں بقایا طلب کیتا، اُس پہن کہڑ پلے نہ ہونے نا بہانہ کیتا تہ گڈی چل پئی، ٹس اک

مونٹی جی گال کڈھی چھوڑ و بقایا نہ لہٹھنے ناسارا غم پہنکی جاسو گے۔ ٹساں کی جس ویلے وی اپنی طاقت تہ بہادری نامظاہرہ کرنا ہووے تہ گالیاں کی نال شامل کری ہنوَ طاقت دگنی ہوئی جاسی گی۔

اگر کسے طاقتور بندے کی کسے کمزور اُپر جلال آئی جائے تہ اوہ گال کڈھنے تھیں پرہیز کرنے ہو یاں کمزور اُپر ہتھ چکی ہنّے تہ ہوئی سکنا ہے جے بیچارہ کمزور بندہ جانی تھیں جائے۔ گالیاں بڑے بڑے حادثے ٹالنے نے کم وی آونیاں ہین۔ گالی نی مدد لئی تہ بندہ مہلک ہتھیاراں تھیں وی پچی سکنا ہے۔

صرف اتنا ہی میہ بہتیریاں موقعیاں اُپر گالیاں ٹساں واسطے مددگار ثابت ہونیاں ہین۔ مثال نے طور و کوئی گڈی اس انداز بچ ٹساں کولوں لہنگھے کہ ٹس بڑی ہی مشکل سنگ اپنا آپ بچائی سکے ہو یا فر بارش نے موسم بچ کوئی تیز رفتار گڈی ٹساں نے ہوتے ہوئے کپڑیاں اُپر گندے پانی نے چھینٹے ماری تہ ٹری جائے تہ اسے طراں نے بے شمار موقعیاں اُپر کوئی دہستے تہ ہی جے گال کڈھنے تھیں علاوہ ہور چارہ ہی کے ہونا ہے۔

سچ تہ ایہہ ہے جے گال ہی اک ایہجا ہتھیار ہے جس نال ٹس اپنے حریف تہ مخالف کی اندر تک زخمی کری سکے ہو۔ اُس نال تہ جگر تک لہو لہان کری سکے ہو تہ ایہہ سب کچھ کرنے نے باوجود وی اوہ ٹساں اُپر ضرب شدید نامقدّمہ درج کرنے بچ ناکام تہ نامر اور ہنا ہے۔ کیاں کہ پولیس کی دہسنے واسطے اُس نے کول کوئی ظاہری ثبوت میہ ہونا تہ ظاہر جی گل ہے جے پولیس بغیر ثبوت نے ٹساں نابال وی ڈنگا میہہ کری سکئی۔ ایّاں وی تہ لوکاں نے معاملیاں بچ پینا پولیس اپنی شان نے خلاف سمجھنی ہے۔ پولیس تہ اُسے ویلے حرکت بچ آونی ہے جس ویلے اوہ مجرم کی رنگے ہتھاں پکڑی ہنّے یا فر اوہ چشم دید گواہ سر چڑھی تہ بولن جنہاں نے ہتھ جرم نال رنگے نے ہوون۔ مگر اس

طراں تہ کدے کدے ہی ہونا ہے۔ اسے وجہ توں تہ زیادہ تر گڑیاں چڑیاں اپنی عزت کھڑانے توں بعد جان توں وی ہتھ تھوئی چھوڑنیاں ہین کیاں کہ اوہ پولیس کی ضروری ثبوت پیش کرنے بچ ناکام رہنیاں ہین۔

کئی بار گال بڑے چنگڑیاں کی تہ مار کٹائی جئے نقصان دہ کارنامیاں کی روکنے بچ مددگار ثابت ہونی ہے کیاں کہ عقل مند لوک مارنے کٹنے نے بجائے صرف گالیاں نے لین دین اُپر ہی صبر کری پئے ہین۔

بڑے لوکاں کول جتھے دولت تہ شہرت نی کمی نیہہ ہونی تہ اُتھے ہی انہاں نیاں چوولیاں گالیاں سنگ پھریاں رہنیاں ہین۔ ایہہ گالیاں انہاں کی انہاں نکلیاں لوکاں کولوں لھنیاں ہین جہاں کی اوہ طاقت نے بل بوتے اُپر دبائی رکھنے نی کوشش بچ رہنے ہین۔ خلیج نی جنگ بچ امریکہ نی بمباری نال عراق کول جس ویلے لڑائی واسطے ہتھیار تہ باقی سب گجھ ختم ہوئی گیا تہ عراقیاں امریکی بمباری ناگالیاں سنگ مُنہ توڑ جواب دئی تہ امریکہ نے ہوش پہلائی چھوڑنے سن۔ مگر عام طور اُپر گال کی بڑا بُرا سمجھنے ہین تہ گال کڈھنے والے کی تہ بالکل ہی نیہہ پسند کرنے ہین تہ بعضیاں کی شریف ہونے نا خطاب محض اسے گل اُپر دئی دینے ہین کہ اوہ مُنہ بچ زبان رکھنے نے باوجود دُویاں کی دویاں کئی طراں نیاں بُرائیاں تہ بدعمالیاں بچ ملوث ہونے ہین۔ فردی اس سب گجھ نے ہون نے باوجود شریفاں تہ پرہیزگاراں نی صف بچ کھلتے نے نظر آونے ہین۔

مگر عقل مند لوک عام لوکاں نی اس رائے سنگ اتفاق نیہہ کرنے۔ اوہ نہ گال کی بُرا سمجھنے ہین تہ نہ ہی گال کڈھنے والے کی مئے تھیں متا گجھ آکھن وی تہ گال کی ہوائی فائرنگ نے برابر آکھنے ہین تہ گال کڈھنے والے کی وی اک نگا جیا سپاہی مننے ہین۔ عقل مند لوکاں نے نیڑے ایہہ ضروری وی نیہہ جے گال نی زد بچ آونے آلا کوئی

جینا جا گنا بندہ ہی ہووے۔ گال تہ جانوراں تہ راہ بچ پئے ہوئے پتھر کی وی کڈھی جائی
سکئی ہے۔ اس واسطے گال جس ویلے کڈھی جانی ہے تہ اس نا مقصد کسے کی تکلیف پہچانا
تہ اس نا دل دکھانا میہ ہونا بلکہ گال کڈھنے نا مطلب تہ مقصد اپنے دکھ درد تنگی تہ
تکلیف نا کھلم کھلا اعلان ہونا ہے۔

مگر تکیا گیا ہے جے کجھ لوک گال تھیں پہڑ کی تہ جوابی کاروائی اُپر اُتری آونے
ہین تہ ایہہ اک بڑی پہل ہے۔ اک غلطی ہے، کیاں جے اپنے اوصاف نے لحاظ سنگ
گال پہلے توں اک قسم نی جوابی کاروائی ہونی ہے جس اُپر ہور مزید کاروائی کرنے نی لوڑ
باقی میہ ونی۔ جیہڑے لوک ایہہ آکھن ہین جے گال نی وجہ تھیں بڑے بڑے جھگڑے
ہوئی جانے ہین اوہ اصل بچ گال نا مطلب تہ مفہوم چنگے نے بجائے غلط طریقے سنگ
کڈھنے ہین۔ اوہ ایہہ سمجھن ہین جے گال کڈھنے آلا آساں نی توہین کری رہیا ہے۔ جد
کہ حقیقت بچ گال کڈھنے آلا اپنے ہی دکھ درد غم تہ غصے نا اظہار کری تہ اپنے آپ کی
پُر سکون کرنے نی کوشش بچ ہونا ہے۔ اس واسطے گالی نے جواب بچ پہڑ کی تہ جوابی
کاروائی اُپر اُتری آونا نہایت ہی بیوقوفی نا کم ہے۔



اپوزیشن پارٹی

آزاد تہ جمہوری ملک فی فضاواں پنج کئی پارٹیاں پھلیناں پھلیناں تہ رہنیاں
ہین۔ انہاں پنج گجھ مضبوط تہ مستحکم حالت پنج ہونیاں ہین جد کہ گجھ کمزور تہ مسکین
حالت پنج۔

انکیشن نے زمانے پنج لگ بھگ ساریاں پارٹیاں پنج نویں جان پئی جانی ہے تہ
اوہ ہتھ پیر چلان لگنیاں ہین۔ اس ویلے تہ پارٹیاں فی کار کردگی تہ اہمیت تکننے لائق ہوئی
جانی ہے۔ انکیشن نے ہی زمانے پنج اکثر لوک نوپاں نوپاں پارٹیاں فی تخلیق کری تہ اپنے
وجود نے ہونے نا احساس تہ اعلان کرنے ہین۔ گجھ گٹھ بندھن پارٹی کی وجود پنج آئی تہ
پارٹی نے وجود ناں نال اپنے وجود کی وی خطرے پنج بائی رکھنے ہین۔

مگر جیٹاں کہ ظاہر ہے کہ جمہوری فضاواں موسمی تہ اک طرفہ بیہ ہونیاں۔
انہاں فی رفتار تہ سمت گجھ اپنی ہی نوعیت فی ہونی ہے۔

ایہہ بواہر تہ اُپر و بُن وی چلنیاں رہنیاں ہین تہ اس طراں ایہہ کدے کدے
بڑیاں بڑیاں پارٹیاں کی وی مُنہ پہار سٹی شوڑنیاں ہین۔ اتھے تک کہ پارٹیاں کی اپنے
وجود کولوں وی نفرت ہون لگتی ہے۔

غرض ایہہ کہ آزاد تہ جمہوری فضاں پنج پارٹیاں نے بنے، پھلنے، پھلنے تہ بنی تہ
مٹ جانے نا عمل جاری رہنا ہے۔

مگر انہاں جمہوری فضاواں بچ اک صدا بہار پارٹی وی ہے جس پر موسمی تہ غیر موسمی ہواواں نا اثر میہ ہونا ہے جس کی جوڑنے، توڑنے نا کوئی خدشہ نہیں ہونا ہے جس کی مائی ناں کوئی لال شکست میہ دسی سکنا ہے جس کی کدے وی زوال میہ آشنا ہے۔ جیہڑی ہمیشاں زندہ و تابندہ دہنی ہے تہ جیہڑی کدے وی تھکنی میہ ہے۔ اس مشہور تہ معروف پارٹی نا ناں ہے۔ اپوزیشن پارٹی۔

لیکشن نیاں تیاریاں تہ دوڑ دھوپ کی تکنیاں ہوئیاں اج اس اسے پارٹی نی شان بچ قصیدہ خواں ہونے جانی رے ہاں۔

جی ہاں! اپوزیشن پارٹی ہی اوہ واحد پارٹی ہے جس نی تخلیق واسطے تساں کی تہ کسے کی وی ذرا وی زحمت اٹھانے نی ضرورت میہ پینی ہے۔ ایہہ پارٹی اپنے آپ ہی وجود بچ آئی جانی ہے۔ اس نے وجود واسطے بس تساں نا وجود ہی کافی ہونا ہے۔ مختصر ایہہ کہ تساں نے وجود تہ اپوزیشن پارٹی نا چولی دامن نا ساتھ ہونا ہے۔ ٹس کھر بچ ہو ویاکھر تھوں باہر آفس بچ ہووے آفس تھی باہر کھیل نے میدان بچ ہو ویاسیاست نے میدان بچ تساں کی ہر جگہ اپوزیشن نا وجود نظر آوی گا۔ تساں نے اپنے تساں نا سنگ ساتھ چھوڑی سکے ہین۔ تساں نے جگہ دوست دل بدل ہوئی سکے ہین مگر اپوزیشن پارٹی ہمیشہ تساں نے نال نال رہی تہ قدم قدم اپرا اپنی موجودگی نا احساس دلانی رہی گی۔

ایہہ بے مثال پارٹی کئی خوبیاں نی حامل ہے تہ اس نی سب تھی بڑی خوبی ایہہ ہے کہ ایہہ لافانی پارٹی ہے۔ (۱) دیگر پارٹیاں اپنے نقوش سمیت مٹ سکدیاں ہین مگر اپوزیشن پارٹی نا وجود تساں نے وجود نال نال رہی گا۔ (۲) قوماں تہ تہذیبیاں تک مٹ سکدیاں ہین۔ حدود و اربعہ نے لحاظ سنگ اس پارٹی بچ بڑی وسعت تہ کشادگی ہونی ہے۔ اس پارٹی نا ممبر بننے واسطے نہ تہ کسے منڈیٹ نی ضرورت ہونی ہے تہ نہ ہی ووٹراں نے کھر

دستک دینے فی۔ اس پارٹی نے صدر دفتر نے چارے دروازے ہر خاص و عام واسطے ہر وقت کھلے رہنے ہیں۔

اگر ٹس ملازمت حاصل نہ کر سکے۔ اور ایج (Over age) ہوئی تہ ماپوسی تہ بے روزگاری ناشکار ہوئی چکے نے ہوئے کہہراؤ نہ۔ اپوزیشن پارٹی نے ممبر بنی جاؤ۔ اس طرح اپوزیشن پارٹی نافرد ہونے نے ناطے نہ صرف جلسے تقریراں تہ تنقیداں جیسے بے ضرر تہ آسان کم کرنے بیج حق بجانب ہو سو بلکہ ایہہ سب کم کرنے نے عوض بیج حکومت تہاں فی پھر پور مدد وی کرسی تہ سیکورٹی وی تہاں کی فراہم کرسی گی۔

عرض و غائت تہ مقاصد نے لحاظ سنگ وی اپوزیشن پارٹی نا اپنا ایک منفرد مقام ہے۔ ٹساں فی ہر گل کٹنا ٹساں فی ہر اچھائی کی برائی نے لیبل بیج پیک کرنا [تہاں نے اچھے کماں کی بریاں کماں بیج بدلنے نے جواز پیدا کرنا۔ ٹساں نے دشمنان سنگ ہتھ ملانا، تہاں فی کرسی فی جنگ چھکنے واسطہ پر تولی رکھنا تہ اسے نوعیت نے دو بے کئی کم اپوزیشن پارٹی نے منصبی تہ اولین فرائض بیج شامل ہیں۔

اس تھوں علاوہ اپوزیشن پارٹی فی اہمیت اس حقیقت بیج وی پوشیدہ ہے کہ تہاں اگر کسے بڑی کرسی اوپر براجمان ہو یا حکومت فی بھاگ ڈور ٹہلی ہوئی تہ تہاں نے ہتھوں بیجوں چھٹی سکنی ہے تہ تہاں اپنی کرسی سمیت ڈھی سکنے ہو۔

کچھ لوک اپوزیشن پارٹی کی سخت تہ بریاں نظراں سنگ تیکنے ہیں۔ اوہ اپوزیشن کی اپنے واسطے ہک بڑا خطرہ سمجھنے ہیں۔ تہ اپوزیشن پارٹی اوپر نت نویں حملے کرنے رہنے ہیں۔ مگر انجانے بیج اوہ ہک بہت بڑی پہل نے مرتکب ہوئی رہے ہیں۔ پہلی گل تہ ایہہ ہے کہ اپوزیشن پارٹی نے وجود نا خاتمہ ممکن ہی نہیہ ہے۔ کیاں کہ اس نے وجود نا تعلق برائے راست تہاں نے وجود سنگ ہونا ہے تہ دوجی تہ ضروری گل ایہہ ہے کہ

ایہہ ہی تہ اودہ واحد پارٹی ہے جیہڑی تہاں کی محتاط تہ چوکس رکھی تہ اس قابل بنائی رکھنی ہے کہ تہ اپنی کرسی تہ حکومت نی بھاگ ڈور مضبوطی سنگ تھی رکھواس واسطے اک ایسی پارٹی نے وجود کی ختم کرنے نی کوشش کرنی جیہڑی کہ حقیقت بچ تہاں نی بقانی ضامن ہوئے کوئی دانشمندانہ فعل نیہہ ہے تہ تہاں نی ایہہ سوچ کہ ”جس ویلے تہ بہت بڑے آدمی بن جاسو گے تہ تہاں نے پلے سب کچھ ہوسی گا تہ تہاں نی اپوزیشن خود بخود ختم ہوئی جاسی گی تہ سارے نے سارے تہاں نے خیر خواہ ہوئی جاسن گے“۔

جی نیہہ! ایسا سوچنا تہاں نی سادہ لوحی تہ شرافت نے سوا ہو ر کچھ نیہہ ہے۔ حقیقت ایہہ ہے کہ تہاں جتنے بڑے عہدے اپر فائز ہو سو گے تہاں کی اتنی ہی بڑی اپوزیشن نہ سامنا کرنا پڑی گی تہ تہاں نی ایہہ سوچ وی اک پھل ہے کہ تہاں اپوزیشن کی سنگ لئی تہ اگے بڑھی سکے ہو۔ ایسا کرنے واسطے تہاں اگر اپوزیشن نے گلے بچ رسہ بھی پاسو تہ ہو رد و قدم اگے بڑھنے تھی بعد چار قدم پیچھے ہٹ آسی گی۔ اپوزیشن پارٹی نیاں انہاں خوبیاں کی مد نظر رکھنے ہوئیاں اسماں نا خالص مشورہ ایہہ ہے کہ تہاں کدے پہلی وی تہ اپوزیشن پارٹی نال نبرد آزما ہونے نی کوشش نیہہ کرو۔ کیاں کہ ایسی صورت بچ تر بجا افراد فائدہ چانے بچ کامیاب ہوئی سکنا ہے۔

تہ جتھے تک اساڑے ملک نی اپوزیشن پارٹی تہ صاحب اقتدار پارٹی نا تعلق ہے۔ ایہہ اساڑی خوش نصیبی ہے کہ گما ہنڈیاں بہ نسبت اساڑے ملک نیاں پارٹیاں اپنی اپنی حد نے اندر رہنا چاہنیاں ہین تہ آپسی طاقت آزمائی نے بجائے عوامی مسائل نی طرف زیادہ توجہ دینیاں ہین۔



وومین امپاورمنٹ

حضرات! وومین امپاورمنٹ اک بہنوں ہی چنگا نعرہ اے ہور اگر ایہہ نعرے توڑیں ہی رہوئے، یعنی اس ور عمل درآمد نہ ہووے تاں تہ ہور متی چنگی گل اے۔
ہُن تئیں آکھسو گے کہ ”ایہہ کہہ گل ہوئی، اس ور عمل درآمد کیاں نہ ہووے“۔ تاں اس حوالے نال عرض اے جے ہُن اوہ زمانے نیہہ رہے، جسے واقعی کالسریاں کمزور تہ مظلوم ہونیاں سن۔ چار دیواری بچ رہنیاں ہونیاں سن۔ علم تہ اپنے حقوق تھیں بے خبر سن ہور مرد آزاد بھرنا تھرنا رہنا سا۔ تدوں اکس کَلّے نال بدھی نیاں زنانیاں اپنا دم خم ہور اپنی طاقت آپے بچ لڑی چنگوی اکس دُوے ور صرف کرنیاں رہنیاں سن۔ اسراں زنانیاں نے آپسی کہمسان نی وجہ تھیں مرد بچیا رہنا سی۔ اس نی جان ہور عزت لگی وئی سی۔ مگر ہُن اوہ زمانہ نیہہ رہیا۔ ہُن پاسہ پوری طراں پرتن گیا اے۔ جسراں کی اک شاعر آکھیا اے ۔

کوئی کہتا ہے اگر، بیوی سے میں ڈرتا نہیں
اس سے بڑھ کر جھوٹ کوئی اور ہو سکتا نہیں
کہتے ہیں زن مریدی جسے عرف عام میں
وہ عارضہ ہے جس سے کسی کو مفر نہیں

پہناویں جے کالسریاں کی اس مقام توڑیں مجھنے ہو اپنے حقوق حاصل کرنے بچ ڈاڈی محنت ہو بڑی مدت لگی، مگر بڑی گل تہ ایہہ اے جے اوہ اپنی جنگ جیتی گئیاں ہین ہو راک اک کری اپنے سارے ہدف حاصل کر گئیاں ہین۔ لئی دیتی تہ اک ہی حق جنے کول بچیا سی، منہہ زور، منہہ پھٹ ہو راک اگلنی زبانی کولوں اپنی جان تھوڑا نا واحد حق۔ ایہہ حق وی پہناویں جے جنے واسطے اپنیاں پیراں ور آپ کھواڑی مارنے نے برابر سی، مگر اپنے پیراں ور آپوں کھواڑی ماری تہ اوہ اس کولوں چھٹکارہ پائی سکنا سی۔ پیر کٹنے نادر داوہ برداشت کری پہنا سی ہو ر جان بچالینا سی۔ ہو ر جانی تھیں بدھ ہو ر کیہڑی نعمت اے۔ جان بچی تہ لاکھوں پائے۔ مگر کالسریاں نی حکمت عملی تھو۔ حال ہی وچ ایہہ واحد حق وی جنے کولوں کھسی اپنے ناں کری شوڑیا اے ہو ر جنے اے کہ ”ٹک ٹک دیدم، دم نہ کشیدم“ نی طراں بُت بنیانا کھلتا نا اے۔ آپے ہی اپنا تماشا بنیانا اے۔ جیاں اپنے آپ کی آکھنا ہووے“ آگے آگے دیکھئے ہوتا ہے کیا“!

حضرات! اے کلے نیاں کالسریاں پڑھی لکھی تہ انتیاں باشعور ہو ر انتیاں آگے بچ گئی نیاں ہین جے اوہ کسے غیر کولوں وی ہر طراں نی مدد ہو ر اسلحہ بکر حاصل کر سکنی ہین۔ کالسریاں نی دشمنی نہ گماہنڈی ملکے نال اے نہ ہی امریکہ نال اے نہ اسلام مخالف طاقتاں نال اے ہو ر نہ بنیاد پرستاں نال اے۔ دُنیا بچ کہہ ہو ر ہیا اے انہاں نی بلا جانے۔ کیہڑے ملکے نا چھنڈا سرنگوں اے، کس نا اچا اے کیہڑا ملک کس کی تباہ تہ برباد کرن ور ثلثیا اے، کھر واپسی کہہ اے، مآب لا بچنگ کہہ اے، کیہڑے ملکے بچ کیہڑی وبا پھیلی اے، ابھیاں خبراں نال زیادہ تر کالسریاں کی کوئی لینا دینا نیہہ۔ انہاں کی اگر کجھ پسند اے تہ اوہ اے سس نہہ ہو ر شادی بیاہ جنے

سیریل پسند ہیں۔ انہاں فی لڑائی، انہاں فی محاذ آرائی ہو، معرکہ آرائی اگر کسے نال
اے تہ اوہ صرف ہو، صرف شوہر جی ذات نال اے۔ اوہ اگر کسے کی ہرانا چاہنیاں
ہیں تہ اوہ صرف ہو، صرف شوہر ناں فی ہستی اے، جس کی اوہ کسے وی حالت بچ
مطیع، فرمانبردار ہو، کھرے فی چار دیواری نے اندر غلام بنان فی حد توڑیں تگنا پسند
کرنیاں ہیں۔ اوہ پراں، فقیراں ہو، سادہ سوتاں وراگر یقین کرنیاں ہیں تہ صرف
اس گلوں جے شوہر کی تابعدار ہو، غلام بنا سکے۔ مگنی گل ایہہ اے جے ۔

آج کے دور میں خوش بخت ہے خاتون وہی

انگلیوں پر جسے شوہر کو بچانا آیا

اس ضمن بچ پوری دنیا نیاں کالسریاں متحد ہیں۔ تکیا گیا اے جے شوہر نا
دولت مند ہونا ہی کافی نیہہ اے، نک نقشہ سوہنا ہووے تاں سونے ورسہاگہ۔ مگر
پابندی ایہہ اے جے کسے دوئی کالسری واخ اکھ پھری تکی وی نیہہ سکے۔ سگوں تگنے
نا خیال تکر وی دے بچ نہ اچھن دیوے۔ اگر کسے فی تعریف کرنی ہی اے تاں اپنی
ڈین جی زنائی فی تعریف کرے۔ اگر کسے نے کھروں دعوت کھائی تہ اچھے تاں وی
اپنی زنائی نے ہتھوں پکے نے پکواناں، کچیاں پکیاں رٹیاں ہو، سڑے سڑے نے
سالن فی تعریف کرے۔ اگر کسے خوشبو فی تعریف کرنی اے تہ زنائی نے بدن فی
خوشبو فی تعریف کرے۔

آکھیا جانا اے جے بڑیاں بڑیاں دولت منداں ہو، بڑیاں بڑیاں عہدیاں
والے شوہراں کی وی ہر دور بچ زنائیاں نال پنچہ لڑانا پیا اے۔ غور کرن فی گل ایہہ
اے جے دولت ہو، دوئیاں آرام دہ چیزاں نا کہنا تہ نیہہ سی ایسا کیآں ہو یا۔ باندی
گل اے جے دولت ہو، بڑے عہدیاں فی بڑیاں ذمہ داریاں سن، انہاں کی فرصت

ہی بیہ دتی جے اوہ زنانی نی خوشامد ہو راس نے ہر حکم نی تعمیل کر سکن۔ چنانچہ
زنانیاں سُن وی انہاں کی چھوڑی تہ اپنی فتح ناچہنڈا اُچا کیتا اے۔

اُج نے حالات تہ ہو روی متے خراب ہین۔ مردقانون نے شکنے وچ پھسیا نا
اے ہو ر زنانیاں سُن ہر گھل ہاتھی نی شکل اختیار کری رکھی نی اے۔ زنانیاں نے
ہتھوں ستائے نے شوہر کُہر بار چھوڑ رہے ہین ہو ر کُجھ تہ خودکشی کی وی اِس آفت
کولوں بچن نا ذریعہ سمجھ رہے ہین ہو ر ایہہ سب کُجھ تکنے ہو ر سُننے نے باوجود ساہڑی
حکومت کی ووٹین امپاورمنٹ نا خیال آیا اے۔

جی ہاں! کہہ کالسریاں پہلاں کہٹ طاقتور سن جے ہُن انہاں کی ہو ر
امپاور کیتا جا رہیا اے۔ کہہ مرد حضرات پہلاں ہی کُجھ کہٹ مصیبتاں پہنکتنے پئے
ہین جے کالسریاں کی مزید امپاور کیتا جا رہیا اے۔ مرد نے چنٹیاں ور تھ صاف
کرنیاں کرنیاں کالسریاں ہُن ایچے عہدیاں وروی تھ صاف کر چکیاں ہین
جیہڑے صرف ہو ر صرف مرداں لئی ہی مخصوص سمجھے جانے سن۔ اُج اوہ کیہڑا محکمہ
اے، جتھاں کالسریاں سُن اپنے ہون نا احساس ہو ر اپنی کارکردگی نا لوہا نہ منوایا
ہوؤے۔ کُہرے وچ ملکہ ہو ر ہوم منسٹر نا عہدہ تہ اوہ پہلاں تھیں ہی اپنے ناں
کر چکیاں نیاں سن۔

آکھنے ہین جے ترے دوست اکس جائی بیٹھے نے سن۔ اپنیاں اپنیاں
پریشانیاں وچ پھستے ہوئے سن۔ اکس سُن ہُنوں سنجیدگی نال آکھیا ”یرا! ایہہ جیہڑا
اسا ہڑا ہوم ڈیپارٹمنٹ اے، اس سُن کدے کسے دُوے نی گل سنی یا منی نی اے؟“
دُوے سُن جواب دینے نے بجائے چہٹ چکھیا ”تاں کہہ تَس وی اِس مسئلے تھیں دوچار
ہو؟“ ترے سُن تائید کرنیاں آکھیا ”پہر اوا! اوہ کیہڑا اے جیہڑا اِس مسئلے تھیں دوچار

.....
”یہ اے۔“ مگنی گل اے جے ترے سُن وی اپنی بے بسی ہو رہاں بچ ہاں ملان آلی
گل کیتی۔

حضرات! حکومت نیاں گجھ پالیاں ہوہ قانون سازیاں حالیں التوا وچ
پنیاں ہن، جسراں تینتری فیصد ریزرویشن ہوہ دونیاں کئی اسکیمیں، جہاں در
کالسریاں نی خاص نظر اے۔ مگر کالسریاں حالیں ازدواجی جنگ لڑ رہیاں ہن۔
اوہ شوہراں ہوہ انہاں نے رشتہ داراں نال ٹٹی ہن ہوہ شوہراں کی سدھے رستے در
لے آن تاں تینتری فیصد کہہ اوہ پنجہ فیصد ہنی تہ ہی دملین گکیاں۔

کسے شاعر سُن کہہ خوب آکھیا اے ۔

دلش کا ہر نوجوان اقبال کا شاہین ہے لیکن

وہ جنگ ازدواجی میں ہی کام آیا تو کیا ہوگا

حضرات! یقین منو، اس گلے بچ ہنوں بڑی صداقت اے۔ آج مُلک ناہر
نوجوان ہوہ دُوڑے ٹہیر سارے مسئلیاں ہوہ پریشانیاں نے نال نال ازدواجی جنگ
بچ پھسیا تہ جکڑیا نا اے ہوہ جیہڑا اس مصیبت تھیں آزاد ہوہیا، اوہ..... اوہ دلش نا
پردہان منتری بنیا۔ ہُن افسوس نی گل تہ ایہہ اے جے جس سُن آپے کوئی مصیبت
ہی نہیہ پالی، سگوں روزِ اوّل تھیں ہی ازدواجی جھنجھٹ تھیں بال بال بچ گیا ہوہ ہُن
اوہ ہی دُویاں نا خانہ خراب کر رہیا اے پالیاں بنا رہیا اے ہوہ وومین امپاورمنٹ
نیاں گلاں کر رہیاں اے۔ کہہ ”اچھے دن“ صرف کالسریاں واسطے ہی ہن۔ مرداں
نا کوئی حق نہیہ اے۔ تاں ہی کسے شاعر آکھیا اے ۔

میری قسمت دیکھئے میں جب سے شوہر ہو گیا

نصف بہتر وہ ہوئے، میں نصف بدتر ہو گیا

جی ہاں! کالسریاں بیاہ کرن مگروں پہلاں کولوں نصف بہتر ہو جاناں ہین
 ہو مرد آہن آکھوان والا مردِ مومن آکھوان والا ہو دُنیا وچ بڑے بڑے انقلاب
 آئن والا نی حالتِ اسراں نی ہوئی جانی اے جسراں ”کہرے نا پھر ہولا“ آلی
 مثال۔ ہو رجدوں وی اس سُن کہرے نا نک نقشہ بدلن نی کوشش کیتی تہ خود اس نا اپنا
 ہی نک نقشہ بدلن گیا۔ اوہ نہ کہرے نار ہیانہ گھاٹ نا۔

منیا جے وو مین امپاورمنٹ نے چکھے ہمدردی نا جذبہ اے، مگر اس امپاورمنٹ
 نا پہلا ہدف اگر شوہر نی ذات ہی ہووے تاں اس نا کہہ کیتا جائے۔ ایہی وجہ اے
 جے اسیں وو مین امپاورمنٹ جے نعریاں نے خلاف اپنی واز بلند کرنے ہاں ہو
 اس نعرے کی کریلے کی نیم ور چڑھانے جی گل مننے ہاں۔ سگوں اس کی مرچ کی
 مصالحہ لان آلی وی تصور کرنے ہاں۔ اساہری آواز پہناویں جے نقار خانے بچ طوطی
 نی آواز ہاروں اے، مگر اسیں جمہوریت ور یقین رکھنے ہاں ہو بولنا اپنا حق سمجھنے
 ہاں۔ کوئی سُنے یا نہ سُنے..... کوئی سمجھے پہناویں نہ سمجھے!



ووین سیل

حضرات! اوہ زمانہ گیا جسے کالسریاں مظلوم ہونیاں سن۔ جنے اس پہنلا وے
بچ نہ رہون جے اوہ ”بڑے کھڑدم خان“ ہین۔ انہاں نی حاکمیت ہور سالمیت سر
اکھاں ور مگر چنگا ایہہ ہی اے جے اوہ اسے پہنلا وے بچ رہون ہور اس تھیں اک
وی قدم اگے نہ جاوے۔ کیاں جے آج نے زمینی حالات ہور حقیقت کجھ ہور ہی
ہین۔ آج نے زمانے بچ آساں بڑے بڑے طرم خانان نی مٹی خراب ہونیاں تکی
اے۔ اساہڑی گلے وراگریقین نہ اچھے تاں شاعر نی زبانی ہی سُن رکھنوں۔

بیوی چھٹانگ بھر ہی کیوں نہ ہو
وہ شوہر پے بھاری ہوتی ہے
ہوتی ہے جب دونوں میں لڑائی
بیوی کی ہر ضرب کاری ہوتی ہے
شوہر ہاتھ ملتا رہ جاتا ہے
جب کورٹ کچہری ہوتی ہے
بہت مہنگی پڑتی ہے اسے لڑائی
بیوی کی شنوائی سرکاری ہوتی ہے

اس کی ایک نہیں چلتی کٹہرے میں
بیوی کی عدالت ساری ہوتی ہے

جی ہاں! مرد حضرات اس پہلا وے بچ نہ رہوں بے زنانی کٹہر چھوڑی پیکے
جاسی گی۔ دو مین سیل نے ہونیاں ہوئیاں اوہ پیکے کیاں جائے۔ کیاں کہ پیکے
ہُن اوہ پہلاں جئے حالات گتھاں ہین۔ پہلی گل تہ ایہہ اے بے کجھ عرصہ پہلاں
تکر پیکے نے کٹہر اکس نننن فی حیثیت سنگ جہاں پٹہر جائیاں کی اس سُن ستایا ناسی،
کہہ ہُن اوہ خصوصی خاطر مدارت نہ کرسن گئیاں۔ منیا بے پٹہر اپہیناں نے ہمدرد
ہونے ہین، مگر آڈوں توڑیں جدوں تکر اوہ آپے اُن بیا ہے ہونے ہین ہور ہُن جد کہ
اوہ آپے بچارے اپنے اپنے محاذ ور کھلتے نے ہون، تاں اکھیں وروں پردہ اپنے
آپ ہٹی جانا اے۔ پٹہیناں نیاں ہمدردیاں خود بخود ہی کھٹی جانیاں ہین۔ حالاں کہ
یاد تکر وی باقی نیہہ رہی۔

یقیناً ایے جہیاں نکلیاں نکلیاں گلاں کی باندے رکھی حکومت سُن ہر جگہ دو مین
سیل قائم کیتے ہین تاں بے ٹھوہاں تہیاں اپنے کٹہرے ناسکون تحس تحس کرن تھیں
بعد اپنے پیکیاں ناسکون (اگر اے تاں) تباہ و برباد نہ کرن ہور انہاں نیاں
پریشانیاں بچ ہور بابدانہ کرن، سگوں سدھا رستہ پکڑی دو مین سیل جاوَن ہور اپنی
لڑائی اپنے بل بوتے ور لڑن۔ ایاں وی سیانیاں نا آکھنا اے بے چنگا ایہی اے
بے کالسریاں نال کسے وی قسم نا پنگاہ نہ کہند یا جائے۔ کیاں بے کالسریاں
کوڑے کرلیاں بچ وی اپنی مرضی نا تیز مصالحہ پٹہری انہاں کی چنگی طراں سوادلا
بنائی ٹہالی شوڑنیاں ہین۔ ہُن دہسو ہاں اکس مرد بیچارے فی اوقات ہی کہہ اے
بے اوہ اپنی زنانی نے سامنے اپنا منہ کھولے۔ ایہہ بکھری گل اے بے زندگی فی

گڈی دواں پہیاں ور چلنی اے تاں ہی تہ بندے کی بیاہ کرنا پینا اے۔ جی ہاں!
ایہہ بیاہ ہی تہ کدے کدے بندے نی بربادی نی وجہ بننا اے۔ اس بارے بچ اکس
شاعر نے کجھ شعر سئو۔

شادی کی خوشی بڑی ہوتی ہے
دل کی دُنیا اس سے جُوی ہوتی ہے
مگر آسان نہیں بیوی سے نباہ کرنا
یہ چیز ذرا ٹیڑھی ہوتی ہے
میاں روتا ہے گھر کے نون مرچ کو
بیوی کو فیشن کی پڑی ہوتی ہے
اپنی زباں کا تڑکا لگا دیتی ہے
سالن میں مرچ ہی مرچ پڑی ہوتی ہے
گھر میں برپا کر کے ایک نیا ہنگامہ
دو مین سیل میں جا کھڑی ہوتی ہے
شرم کا مارا شوہر چھپتا پھرتا ہے
پیچھے اس کے پولیس پڑی ہوتی ہے

حضرات! ہُن ایہہ اپنے اپنے نصیب نی گل اے جے کس نے حصے بچ کہہ
اشنا اے۔ بہر حال دو مین سیل آج کل کالسریاں واسطے اک طاقتور ہتھیار اے ہور
مرد حضرات واسطے یہوں بڑی تہمکی ہور ہوّا۔ ”ہوّا“ نا مطلب اے ڈرانے والی
چیز۔ زنانی تہمکی دینی اے جے اوہ دو مین سیل بچ جاسی گی تہ مرد بیچارہ ڈری جانا
اے۔ اوہ اس نی ہور چنگی طراں خاطر تواضع کرن لگنا اے ہور اپنے آپے کی مذید چنگی

طراں صابر تہ شا کر رہنے فی عادت کرن لگنا اے۔ اتنا ہی بیہ سگوں اوہ اس قول کی کہڑی کہڑی دوہراں لگنا اے جے صبر ناہیوں بڑا درجہ اے ہور صبر فی کوئی حد بیہ۔ اوہ صبر نیاں وسعتاں بچ گم ہوئی جانا اے ہور اتھوں تھیں اُس نکلتے فی بسم اللہ ہونی اے جیہڑی کسے کی شاعر، ادیب، فلسفی ہور حالاں کہ خُدا دوست ہونے نا اعزاز دی بخش چھوڑی اے۔ ایہہ جیہڑی گل آکھی جانی اے نا کہ ہر کامیاب مرد نے چُکھے اُس کالسری نا ہتھ ہونا اے ہور جس کی سنی تہ کالسریاں ایویں کیویں ہی خوش فہمی نا شکار ہوئی جانیاں ہین، اصل بچ اوہ اسے قسم نا ہتھ ہونا اے۔ یعنی بیہوں تکلیف دہ تہ اذیت ناک!

اُس نامور ادیب کولوں جس ویلے پچھیا گیا کہ ”تس اتنے بڑے ادیب کسراں بنے ہو؟“ تہ اُس نا اک ہی جواب ہونا ہے ”آج میں جو گھ دی ہاں اپنی زنانی فی وجہ تھیں ہاں“۔ اک واری اُس کی ڈاڈا تنگ کیتیا گیا جے اوہ تھوڑی کھلی تہ گل کرے تاں جے تعریف و توصیف بچ انہاں فی بیگم صاحبہ ناں وی شامل کیتا جائے۔ تدوں اُس سُن سچی گل دہس دیاں آکھیا جے ”اصل بچ ماہڑی زنانی بیہوں ضدی، سر کھل، سخت مزاج ہور چنگڑا الو قسم فی سی۔ اس فی تنگ مزاجی ہور دونیاں مصیبتاں کولوں بچنے جو گے میں ادبی کتاباں، اخباراں ہور دونیاں قسم نے رسالیاں نا سہارا کہند۔ اسراں مطالعہ کرنیاں کرنیاں میں آج نا نامور ادیب بن گیا ہاں۔“ ابنِ انشا جے ادیب وی زنانی کولوں دکھی رہے ہین۔ اوہ اُس جانی لکھنے ہین جے ماہڑی زنانی جس ویلے عیندروں فی گولی کھانی اے تہ مگی سکون ملنا اے۔ مگر اُجکل مرد و عین سیل ناں سنی تہ کمن لگنا اے ہور صبر ہور خاموشی بچ سکون فی ٹھونڈ لوڑ کرن لگنا اے۔

ہُن انہاں بیچاریاں سادیاں جنیاں کی کون دہسے جے وو مین سیل تُساں
 واسطے وی اتنا ہی اہم اے جتنا کہ کالسریاں واسطے۔ اگر تُساں کی زنائی ستانی اے۔
 نک مُنہ چاٹری رکھنی اے۔ تُساں نے گوہیاں وراپنے ہتھ صاف کرنی اے۔
 پھنگھے پیٹ سلائی اے۔ غیراں کولوں کٹائی فی تہمکی دینی اے تاں تُس وی وو مین سیل
 بچ جائی اپنی روداد سنائی سکے او، مگر اتھے وی غیرات نامسلہ درپیش آئی جانا اے۔ اس
 واسطے کوئی مرد کھرے فی دروٹی ٹپے کسراں!

اصل بچ ایہہ حوصلہ ہور دم خم صرف کالسریاں بچ ہی تگن بچ آیا اے۔
 بیچارے مرداں کی اگر کھانا چنگا چوکھا میہ لہھنا تہ اچار نال ہی گزارہ کری پنے ہین۔
 جہاں کی اتنی جرات فی جے آکھن جے کھانا ٹھیک میہ اوہ کہہ خاک کھرے نے
 دروٹی ٹپسن گے۔ ایہہ تہ صرف کالسریاں ہی ہین جیہڑیاں وومن سیل نا چنگی طراں
 فائدہ چکندیاں ہین ہور بکھریاں بکھریاں طریقیاں نال مُستقید ہور ہیاں ہین جسراں
 اکثر کالسریاں وومن سیل بچ جان تھیں بعد طلاق نامہ حاصل کرن بچ کامیاب
 رہیاں ہین ہور گجھاں تہ اپنے کھرے والے ناڈوا بیاہ کرائی تہ ہی دم ہندا اے۔ ہور
 میاں جی! اس گلے ورتہ خوش ہی خوش، سگوں بالکل بری ہور کسے شاعر فی زبان بچ
 اسراں گنگنائیاں ہونیاں ے

اگر ان کو ہم سے خُدا واسطے کا بیر نہ ہوتا

آج ان کے اور ہمارے درمیاں حائل ایک غیر نہ ہوتا

حضرات! تُسیں سوچنے پئے ہوسو گے جے ایہہ کیہڑی دُنیا نیاں گلاں
 ہور ہیاں ہین۔ جی آہاں! تُسیں ایسا کجھ سوچ رہے ہو تاں یقیناً تُسیں خوش قسمت
 ہو۔ تُساں نا کھر جنت اے ہور تُساں فی بیگم جنت فی آس دار۔ کیاں جے کھرے

بچ ٹساں نا احترام کیتا جانا اے۔ ٹساں نیاں ضرورتاں ہور سہولتاں نا خیال رکھیا جانا اے۔ مگر اس بھوں بڑی دُنیا بچ اک دُنیا ابھی وی اے جیہڑی ٹساں ہاروں خوش حال نیہ اے۔ ٹساں ایہہ قول ضرور سُنیا ہوسی گا کہ ”زنانی چا ہوے تہ کھرے کی جنت بنائے چاہے تہ جہنم بنا چھوڑے“۔

غور کرنی گل ایہہ اے جے جنے نے بارے بچ ابھی کوئی وی گل کسے نیہہ آکھی نی۔ ایہہ توفیق صرف کالسریاں نے حصے بچ آئی اے ہور بھوں چنگی طراں اس کی انجام دے رہیاں ہین۔ ٹساں طلاق ہور نکھرون نے واقعات بھوں سُنے ہوسن گے ہور ابھیاں خبراں وی پڑھیاں ہور سُنیاں ہوسن جے فلاں شو ہر سُن بیوی کولوں تنگ آئی خود کشی کر چھوڑی۔ اُج کل اک نواں ٹرینڈ وی چل رہیا اے ہور ایہہ اے کھر بار چھوڑ نے نا ٹرینڈ۔

جناں بڑے تھیں بڑے محاذ ور لڑ سکنا اے ہور جیت وی سکنا اے۔ بڑا افسر اے تہ اپنے ناں ناسکھ وی چلا سکنا اے ڈنکا وی بجا سکنا اے ہور دُور پار تکر اپنی دھاک وی جمائی سکنا اے۔ مگر کھر بچ ہر گھل، ضدی، تنگ مزاج ہور چھگڑالوز زانی نے سامنے ”چاروں خانے چت“!

ویسے گزشتہ وقتاں بچ وی ابھیاں مثالاں لہھنیاں ہین جس ویلے بڑیاں بڑیاں کی زنانی کولوں تنگ آئی تہ کھر بار چھوڑنا پیا ہور شاعراں ہور ادیبیاں سُن وی زنانی کی کھرول کدھن نے بجائے آپے ہی کھر بار چھوڑ دتا۔ مگر چنگی گل ایہہ اے جے اُج نا عام آدمی وی سمجھداری نال کم ہتا اے ہور کھر بار چھوڑ نے بچ اپنی عافیت محسوس کر رہیا اے۔

ٹساں تہ سُنیا ہوسی گا جے کوئی بلا جس ویلے کسے نال چڑی جانی اے تہ فر مچھٹیاں مچھٹیاں ہی مچھٹنی اے۔ مرداں جس ویلے ایہہ محسوس کیتا جے ترے طلاق

جیسا اصلاح پسند ہو رہا تھا مفاہمت آمیز مسئلہ وی اک بڑا ممد عابن گیا ہو ایوان بالا تکر
 بچ گیا تہ چنگا ایہی اے جے بیوی ناں نی بلا کولوں جان چھڑانے واسطے کھر ہی
 چھوڑیا جائے۔ تاہم گجھاں کی تہ اتنی تکلیف ہو رازیت دتی جانی اے کہ بیچارے کھر
 کہہ دُنیا ہی چھوڑ جانے ہین۔ اپروں اک گل ہو ر کہ ایہجیا کوئی وی ثبوت نیہہ چھوڑنے
 جس تھیں ایہہ لگے کہ زانی کولوں تنگ آئے نے سن۔ جد کہ کجھ زانیاں اپنی موت و مری
 وی سر ہج والیاں کی جیل نیاں سلاخاں نے پچھے پچھانے نے لوازمات ہو ریغامت
 صادر کری جانیاں ہین۔

ہُن ایہجیاں حالات تاں بچ جدوں حکومت وی کھر گریہستی نے معاملیاں بچ دخل
 اندازی کرن لئی کھر بچ آ بڑی اے حالاں کہ ہنڈی بچ کہہ پکر ہیا اے، ٹھکن چکی تگن
 نی خواہشمند ہووے تاں تہ پریشانی ہو ر وی بدھ جانی اے۔ نیا جے دوسن
 امپاورمنٹ اک چنگا نعرہ اے، مگر اس امپاورمنٹ نا اگر پہلا شکار شو ہر بیچارہ ہی
 ہووے تاں کوئی کہہ کرے۔ اک شاعر سن ایویں ہی ایہہ تہوائی بیہہ سی دتی ۔

وہ بیبیوں کو باختیار بنا رہے ہیں
 کریلے کو نیم پہ چڑھا رہے ہیں
 ہم تو ٹھہرے معدے کے مریض
 اور وہ مرچی کو مصالحہ لگا رہے ہیں
 ہر جگہ وہ اپنا لوہا منوا رہے ہیں
 ہمیں ناکوں چنے چبوا رہے ہیں
 ڈال کر عقل پہ ہماری پردہ
 وہ نقاب کو پرچم بنا رہے ہیں

کہنے کو وہ کندھے سے کندھا ملا رہے ہیں
حقیقت میں وہ ہم سے آگے جا رہے ہیں
ان کے تیور ان کے جوہر بتا رہے ہیں
وہ کچھ نپا کر دکھانے جا رہے ہیں

بہر حال اس بارے بچ کجھاں دانشمنداں مفید مشورے دیتے ہیں ہو آکھیا
اے جے ہمت تہ حوصلے نال کم کہند اجائے۔ صبر نادامن ہتھوں نہ چھٹے۔ زنانیاں
گلاں نامندانہ جانے۔ ہوئی سکے تہ بدلے بچ پیار دیتا جائے ساریاں کولوں بڑی گل
ایہہ جے زنانی نے معاملات بچ اپنی انا کی پہلی تہ وی نہ آن دیوئے سگوں پہلے روز
تھیں ہی اس کی دفن کیتیا جائے۔ اندر نے حالات جیسے وی ہوون مگر باہر والیاں کی
کنو کن خبر نہ ہووے۔ نس جسے وی باہر نکلو تہ بالکل بنی تئی ٹھیک ٹھاک حالت
بچ تاں جے کوئی نہ آکھے کہ زنانی کولوں مار کھائی آئے ہو۔

زنانی جو گے لڑائی نے سارے مدان گھلے چھوڑے جان مگر کھلی مقابلہ نہ کیتا
جائے۔ سنی ڈورا بنی جائے۔ بچوں بچوں اک ادھ تہ چھوڑیا جائے تاں جے اوہ
سرگرم عمل رہوئے تدوں تک کہ تھکی تہ چڑ رہو جائے۔ پہاڑی زبان ناک ہوں ہی
مشہور کہاوت اے ”پھائی نا پھو کن کیسا“۔ بس اس کی یاد رکھیا جائے۔



زنانی تہ اپوزیشن پارٹی

حضرات! زنانی تہ خصم زندگی نی گڈی نے دوپہتے ہونے ضرور ہین، مگر انہاں نی الائنمنٹ میہ ہونی۔ ایہہ ہمیشہ ان بیلنس رہنے ہین۔ کچھ تانی بچ ہی انہاں نی زندگی گوری جانی اے۔ ایہہ بکھری گل اے کہ انہاں نیاں ہی کوششاں نال ایہہ خوبصورت دُنیا بھلنی بھلنی اے۔

اپنے جے کچھ حالات اپوزیشن پارٹی ہور صاحب اقتدار پارٹی نے درمیان وی رہنیں۔ چھکو تانی، الزاماں و الزام، شکوے شکایتاں، اختلافات، ذاتیات و حملے ہور بہوں ہی اوچھے قسم نے حملے ہور انہاں ہی حملیاں بچ بیچاری عوام اسراں پسین ہونی اے، جسراں والدین نی چھکو تانی بچ انہاں نے معصوم بچے ہور چھیاں تیاں کری ملک نی گڈی وی چلنی رہی اے۔

جتھے توڑیں زنانی ہور اپوزیشن پارٹی نا سوال اے، انہاں دواں بچ دؤ ردؤ رتکر کوئی وی رشتہ ہور تعلق نظری میہ اشنا۔ انہاں نا آپس بچ کوئی وی رشتہ ہور رابطہ میہ دسنا اے۔ من کجا ہور تو کجا والی گل اے دواں بچ، مگر اتنی دؤ ری ہون نے باوجود دواں کی اگر انہاں نے مزاج، عاداتاں، طور طریقے، حرکات و سکنات ہور سوچ نے حوالے نال تکیا جائے تاں لگنا اے جے دواں نا خاندانی پس منظر بالکل ہوجیا اے۔ اسراں

لگنا اے جسراں دواں نے بشکار کوئی سنڈ گنڈھ چلنی پئی اے۔ جسراں دو قلب اک جان ہووے۔ کیاں جے دواں بچ سمجھوتے آلی کوئی گل ہی میہ۔ چنگی تھیں چنگی گل کی ہور چنگے تھیں چنگے کم کی وی بُرائی نے لیبل بچ پہلیٹی تہ پیش کرنا دواں کی بیوں سوہنی طراں آونا اے۔ دوئے بندے کی آگے بدھن میہ دینیاں ہور چچھاں تہگیلن ناکم بیوں چنگی طراں کرنیاں ہین۔ جسراں تسراں کری دو قدم آگے بدھسو، ایہہ چار قدم چچھاں کھسپی ہنی اشنیاں ہین۔ دوئے ہی مخالف ٹیم نال ہتھ ملانے بچ بیوں ماہر ہونیاں ہین۔ جیہڑا سا ہڑا دشمن ہوئی اوہ انہاں نادوست ہوئی۔ دوئے ہی خدا واسطے نابیر نبھانے نا عملی نمونہ ہونیاں ہین۔ مگنی گل ایہہ جے دوئے مخالفت نا سرچشمہ ہونیاں ہین۔ اس واسطے دواں کی اکس ہی کٹہرے بچ کھلا کر سکے ہاں۔

حضرات! منیا جے ہر کوئی زنانی ہو چھئی میہ ہونی۔ گجھ گائیں ہاروں سدھیاں سادیاں، پہو لیاں پہا لیاں ہور گجھ بیوں ہی سوچ سمجھ آلیاں، ہمدرد ہور شفیق، دکھ درد دُور کرن والیاں، ہمت و حوصلہ بدھان والیاں، ہور شوہر نی ضرورتاں ہور سہولتاں نا خیال رکھن والیاں۔ مگر زنانیاں نی اک قسم اوہ اے جیہڑی اس قسم نیاں صفتاں تھیں بسروں ہی اُلٹ ہے۔ اس قسم نیاں زنانیاں نابس اک ہی مدعا و مقصد اپنی اہمیت ہور برتری بنائی رکھنے جو گے شوہر کی ستائی رکھنا ہونا اے ہور اس کی طراں طراں نی آزمائشاں ہور رکاوٹاں بچ پھسائی رکھنا ہونا اے۔ طلاق ہور طلاق ثلاثہ جے مسئلے، کورٹ کچہری نے معاملات، شوہراں نی خود کشی نیاں وارداتیں ہور کٹر چھوڑنے جے واقعات تھیں پتہ لگنا اے جیاں اپوزیشن پارٹی صاحب اقتدار پارٹی نا قافیہ حیات تنگ کرنی اے بالکل اسے طراں زنانیاں سُن اپنے شوہراں نے نکے بچ دم کری رکھیا نا اے۔

اک گل تہ ہر بندے نی سمجھ تھیں بیوں دُور اے کہ دواں کی یعنی زنانی ہور

اپوزیشن کی خوش کرن ناہور اپنا بنان ناکیہڑا نسخہ اے۔ کہہ ابھی کوئی پیمانہ اے جس تھیں پتہ چلی سکے کہ دواں نامنہہ کسراں بند کیتا جاسکنا اے۔ ابھی کوئی چیز اے جیہڑی انہاں دواں نے منہویں بچ چکاں ہور ایہہ پُچ رہوں۔ پُچ رہنے نامطلب ایہہ اے کہ مندی چنگی نہ آکھن۔ مخالفت نہ کرن۔ اساہڑے دشمنان نال جائی نہ ملن۔ ماسے کی تولہ نہ بناون۔ اچھائی کی بُرائی نے لیبل بچ نہ پہلٹن ہور حُدا واسطے نابیر نہ نبھان وغیرہ وغیرہ۔

اک شخص کُہروں غصے نی حالت بچ نکلیا ہور دوستاں نی محفل بچ جائی بجیا ہور اچھیاں ہی بول پیا ”کجھ سمجھ میہہ اچھنا کہ پہلاں کس کی ٹکراں ہور کس نا گاٹھا دباں۔“ کسے کچھیا کہ ”کہہ گل اے؟“ تہ اوہ بولیا ”دفتر بچ اپوزیشن والیاں سُن ہور کُہر بچ زانی سُن جینا حرام کیتا نا اے۔ سُن جاں تہ جاں کدھر؟“ باقی سنگی وی شاید اسے قسم نے حالات تھیں گزرے نے سن۔ اُنہاں مشورہ دتا ”اپنے آپ کی بچان لئی دواں نا ہی خاتمہ ضروری اے۔“ مگر اُتھے ہی موجود اک تجربہ کار شخص آکھن لگا ”دوستا! لگنا اے توں جذباتی ایں۔ ماہڑی گل منو تہ دواں نے رستے بچ نہ آؤ۔ انہاں کی اپنا کم کرن دیوہورٹس اپنے کسے بچ لگے رہو۔ اک عرصہ انہاں دواں نے معاملیاں بچ جگھ بائی رکھی تہ آخر کار اس نتیجے ورجیاں جے دواں نال پنگا لینا ہی بیوقوفی اے۔ اپنی کامیابی ناراز ایہی اے جے دواں پرتہیان ہی نہ دتا جائے۔

آہاں! دواں پرتہیان ہی نہ دتا جائے۔ مگر کدوں توڑیں! دواں نی خوبی وی تہ ایہی اے جے دوئے سر چڑھی تہ بولنیاں ہین۔ انہاں نی عادت ہونی اے گھڑیاں قبریں پٹنے نی۔ ایّاں تہ جہاں جہاں لوکاں نا انہاں دواں نال واسطہ پیا اے اوہ تہ ایہی آکھنے ہین جے دواں کی سر کھے باؤ۔ اللہ دواں کولوں بچاوے۔

اک گل تہ سمجھ اشنی اے جے اپوزیشن پارٹی کی تہ اقتدار حاصل کرنا ہونا اے اس واسطے اوہ حکومت پُر حملے کرنی دینی اے مگر کوئی زنانی کولوں کچھ کہ ”اے اللہ نیے بندے!“ تنگی کمر گرہستی تھیں علاوہ ہور کس چیز نی لوڑ اے؟ پہلا دریا بچ رہنا ہووے فرانس مگر مجھے نال بیر رکھے ایہہ کتھے نا انصاف اے؟ ہور اک گل ایہہ وی اے جے اپوزیشن نا کہہ اے اوہ تہ ہر جائی منہہ کھولی کھلتی دینی اے۔ گما ہنڈ بچ، دفتر بچ، کاروبار بچ کھیڈنے نے مدان بچ ہور سیاست نے مدان بچ..... اسیں جتھے ہوساں اُتھے اپوزیشن ہوسی گی ہور ایہہ گل باندے باچھڑ دینی اے جے اپوزیشن نال سنڈھ گنڈ کری گجھ ویلے واسطے ہی سہی ویلہ پٹائی ہوئی سکئی اے۔ پہاویں جے پھر وسہ ٹٹا رہنا اے ہور اُچے درجے نی اپوزیشن نے نال رلی تہ کدے کدائیں حکومت دی بنائی جاسکئی اے۔ مگر کوئی خدا نا بندہ ایہہ دہستے جے منہہ زور منہہ پھٹ ہور اک بہرانی زنانی نال کوئی کسراں ہور کیاں گزارہ کری سکنا اے۔ اسیں کسے کسے نے ہوساں گے ہور جتنے بڑے ہوساں گے اتنی ہی متی اسا ہڑی اپوزیشن وی ہوسی گی۔ مگر زنانی گجھ نہ ہونیاں وی بہوں گجھ ہو جانی اے۔ اتھے توڑیں جے اکس شاعر کی گجھ اسراں وی آکھنا پیا۔

بیوی چھٹانک بھر ہی کیوں نہ ہو
شوہر پہ بھاری ہوتی ہے
ہوتی ہے جب دونوں میں لڑائی
بیوی کی ضرب کاری ہوتی ہے

آہاں! ایہہ چھٹا کی جیتی دے سنے آلی زنانی اپنا آپ منوائی تہ دینی اے۔ لوہے نے چنے چووانی اے۔ پہلاں تہ ماء پیو ہور بہنیں پھر اواں کولوں دؤر کرنی اے۔ فر کمرے نا بٹوارہ کرنی اے۔ اسراں ساریاں کولوں بکھ ہوئی خیمے نے سپنے ور بہنیں مونگ

دلنی دینی اے۔ بیچارہ نہ آپے جو گے رہنا اے ہور نہ اپنیاں جو گے۔ ہر اُس رستے ور ٹرنا اے جس ور زنانی ٹورنی اے۔ اگر کوئے گل میہ مناتاں سدھا کورٹ کچہری مجبنا اے دتھے قانون نے مطابق ساری نی ساری عدالت زنانی نی ہونی اے۔

اصل بچ زنانی ہور اپوزیشن پارٹی صرف ہور صرف خُدا واسطے نا بیر بھانیاں ہین۔ حکومت پہناویں کتنے ہی چنگے کم کیاں نہ کرے، بین الاقوامی سطح ور پہناویں حکومت نی کتنی ہی تعریف کیاں نہ ہور ہی ہووے، مگر اپوزیشن نے منہویں بچ خاک..... اوہ تہ بس ایہ تھوئی لائی رکھنی اے جے اس حکومت سُن ملکے نا ہور عام لوکاں نا بیڑا ہی غرق کر شوڑیا اے۔ ایہ جیہ گجھ حال زنانی نا وی ہونا اے۔ کھرے والا پہناویں لکھ کوشش کرے، تہیا ڈرات اک کری کمائی آنے، مگر زنانی اُس کی نکما ہور نکھٹو ہی آکھسی گی ہور اگر کھرے والا لکھاں کمانے والا ہو سی تاں وی زنانی آکھسی جے ایہہ سب گجھ ماہری قسمت نی وجہ تھیں اے۔ ابھیاں زنانیاں نی وجہ تھیں ہی آج کل گجھ گالیاں ہور بد دعاواں وی وجود وی آگیاں ہین۔ مثلاً ”جائگی کوئی منہہ پھٹ“ تیز زبان ہور چنگڑالو زنانی پہنا پیوے، ”اللہ کرے تو اہری زنانی کدے وی پیو کے نہ جائے ہور تو اہرے سینے ور مونگ دلنی رہے“ وغیرہ وغیرہ۔

اک گل ایہہ وی اے جے اپوزیشن پارٹی ہووے اپوزیشن کرن والا کوئی اک بندہ، بندے کی انہاں جو گے اپنے گوجے بچوں اک دی تہیلا خرچ میہہ کرنا پینا ہور نہ ہی کوئی اپوزیشن کرن والا اُساں کولوں کوئی ابھیا مطالبہ کرنا اے کہ اسیں اُس نا پہنار چکاں ہور اوہ تر و تازہ ہوئی اُساں ور حملے کرنا رہوے۔ مگر زنانی جو گے بندہ اپنے گوجے ہو لے ہی میہہ کرنا سگوں سروں خالی کری شوڑنا اے۔ اگر کدے فاقیاں نی نوبت آئی جائے آپے فاقہ رہی اُس کی کھلانا اے، مگر بدلے بچ فروی نکھٹو نکما ہور فضول خرچ ہی آکھوانا اے۔

ویسے گجھاں دانشمنداں نا آکھنا اے جے انہاں دواں یعنی زنانی ہور اپوزیشن
 پارٹی تھیں بغیر بندے نی زندگی بچ سدھار نیہہ آئی سکنا۔ زندگی نے سفر بچ روک ٹوک
 دی ہوں ضروری اے، کیاں جے ٹھوکر کھانے تھیں بعد ہی عقل اشنی اے۔ ہور ٹہنی
 ٹہنی تہ اٹھنے والا ہی شہسوار آکھوانا اے۔ اگر انہاں گلاں نال واسطہ نہ پیوے تاں بندہ
 سر کھل، بے سرا ہور بے تالا دی آکھوایا جانا اے۔ ایاں وی تکیا جائے تہ قدرت نا
 ایہہ اصول اے جے ہر اک چیز نے مقابلے بچ اک دوئی چیز رکھی گئی اے، جسراں
 جانداراں ہور غیر جانداراں بچ۔ اس واسطے لوڑ اسے گلے نی اے جے بندہ اپنے
 مد مقابل نا سامنا کرے۔ اگر سامنا نیہہ کری سکنا تاں مقابلہ کرے۔ مقابلہ نیہہ کری
 سکنا تاں فر پچ ہی رہوے۔ اسراں پچ رہوے جے ”میرے دشمن توں میری
 دوستی کوتر سے“ نی مکمل تشریح ہوئی جائے۔ اس قدر پچ ہوئی جائے جے مد مقابل وار
 کرے تہ تئساں نا وار بیکار جائے ہور ”بڈھی نارو کھندو لے ور“ آلی گل ہو جائے۔
 تجربہ کار مزید دہسنے ہین جے ایہہ زنانی ہی اے جیہڑی بندے کی نہ صرف اس
 نی اوقات یاد کرانی اے سگوں اس کی اس نی اوقات بچ وی رکھنی اے ہور ایہہ اپوزیشن
 پارٹی ہی اے جیہڑی حکومت کی اس نی ناقص کارکردگی تھیں واقف کرانی اے ہور مذید
 ہون والی پہل چک تھیں بچانی اے۔ لہذا دواں کولوں ہڈوں ناراض ہون نی لوڑ نیہہ۔
 بس اک احتیاط ضروری اے کہ دواں نال جتھے توڑیں دی ہووے مقابل آرائی تھیں
 بچیا جائے۔



چچے

ایک چچہ چاہیے اپنی بڑھائی کے لئے
کچھ تو پاس ہوا اپنے، خود نمائی کے لئے

حضرات! قدیم وقفاں بیچ چچے بالکل میہ سن ہونے۔ صرف چچے ہی میہ اُجے
جیہ گجھ وی میہ سی ہونا، مگر زندگی اُس ویلے وی ہے سی۔ انسان پتراں سنگ اپنا تن
کجنا سی۔ کچا کھانا سی۔ فر اُس بلیاں بلیاں پتھر نے ہتھیار تہ پہنا نڈے بنانا شروع
کیتے۔ پہنا نڈیاں برتتاں نے نال چچیاں فی ضرورت کی کدوں ضروری سمجھیا گیا، اِس
بارے بیچ یقین سنگ گجھ وی میہ آکھیا جائی سکنا۔ البتہ چچیاں فی اہمیت تہ افادیت نے
مد نظر ایہہ آکھیا جائی سکنا اے کہ کھانا پکانے فی نوبت آونے نال ہی چچیاں نے وجہ دنا
ہونا ضروری سمجھیا گیا ہوسی۔ پہنا ویں ہی پتھر یا لکڑی نے بنائے گئے ہوسن گے۔ بعد بیچ
گزرنے وقت نے نال نال ہر چیز نارنگ روپ بدلنا تہ معیار اُچھا ہونا گیا تہ نال نال
چچیاں ناوی.....!

اُج بزار بیچ بکھ بکھ قسماں نے اک تھیں اک بدھ چچے موجود تہ دستیاب ہین۔
مثلاً پلاسٹک نے چچے، سٹیل نے چچے، تانبے نے چچے، لکڑی نے چچے، سونے تہ چاندی
نے چچے، کھانا پکانے نے چچے، ہر دیگ نے چچہ تہ پتھر کی کانٹے سمیت کھانا کھانے
والے چچے وغیرہ۔

نکے قد کاٹھ والے چچے جس ویلے کھانا کھانے واسطے وچ دینج آئے تہ بے شمار لوکاں چچیاں سنگ کھانا پینا باعثِ عزت تہ فخر سمجھیا اے تہ جہاں لوکاں کی چچے میسر نیہہ ہوئی سکے یا پسند نیہہ آئے، انہاں کئی کئی دلیلاں پیش کیتیاں کہ ”ہتھاں نے ہونے ہوئیاں چچے کیاں؟“ ایہہ تہ باندے باندے ہتھاں نی توہین ہوئی نا.....!“ تہ ”جیہڑا مزہ انگلیاں چٹنے چچ آئے اوہ چچیاں بچ کتھاں؟“

مگر انہاں ساریاں دلیلاں تہ گلاں نے باوجود آج وی بے شمار لوک چچیاں نال ہی کھانا پینا پسند کرنے ہین۔ انہاں بچوں کجھ ایچے نازک تہ نفاست پسند ہونے ہین کہ انہاں کی اگر موقعے اُپر چچہ نہ لیجے تہ اوہ کھانے تھیں ہی پرہیز کری چھوڑنے ہین۔ صرف بڑے ہی نیہہ عام طور اُپر بچے وی چچے نال ہی کھانے نی ضد کرنے ہین۔ اس واسطے چچیاں نی اہمیت ضرورت تہ افادیت یعنی فائدیاں تھیں کسے کی وی انکار نیہہ اے۔ چچیاں نی اک خاص صفت ایہہ وی اے کہ پلیٹ ہووے یا ہنڈی، دیگ خالی ہونے نی صورت بچ چچے کھانے والیاں کی آگاہ کری چھوڑنے ہین۔ ویسے ساگ سلونا ہووے یا بریانی پھٹ، تھجے سدھے ہوئی تہ چچے کر یڑیاں تک باہر کڈھی آنے بچ کامیاب ہوئی جانے ہین۔ دراصل کامیاب نالے کارگر چچے اوئی ہونے ہین جیہڑے ہر ہنڈی بچ فٹ ہوئی جانے ہین۔ یعنی چچیاں واسطے ہر دیگ ناچچہ ہونا ضروری اے۔

اس تھیں علاوہ چچے کجھ بڑے بڑے کم کرنے ہوئیاں وی نظر آونے ہین۔ ہتھیار نے طور اُپر چچے نہ صرف بندے نافع تہ حفاظت کرنے نے کم آونے ہین سگوں مارنے نے کم وی آونے ہین۔ زیادہ تر کھڑ والیاں چچیاں نی مدد نال ہی اپنے اپنے کھڑ والے کی فرمانبرداری، مطیع تہ اپنے سائے پٹھر رکھنے بچ کامیاب رہنیاں ہین۔ اس

واسطے تہ اک کھر والے کی شاعرانہ انداز بچ کجھ اسراں وی آکھن پیا ے

اس مقابلے سے بہتر ہے ہار مان لوں میں اپنی

میرے ہاتھ آئی جھاڑو بیوی نے چچھ اٹھا رکھا ہے

بہر حال انہاں چچیاں تھیں ہٹ کے تکیا جائے تہ اساہڑی جینی جاگنی دُنیا بچ

اساہڑے جیسے جینے جاگنے چچیاں نی وی کوئی کمی تہ کہنا ٹانیہ اے تہ انہاں جینے جاگنیاں

چچیاں نی اہمیت افادیت تہ کارگزاری کھانے پینے والے چچیاں تھیں کئی گنا زیادہ مٹی

جانی اے۔ انہاں نی اسے اہمیت تہ افادیت نے مد نظر ہی اُساں کی ایہہ آکھن پیا اے کہ ے

ایک چچہ چاہیے اپنی بڑھائی کے لئے

کچھ تو پاس ہوا اپنے خود نمائی کے لئے

گجھ سیانے لوک اپنے منہ بچ سونے چاندی نے چچے لئی اس دُنیا بچ آونے

ہین۔ عام طور اُپر ایہہ منیا جانا اے کہ بڑے لوکاں نے بے شمار چچے ہونے ہین۔ اتھے

تک کہ جیہڑے لوک اپنے منہ بچ سونے چاندی نے چچے لئی پیدا ہونے ہین انہاں

کی وی مزید چچیاں نی لوڑ ہونی اے تاں جے اوہ اپنے آپ کی متے بڑے نالے

بڑیاں کولوں وی بڑا آکھوائی سکں تہ دُویاں لوکاں کی اپنا بڑا پن دہسی سکں۔ مگر

اساہڑی طراں نے لوک جنہاں کی چچے میسر ہی نیہہ ہوئی سکے اوہ اپنے دل کی گجھ

اسطراں ٹھنڈا بنے ہوئے نظر آونے ہین ے

عزت و شہرت ملتی ہے اپنے کام سے

چچوں کے کہنے سے کوئی بڑا نہیں ہوتا

مگر اس حقیقت کی وی نظر انداز نیہہ کیتا جانی سکنا کہ جیہڑے کم کاج

اک بندہ خود نیہہ کری سکنا اے اوہ سارے کم کاج چچے بڑی آسانی سنگ کری سکے

ہین۔ دراصل چچے اک قسم نا ہتھیار ہونے ہین تہ ظاہر اے، ہتھیاراں نی مدد سنگ کوئی وی کم ہووے جس نوعیت نا مرضی ہووے بڑی آسانی سنگ ہوئی سکنا اے۔ اس واسطے تہ ہر کبھی تھیں نا کام تہ نامراد ہوئی جانے والا بندہ آخر ایہہ خواہش تہ تمنا کرنا ہو یا نظر آونا اے۔

کہیں بھی دال گلتی نہیں ہے ہماری

اب کوئی چچہ چلا کر دیکھتے ہیں

دراصل اس نسنی مچھنی تہ مصروف دنیا بچ ساریاں کی چچیاں نی لوڑ ہونی اے، کیاں کہ چچے دست راست ہونے ہین۔ یعنی نہایت ہی مددگار ہونے ہین۔ مگر متیاں لوکاں نی مشکل ایہہ اے کہ اوہ پہچان ہی نہیہ کری سکنے کہ کیہ بندہ چچہ گیری نے قابل اے تہ کیہ نہیہ اے۔ دراصل چچے ہر جگہ آسانی سنگ لہی سکنے ہین، مگر شرط ایہہ اے کہ ٹس اپنیاں اکھیاں کھلیاں رکھو، نظر تیز رکھو تہ مشاہدہ ڈوہنگا کرو۔ کن وی کھلے رکھو، سٹو تہ بھو۔ ٹرنیاں پھر نیاں ہوئیاں، ٹرنے پھرنے لوکاں کی غور سنگ تلو تہ غور سنگ سٹو۔ مثال نے طور اُپر اگر ٹس اپنا کوئی نکا جیبا بیگ یا کوئی دوڑا تر یا سامان آسانی سنگ چائی چکی ٹری رہے ہو تہ کوئی دوڑا بندہ خواہ مخواہ ہی ٹساں نا سامان چلنے واسطے تیار اے تہ ٹس سمجھی جاو کہ ایہہ بندہ چچہ گیری کرنے نے قابل اے۔

ٹسیں اگر اپنے دفتر بچ کوئی بڑے افسر ہو تہ ٹساں نی خدمت واسطے اگر مخصوص بندہ وی موجود اے، مگر اس نے باوجود کوئی دوڑا تر یا بندہ ٹساں نے کم کاج کرنے واسطے پہل کرنا اے۔ ٹساں واسطے خوشی خوشی اٹھک بیٹھک کرنا اے۔ ضرورت تھیں وی زیادہ سرکار..... سرکار تہ جناب..... جناب کرنا اے، تاں ٹس سمجھی جاو جے چچہ گیری واسطے ایہہ بندہ نہایت ہی موزوں تہ مناسب اے۔ اگر کوئی ٹساں نی

ایویں کیویں ہی تعریف کرنا رہنا اے۔ ٹساں بیاں خوبیاں گنتا رہنا اے تہ ٹساں کی علم وی اے کہ ٹس انہاں خوبیاں نے قطعی طور اُپر مالک نیہہ ہو بس ٹس سمجھی جاؤ کہ ایہہ بندہ چچہ یعنی ٹساں نادستِ راست بننے نے قابل وی اے نالے چاہنا وی اے۔

البتہ انہاں غیرت مند تہ انا پرست لوکاں نا کوئی کسراں چچہ بنی سکنا اے، جیہڑے اپنی تعریف سننے تھیں بعد خوش ہونے نے بجائے اپنے تصورات شاعرانہ انداز تہ شاعرانہ زبان بچ اس طراں دینے ہین ۔

تہہاری چکنی چڑی باتوں میں آجاؤں

میں چچہ نواز وہ جناب نہیں

بے جان چچیاں نی طراں جاندار چچہ وی کئی قسماں نے ہونے ہین تہ بکھریاں بکھریاں صفتاں تہ وصفات نے مالک ہونے ہین۔ مثلاً مطلبی، خود غرض تہ ہوشیار قسم نے چچہ، معصوم، بے غرض تہ بے لوث قسم نے چچہ، دفتری چچہ، سفری چچہ، سیاسی چچہ تہ بے ضمیر چچہ وغیرہ۔

مطلبی، خود غرض تہ ہوشیار قسم نے چچہ متے چرتوڑیں کسے نی چچہ، گری کرنے نی صلاحیت تھیں محروم ہونے ہین۔ ایہہ صرف اپنی غرض و غایت واسطے اداکاری کرنے ہین۔ مطلب نکلیاں ہی منہہ پھیری پٹنے ہین یا فر زیادہ تھیں زیادہ کمائی نی خواہش بچ کسے ہوئی سیوانچ مصروف ہوئی جانے ہین۔

معصوم، بے غرض تہ بے لوث چچیاں کی اپنی غرض و غایت نیہہ سروں ہی کوئی پرواہ نیہہ ہونی۔ انہاں نے اندر ہمدردی نا اک جذبہ موجود ہونا اے۔ اوہ صرف تہ صرف کسے نے کاری تہ کم آونا چاہنے ہین تہ کسے نی خوشی تہ چاہت حاصل کرنے واسطے اُس نے اگے کچھ تہ چوفیری پھرنے رہنے ہین۔ مگر ایہہ تہ اُساں جے نکمے

لوک ہیں جیہڑے خود بخود کسے نے کم میہ آسکے، مگر کم آونے والیاں کی چچہ چچہ آکھنا شروع کری پنے ہیں۔

اسے طراں لگ بھگ ہر سرکاری دفتر بچ وی گجھ ایچھے مخصوص بندے ہونے ہیں، جہاں نے ذمے دفتر نا کوئی خاص کم کاج ہووے یا نہ ہووے، مگر اوہ دفتر نے اندر تہ باہر روز ہی منڈلانے رہتے ہیں۔ چار چو فیری چکر لانے رہتے ہیں۔ ایہہ اصل بچ دفتر تچھے ہونے ہیں۔ افسر نیاں اکھیاں نے تارے ہونے ہیں تہ انہاں نے اپنے وارے نیارے ہونے ہیں۔

ٹرانسفر، ایڈجسٹمنٹ یا کوئی وی دفتری کم ہووے انہاں فی مدد ہندے سویر کم کروانا بڑا اوکھا ہوئی جانا اے۔ لیکن انہاں کی اپنا بنائی تہ انہاں نے ذریعے کم کردانا بیوں اُساں ہوئی جانا اے۔ کیاں کہ انہاں نا رابطہ سدھے طور اُپر دفتر نے بڑے افسر سنگ ہونا اے۔

سفری تچھے ٹرنے پھرنے تہ سیر و سیاحت بچ یقین رکھنے ہیں۔ ٹس کدھرے وی جاو، مشرق پہاویں مغرب، سفری چچیاں کی اپنا ہم سفر بنائی ہنو۔ اوہ خوشی خوشی ٹساں نے نال ٹر پیسن تہ ٹساں نا ہر کم کاج چچی نجی تہ کدی کدی کرسن گے۔

سیاسی تچھے سب تھیں زیادہ کم کاج بچ مصروف رہنے والے ہونے ہیں۔ جوڑ توڑ بچ لگے رہتے ہیں۔ ذہنی طور اُپر وی تہ جسمانی طور اُپر وی مصروف رہنے والے ہونے ہیں۔ جتنا بڑا انہاں نا کم کاج ہونا اے اتنی ہی بڑی انہاں فی غرض و غانت وی ہونی اے۔ ایہہ اپنے مالکاں تہ لپڈراں نے اشاریاں اُپر نچنے ہیں۔ خاص طور اُپر الیکشن نے دناں بچ مرنے مارنے تک تیار رہتے ہیں۔ تکیا جائے تہ اصل بچ سارے ہی تچھے سدھے سادھے ہونے ہیں تہ بعض ایسے بے خبر تہ سستے ہوئے ہونے ہیں کہ انہاں کی خبر تک میہ ہونی جے

اودہ کسے نے چچے بنی گئے نے ہین۔ چالاک تہ کھاگ قسم نے لوک ایچے بے خبر چچیاں کی استعمال کری، قتل، اغوا، چوری تہ اسمگلنگ جے کم کروائی ہنے ہین۔

تکلیا جائے تہ چچہ نوازی تہ چچہ گیری نادارہ وسیع اے۔ کھر گرہستی تھیں ہنی تہ بین الاقوامی سطح تک چچہ نوازی تہ چچہ گیری دوئے سنگ سنگ چل رہے ہین۔ بلکہ بین الاقوامی سطح اُپر ایہہ چیزاں کجھ زیادہ ہی واضح انداز بچ کم کرنیاں نظر آونیاں ہین۔ بین الاقوامی سطح اُپر کوئی چچہ نوازی کری رہنا اے تہ کوئی چچہ گیری۔ کجھ مُلک عذاب تہ عتاب تھیں بچنے واسطے تہ کجھ مُلک اپنی شان بچ باہداتہ بڑھاوا کرنے واسطے چچہ گیری کری رہے ہین۔ جیہڑا چچہ گیری میہہ کرنا اے اودہ مات وی کھانا اے تہ نالے ماروی تہ آخر تباہ نالے برباد ہوئی تہ ریہی جانا اے۔

بچ تہ ایہہ اے جے چچہ نوازی تہ چچہ گیری اک فن اے اک ذہانت اے اک قابلیت اے زندگی نی ضرورت اے تہ عام طور اُپر زندگی نی ضامن وی اے۔ عالمی سطح اُپر چچہ نوازی تہ چچہ گیری تکی تہ ایہہ آکھنا پینا اے کہ ”ایہہ دُنیا ہی چچیاں نی اے تہ چچیاں نے سہارے اُپر ہی چلنی اے۔“

ہُن ضرورت اِس گل نی اے کہ چچیاں کی تہ چچہ گیری کی عزت تہ احترام نی نظر سنگ تکلیا جائے، کیاں کہ چچیاں نے وی اپنے کجھ اصول ہونے ہین۔ اودہ جس سنگ وی بُجوی جان، آخردم توڑیں ساتھ نبھانے ہین۔ دَل بدلو میہہ ہونے ہین۔ ایہہ ہی وجہ اے کہ شاعراں وی چچیاں کی اہمیت دتی اے تہ چچیاں نی شان بچ قسم قسم نے شعر لکھے ہین۔ مثلاً۔

اُن کے پاؤں زمیں پر نہیں پڑتے
اُنہیں چچوں نے سر پے اٹھا رکھا ہے

وہی بڑا ہے، بڑی ہے اُس کی ہر بات
 جس نے چچوں کو ساتھ ملا رکھا ہے
 سب گن گاتے ہیں اُسی کے
 جس نے چچوں کو اُگلیوں پہ نچا رکھا ہے
 وہ تو کب کا پکڑا گیا ہوتا مگر
 چچوں نے اُسے کہیں چھپا رکھا ہے
 وقت آنے پہ استعمال کر لیں گے
 ہم نے بھی اک چچہ چھپا رکھا ہے
 دودھ میں اُبال آئے بھی کیسے
 اماں جی نے برابر چچہ چلا رکھا ہے
 سازش ہی لگتی ہے یہ کسی چچے کی
 بھائی کو بھائی سے لڑا رکھا ہے
 نچلے بیٹھتے ہیں نہ بیٹھنے دیتے ہیں
 چچوں نے ہمیں ہر دیگ کا چچہ بنا رکھا ہے
 سچ پوچھئے تو یہی کہنا پڑے گا زُلفِ
 چچوں کے سوا دُنیا میں کیا رکھا ہے



کھڑ والی

بیوی نے بارے بچ آکھیا جانا اے کہ ایہہ اک تلخ تہ کھٹا، مٹھا میوہ اے۔ اس میوے کی کھانے والا وی پچھتانا اے تہ جیہڑا ایہہ کھانا، اوہ وی پچھتانا اے۔
جی ہاں! اس میوے کی جیہڑا حاصل میہہ کری سکنا، اس کی افسوس کرنے تہ تلیاں ملنیاں ہونیاں ایہہ گپت گانیاں سنیا جانا اے..... ”اک تُو جو نہ ملی، یہ دُنیا ملے بھی تُو کیا ہے۔“

تہ جیہڑا اس کی حاصل کرنے بچ کامیاب رہنے ہین، اصل بچ انہاں فی حالت وی کوئی چنگی تہ بہتر میہہ ہونی اے۔ ایہہ حقیقت اے کہ بیوی نے بغیر زندگی اڈھی ادھوری بلکہ پوری دُنیا ہی اڈھ کر ڈھی ہونی اے۔ اسے واسطے تہ ہر بندہ جوان ہونیاں ہی اک عدد زانی نے خاب تگن لگ پینا اے۔ ایہہ وی اک سچ اے جے بھوں سوچی سمجھی تہ بڑی ٹھونڈ لوڑ تھیں بعد زانی نا انتخاب کیتا جانا اے، تاں جے بعد نے مسئلایاں تھیں پچیا جائی سکے۔ لیکن اس ساری احتیاط نے باوجود جس ویلے بیوی سنگ واسطہ پینا اے تہ بندہ اس حقیقت تھیں واقف ہونا اے ”یہ شاخ لکھدار تلوار بھی ہے۔“

ہُن اِس تلوار نے وار تھیں بچنے واسطے اوہ ہر حربہ استعمال کرنا اے۔ کدے وارنا مقابلہ وار سنگ کرنا اے کدے پیار محبت تہ کدے اپنی بے بسی تہ دکھ درد نا اظہار کرنا اے۔ جس ویلے اُس ناہر حربہ تہ ہر حکمت نا کام ہوئی جانی اے تہ اوہ بے بس ہوئی تہ ریہی جانا اے اُس ویلے اوہ غور تہ فکر نی بکھی تہیان دین لگنا اے تہ جس ویلے بہت زیادہ سوچ تہ وچار بچ ڈبنا اے تہ فلسفی تہ فلاسفر نے درجے تکر جانی بچنا اے۔ ”تقدیر کہہ اے تہ تدبیر کہہ ہے؟ اوہ کس کی الزام دے کس اُپر اعتبار کرے“ اوہ انہاں گلاں اُپر غور تہ فکر کرن لگنا اے۔ سوچنیاں سوچنیاں عام طور انہاں چیزاں اُپروں اُس نا اعتبار تہ اعتقاد ہی اٹھی جانا اے۔ سگوں اوہ دُنیا نے ہر کاروبار تہ بیوی سمیت دُنیا نی ہر چیز کی فضول تہ اک تھو کھا کھن لگنا اے۔ سوچ وچار بچ ڈبیاں ڈبیاں اُس کی بُورگاں نیاں گجھاں گلاں تہ اکھا ناں نے مطلب تہ مفہوم سمجھ بچ آن لگنے ہن۔ مثلاً جس کی نیک بیوی لکھنی اُس نا کُہر جنت ہونا اے۔ ایہہ تہ اسے طراں نیاں آکھیاں نیاں گجھاں ہور گلاں نی حقیقت نال اوہ چنگی طراں واقف ہون لگنا اے۔

اپنے بیاہ تھیں پہلاں بندہ جنہاں خاباں تہ خیالاں بچ مست رہنا سی اک اک کری تہ سارے خاب خیال چکنا چڑ رہون لگنے ہن۔ کئی بندرا زکھلنے ہن۔ نویں نویں حالات پیدا ہونے ہن۔ اصل حقیقتاں تہ سچائیاں نال واقف ہونے تھیں بعد بندہ اپنیاں پہلیاں خوش فہمیاں تہ سوچاں اُپر اپنے آپ ہی ہسن لگنا اے۔ بیاہ تھیں پہلاں اگر اُس ایہہ سُنیا سی کہ ”جس کی نیک بیوی لکھے اوہ خوش نصیب ہونا اے یا ایہہ کہ ”بیوی چاہوے تہ کُہر کی جنت بنائے چاہوے تہ جہنم“ تہ اوہ بس اتنا ہی سوچی سکنا سی کہ ”بیوی نیک ہی ہونی اے۔ کُہر والے نی عزت ہونی اے۔ کُہر بار کی سہا لئی اے تہ نیک ہونیاں ہونیاں اوہ کُہر کی جنت بنانے نے بجائے جہنم کیاں بنا سی گی؟

سُکھ آرام تہ اُس کی وی چاہی نا ہونا اے۔ ایہہ آکھنے والے تہ بس ایٹاں ہی چٹھیاں
سدھیاں گلاں آکھنے رہنے ہین۔“

تلوار تہ نیام تھیں بندے کی یاد آنا اے کہ کالسری کی مستور منیا جانا اے۔ اس
نے واسطے پردہ ضروری ہونا اے۔ جس طراں تلوار واسطے نیام ہونی اے اسے طراں
کالسری واسطے پردہ ہونا ضروری اے، کیاں کہ دوئے اک جیسیاں ہونیاں ہین۔ اس
طراں سوچنیاں ہونیاں بندہ پہلی بار پردے نی اہمیت تہ افادیت تھیں وی واقف ہونا
اے۔ بیوی نے ہتھوں ستایا نا بندہ ہور وی بہوں کجھ سوچنے سمجھنے اُپر مجبور ہوئی جانا
اے۔ اوہ زندگی نے دُورے تریئے مداناں بچوں اپنے آپ کی سمیٹن لگ پینا اے۔
اک عدد بیوی ہی اُس نے واسطے اک گھلا تہ بڑا وسیع مدان ثابت ہوئی جانی اے۔
اسے مدان بچ ٹھینیاں اٹھنیاں تہ نسنے پہنچیاں اُس نی ساری عمر گزری جانی اے۔

بیوی نے ہتھوں ستایا ہو یا بندہ اگر اک کامیاب بزنس مین اے تہ سب تھیں
پہلاں اُس نا کاروبار ڈانواں ڈول ہوسی گا۔ کل تک جتھے اوہ اپنے کاروبار کی مذید ترقی
دینے نے بارے بچ سوچے کرنا سی۔ ہُن اوہ کاروبار تھیں ہی بے زار ہوئی جاسی گا۔ ”اوہ
آخر اس سب کاروبار کی کہہ کرسی تہ کس واسطے کرسی؟ اک بیوی اے اوہ وی بے قابو
اے۔ میں دھن دولت نا کہہ کرنا اے۔ بھاڑ بچ سب کجھ جائے ماہری بلاتھیں.....!“ اس
طراں ترقی کرنے نے بجائے بندہ زوال تہ تنزل نی طرف آونا اے تہ نال پچھتاوا دی چاہنا
اے۔ اگر کوئی ملازمت پیشہ اے بینک ملازم اے کسے ادارے نا ہیڈ اے یا اکاؤنٹنٹ اے
تہ سب تھیں پہلاں اوہ اپنے کم کارج بچ لا پرواہی برتسی گا۔ حساب کتاب بچ اُلٹ پلٹ
کرسی گا۔ اپنی ڈیوٹی بچ کوتاہی کرسی گا۔ پہلاں لیٹ آؤ آوا جائی کرسی بعد بچ غیر حاضر رہنا
شروع کری ہنسی گا۔ اپنے افسراں تہ ماتحتاں سنگ لڑائی چھگلوے شروع کرسی گا۔

جس طراں گجھاں بیماریاں نیاں علامتاں ظاہر ہونیاں ہین اُسے طراں بیوی
 نے ہتھوں ستائے تہ تنگ آئے نے بندے نیاں وی کئی علامتاں ہونیاں ہین۔ مگر
 مصیبت ایہہ اے کہ اُس کی خبر ہی نیہہ ہونی کہ اوہ کس مرض نا شکار ہوئی چکلیا اے تہ
 اُس کی کیہڑی بیماری اندر ہی اندر کھانی پئی اے۔ ظاہری طور اُپر اوہ سب گجھ ٹھیک
 ٹھاک کر رہیا ہونا اے، مگر تکتے سُننے والے سب گجھ محسوس کری پنتے ہین۔ اگے چکھے
 رہنے والیاں کی بخوبی اندازہ ہوئی جانا اے کہ ایہہ بندہ بیوی نا ماریا ہو یا اے۔ اُسے
 طراں گجھ عرصہ تک حالات نا مقابلہ کرنے ہونیاں گجھ عرصے بعد بعض غم نے مارے
 دُوا بیاہ وی کری پنتے ہین۔

نیا کہ کئی گلاں تہ کمالاں بچ دوئی بیوی پہلی بیوی نالوں بالکل بکھ ہوسی، مگر فر
 وی سراسر ایہہ کہنا لے نا سودا اے، کیاں کہ دواں نا آپسی ٹکراؤ تہ چنگڑا تہ اک دُوے
 کولوں بڑھی چڑھی تہ اپنیاں ضرورتاں تہ سہولتاں حاصل کرنے نی دوڑ، کھر والے کی
 تھکائی تہ رکھی چھوڑنی اے۔ بعض تہ بچیاں نی ریس لائی چھوڑنیاں ہین ہو را کہ دوئی
 کولوں اگے بدھنے بچ ہی اپنی کامیابی سمجھنیاں ہین۔ اگر اک نے چار بچے ہین تہ دوئی
 کہٹ تھیں کہٹ چھ یا اٹھاں اُپر جائی نکلسی۔

گجھ غم نے مارے بیوی کی راہ رستے اُپر آنے واسطے اُس اُپر ہتھ تک چکے ہین
 تہ ہتھ چکنا یعنی بیوی کی مارنا آج نے زمانے بچ نہ صرف اک سنگین جرم اے سگوں ابھی
 صورت حال بچ دو مین سیل بچ حاضری، انکوائری تھیں علاوہ لیڈی پولیس نی ماروی
 کھانی پئی سکنی اے۔ یاراں، دوستاں تہ شریکاں کی طعنے مینے مارنے نا موقع ہتھ آئی جانا
 اے۔ صرف ایہہ ہی نیہہ بعض اوقات بیوی نی خود سوزی تہ خود کشی نا الزام وی سر لگی
 سکنا اے تہ ایسی صورت بچ سلاخاں نے چکھے وی جانا پئی سکنا اے۔

بعض بندے مقابلے بچ کھڑے ہوئی جانے ہیں تہ آخر کار خوفناک انجام
 سنگ دوچار ہونے ہیں۔ البتہ اسے دوران کجھاں کی اگر تھوڑا بھٹا صبر کرنا آئی گیا
 اے تہ اوہ مقابلے تھیں باز آئی کہ مفاہمتی تہ اصلاحی انداز اختیار کری کے کچھ حد
 تک سکون حاصل کرنے بچ کامیاب ہوئی جانے ہیں۔ اس نے برعکس بندہ اگر
 عزت مند تہ انا پرست اے تہ اوہ مقابلہ آرائی تہ حریف نی پسپائی واسطے لک بھٹی ہٹنا
 اے۔ اس وقت تکر کہ جد سب کچھ داؤ اُپر نہ لگی جائے تہ اوہ تھکی ہاری تہ نہ ریٹی
 جائے۔ نتیجے نے طور اُپر اوہ اک دن چپ چو پیٹے ہی خود کشی کری ہٹنا اے تہ اُس
 ویلے پولیس تہ باقی والے خود کشی ناراز لوڑنے لوڑنے تھکی جانے ہیں مگر ہتھ کچھ
 نیہہ لگنا اے۔

کچھ بندے جذبات بچ آئی تہ بیوی کی طلاق دیتی تہ اپنے آپ کی کامیاب
 تہ فتح مند سمجھنے ہیں مگر آج کل طلاق دینا دراصل بڑا کہناٹے ناسودا اے۔ اس گل نا
 پہلا نقصان تہ ایہہ ہی اے کہ بندہ اک دم سیکنڈ ہینڈ ہوئی جانا اے۔ اس تھیں علاوہ
 بیوی نامہر نان نقطہ وغیرہ تہ بال بچے اگر نکے ہیں تہ ظاہر اے کہ اوہ ماؤ کول ہی رہسن
 گے۔ اس طراں بال بچے نا خرچہ تہ انہاں نی جدائی وی بکھ! فر داج نے سامان نی
 واپسی سامان اگر نواں اے تہ بہتر اگر استعمال ہوئی تہ پُرانا ہوئی چکلیا اے تاں وقتی
 قیمت نے حساب سنگ اُس نی نقد ادائیگی!.....

اس طراں سب کچھ دیتی دو اہی تہ بندہ خالی ہتھ ہوئی تہ خالی کمر بچ کہلا
 کہہ لکلا بہہ جانے واسطے ہوئی جانا اے۔ اس مرحلے تھیں بعد دُؤے بیاہ واسطے در در
 نیاں ٹھوکراں تہ ہور کئی مسئلے!..... کدھرے وی جاؤ پہلا سوالیہ نشان ایہہ ہی کہ
 پہلی سنگ کیاں نیہہ نبھاہ ہوئی سکلیا؟

بہر حال انہاں ساریاں مسئلیاں تھیں بچنے واسطے ضروری اے کہ بیوی نے معاملے تہ مسئلے بچ اپنی اُنا کی کدے وی نہ آندا جائے۔ ہوئی سکے تہ اس کی پہلی فرصت بچ ہی دلی کچلی تہ سائنڈ اُپر کری دتا جائے۔

بیوی کی سُدھار نے تہ سُدھار کرنے نی کوشش کدے پھٹکی وی تہ نہ کیہتی جائے۔ البتہ اُس واسطے سارے رستے سِدھھے تہ چھوڑے کری دتے جان تاں جے اوہ اپنے ٹیڑھے پن سمیت آسانی سنگ کنگھی سکے۔ اُس نی ساری زور آزمائیاں تہ زیادتیاں کی برداشت کیتا جائے۔

جناب شوہراں (کہر والیاں) نی کامیابی اسے گل بچ اے کہ اوہ کہر نے اندر مار گٹ کھان تہ رجبی رجبی کھان۔ نال ہی صبر تہ تحمل وی رکھن۔ اگر چیخنے چلانے نی نوبت آئی وی جائے تاں اپنی آواز دبی رکھن۔ اتنی مٹھی کہ چار دیواری تھیں باہر نہ نکلے تہ جس ویلے خود باہر نکلن ہشاش بشاش ہوئی کہ نکلن۔ کسے کی کنو کن خبر نہ ہون دیون کہ کیسی گزرنی اے تہ کسراں نی گزرنی اے۔

جہاں کہر والیاں کولوں چوں چڑاں نی واز باہر نکلتی رہتی اے اوہ کسے طور اُپر وی اچھے تہ کامیاب کہر والے اکھوانے نے لائق میہہ ہین۔ بیوی نیاں شکایتاں کرنیاں تہ اُس نیاں زیادتیاں ناہوراں لوکاں نال ذکر کرنا اپنے پیراں اُپر کھواڑی مارنے نے برابر اہونا اے۔

اک چنگا تہ کامیاب کہر والا بننے واسطے ضروری ہونا اے کہ باقی والیاں نال قریبی تعلق تہ رابطے رکھے جان تہ تکلیا جائے کہ اوہ کیہڑے کیہڑے محاذاں اُپر جنگ لڑ رہے ہین۔ دو جیاں نے حالات جانی تہ ایہہ حوصلہ ملنا اے کہ صرف اُس ہی میہہ بلکہ ہو روی کئی بہادر تہ سورا اُساں تھیں وی زیادہ بڑی مصیبتاں بچ گرفتار ہین۔

پہلے وقتاں بچ تہ ہدایت نامہ خاوند پڑھنے فی صلاح دیتی جانی سی، مگر آج کل
 نے حالات کجھ ہو رہیں۔ آج ضرورت ایہہ اے کہ دویاں نے حالات تھیں بندہ باخبر
 رہوے، کیاں کہ دویاں ناغم تکی تہ اپنے غم فی ہدایت بچ کی آونی اے تہ اس طراں بندہ
 سنگین نوعیت نے قدم چلنے تہ خود کشی جیسیاں وارداتاں انجام دینے تھیں بڑی حد تک
 باز رہنا اے۔

اتفاقاً اگر دویاں نے کمر بیوی فی بدولت واقعی ہی جنت ہیں، تاں وی ایہہ
 سوچی کے صبر کیتا جائے کہ اُساں کی آخرت بچ ضرور جنت لکھی گی، جتھے دُراں وی
 ہوسن گئیاں۔ فی الحال اُساں اسے جہنم بچ ہی گزارہ کرنا اے۔



دُشمن

حضرات! اوہ کیہڑا بندہ اے جس نا کوئی دُشمن نیہہ اے! دراصل اِس خوبصورت دُنیا بچ بے شمار سکھاں سہولتاں نے نال نال دُشمنناں نا وی کوئی کہنا نیہہ۔ طراں طراں نے لوکاں کی طراں طراں نے دُشمنناں نا سا منا کرنا پینا اے۔ تکیا جائے تہ ظاہری طور ور ہسنے کھیڈ نے والے لوکاں کی وی اندر و اندر ہی کئی طراں نے دُشمنناں نال پہنا پیا نا ہونا اے۔

ہُن کسے نے کتنے تہ کس کس قسم نے دُشمن ہین اِس گل نا دار و مدار تہ انحصار بندے نے اپنے حوصلے ہمت، طور طریقے، بہادری تہ جوانمردی ور ہونا اے۔ اِس تھیں علاوہ بندے نے لب و لہجے، اخلاق، سوجھ بوجھ، طور طریقے تہ عقل مندی اُپر وی منحصر ہونا اے۔ تُس اگر تنہائی پسند، گوشہ نشین، چُپ چاپ رہنے والے، نکتے تہ بے غیرت جے بندے اوتاں فرٹساں نال کسے کی کس گل نی دُشمنی؟

اک سوال ایہہ وی اے جے دُشمن کیہڑی جگہ موجود ہونے ہین اِس گل نا سدھاجنیا جواب ایہہ اے کہ ”دُشمن کیہڑی جگہ نیہہ ہونے ہین؟“ یعنی تسا ہڑا دُشمن تسا ہڑے کمر اندر وی موجود ہوئی سکنا اے تہ آہنڈ گماہنڈ اُپر وی۔ اِس تھیں علاوہ جتھے جتھے تُس آونے جانے او تہ جس جگہ تُس کم کرنے او یعنی جتھے وی تُس کم کرنے او۔

اس گل بچ وی کوئی شک نیہہ کہ وار کرنے والا کدے کدے اوپر اتہ انجانہ وی نکلتا اے، مگر اس نے چکھے ہتھ کسے واقف کار دشمن نا ہی ہونا اے تہ وار کرنے والا محض اک آلہ کار ہی ثابت ہونا اے۔ اسے واسطے تہ عقلمند لوکاں آکھیا اے کہ ”بہترین دشمن اپنے دوستان تہ عزیزاں بچوں ہی دستیاب ہوئی سکے ہین“۔

تس جانے او بے آج کل ترقی یافتہ دور اے۔ میڈیا، موبائل تہ انٹرنیٹ نا زمانہ اے۔ اس واسطے ایہہ ضروری نیہہ اے بے تس نا دشمن تساں نے باندے ہی ہووے۔ اوہ تساں کولوں مہلاں نے حساب دؤر ہونے ہوئیاں وی اک ریموٹ کنٹرولر نی طراں وار کری سکنا اے۔“

ویسے عقلمند لوک آکھنے ہین بے دشمن کولوں بچو اُس نے ہر وار کولوں بچو تہ اتنے بچو کہ تساں نا دشمن کھسیانی بلی نی طراں کھمبا نوچنا شروع ہوئی جائے۔ بعضے دانائسم نے لوک تہ ایہہ مشورہ دینے ہین بے دشمن کولوں اس انداز سنگ تہ اس حد تک بچو کہ ”میرے دشمن تو میری دوستی کو ترسے“ نا چینا جاگنا اشتہار ثابت ہوئی جاوے تساں نا دشمن تساہڑی دوستی واسطے ترسنے ور مجبور ہوئی جائے۔

بعض سیانے لوکاں نا خیال اے بے دشمن کولوں ڈرنا تہ کہہرانا ضروری وی اے تہ نیہہ وی اے۔ اوہ آکھنے ہین کہ ضروری اس واسطے اے کہ اپنے دشمن کولوں ڈر ہوو کہہر اہٹ نے نتیجے بچ، دشمن نال مقابلہ کرنے واسطے تس کوئی خاطر خواہ انتظام کرسوگے۔ اپنے دفاعی انتظام مضبوط تہ مستحکم کرسوگے۔ اک جدوجہد کرسوگے۔ اس طراں باعمل ہوئی جاسوگے۔ کیاں کہ بیکار رہنا وی کوئی چنگی گل نیہہ اے۔ دشمن نال مقابلہ کرنے واسطے تس وی نوپاں نوپاں چیزاں دریافت وی کرسونا لے ایجاداں وی کرسوگے۔ کیاں کہ تساں کدے وی ایہہ گل سوچی وی نہ ہوئی کہ اک دشمن تساں کی

موجود وی بنائی سکنا اے۔ جی ہاں! ذرا سوچو تہ..... ایہہ تلواراں، نیزے، تہر، چھو، بندوقاں، توپاں، مشین گناں، راکٹ تہ ایٹم بم وغیرہ کس واسطے بنائے گئے ہین۔ اپنے واسطے تہ بالکل ہی نیہہ۔ ظاہر اے کہ ایہہ سب کچھ دشمنان واسطے بنایا گیا اے۔ نال ایجاداں تہ دریا فتاں ناسہراوی تہاڑے سر اُپر الگ تھیں۔

اگر تہساں نا کوئی دشمن نیہہ اے تہ تہس چُپ چاپ، بے فکر، بے ہنر ہوئی جاسو، فر ہتھ اُپر ہتھ تہری بھئی جاسو گے تہ بیکاری بڑی بھیدی چیز اے۔ سارے اعضاء بیکار ہوئی جانے ہین۔ اتھے توڑیں کہ بندے نیاں سوچاں وی محدود تہ مسدود ہوئی جانیاں ہین۔ اسے گلوں تہ سیانے لوک آکھنے ہین کہ ”بیکار کولوں بیکار بھلی چنگی“۔

مگر ”بیکار“ کیاں؟ ٹھہر سارے دشمنان نی موجودگی بچ وی ”بیکار“ کیاں؟ مٹی ہندا کہ تہساں نا کوئی وی دشمن نیہہ اے، کیاں کہ ایہہ وی اک حقیقت اے جے پیدائشی طور و کوئی وی کسے نا دشمن نیہہ ہونا اے، البتہ رشتہ دار ضرور ہونا اے۔ ماء، پیو، بہنیں تہ پھر جیسے رشتے پیدائشی طور پر ہی ہونے ہین، مگر کچھ رشتے بنائے جانے ہین، اسطورا کیلتے جانے ہین۔ مثلاً سس، سوہرا، دیر، جیٹھ، سالی، سالاتہ دوست وغیرہ۔

مختصر ایہہ ہی کہ ایہہ اوہ رشتہ اے جیہڑا آپوں بعد بچ بنایا جانی سکنا اے۔ دوستی تہ نہایت سوچی سمجھی تہ کیتی جانی اے۔ حقیقت اے کہ ہر کسے کی بندہ اپنا دوست نیہہ بنائی سکنا، مگر دشمن بنانیاں کوئی چر وی نیہہ لگنا۔ دشمنی عام طور و رچھٹ پٹ تہ ٹوٹ ہی ہو جانی اے تہ بعض مخصوص حالات نے پیش نظر کدے کدے بڑے ہی منصوبہ بند طریقے سنگ جانی بجھی کیتی جانی اے۔

بہر حال دشمن اوہ مخلوق اے جیہڑی ہر جگہ آسانی سنگ دستیاب ہوئی سکئی اے۔ بس ضرورت ہونی اے تہساں نی اک نیکی جی لغزش، سُستی، غفلت تہ

لا پرواہی نی یا فر غصے نی۔ تَس ذرا جے پھڑ کے نیہہ کہ اگ لگی نیہہ۔ اِس تھیں علاوہ وی دُشمن کئی طریقیاں سنگ تہ کئی چلیاں تہ بہانیاں نال بنائے جاسکے ہین۔ اگر تَس خود گجھاں خوبیاں تہ صفتاں نے مالک ہو تہ تَساں کی چاہنے والیاں نی طراں تَساں نے دُشمنان نی اک جماعت وی اپنے آپ پہ تیار ہوئی جاسی گی۔ نال ہی اگے وی دُشمنان نی تعداد بچ باہدا ہونا رہسی گا۔

لغزش، سُستی، غفلت تہ لا پرواہی نے نتیجے بچ بنے والے دُشمن، انجانے بچ بنے ہوئے دُشمن ہونے ہین، کیاں کہ بندے کی ایہہ پتہ ہی نیہہ ہونا کہ اس کسے نال کدوں، گتھے تہ کیہڑی پہل کیتی اے، جس نی وجہ تھیں کوئی دُشمن بنی گیا اے، مگر بعض لوک جانی کجھی تہ اپنی ذاتی کوشش نال اپنے دُشمن بنانے والے ہونے ہین۔ اوہ جانی کجھی تہ اپنے دُشمن بنانے ہین، تاں جے اپنی بہادری تہ اپنی طاقت اپنے دُشمنان اُپر خرچ کری سگن۔ دُشمنان نے دند کھٹے کری سگن۔ اُنہاں نے ہوش پہلائی سگن۔ چلے چھڑائی سگن۔ اِٹ نا جواب پتھر نال دیسی سگن تہ دُشمن کی حواس باختہ کری سگن۔ دُشمن نے حوالے سنگ اِس طراں نے کرنے واسطے ہزاراں کم ہونے ہین، جیہڑے بندے کی نہ صرف اپنے ہتھیاں سنگ کرنے پینے ہین بلکہ اپنی زبان تہ کئی طراں نے دُوے تریئے طور طریقے سنگ وی کرنے پینے ہین تہ اپنے دماغ کی وی رت نویاں سکیمیاں تہ منصوبیاں بچ مشغول رکھنا ہونا اے، کیاں کہ نیک نامی، بہادری تہ شہرت ایویں ہی مفت بچ نیہہ لہنی۔ اِس کی حاصل کرنے واسطے محنت کرنی پینی اے، مشقت کرنی پینی اے تہ ایہہ سب گجھ اک دُشمن نی وجہ تھیں ہی حاصل ہوئی سکنا اے۔ اِس ساری کارکردگی نے نتیجے بچ بندہ اپنے آپ کی تندرست، چُست، طاقتور تہ باہوش وی رکھی سکنا اے۔

دُشمن نامقابلہ کئی طراں نے طریقیاں سنگ کیتا جانی سکنا اے۔ مثلاً زبان سنگ، ہتھیاں، پیراں تہ ہتھیاں سنگ، نالے سازشاں سنگ..... جسراں کسے اپنی زبان سنگ تُساں نے خلاف زہرا گلیا اے تہ تُس وی بدلے بچ اپنی زبان سنگ زہرا گلسو، سگوں دو گنا زیادہ اُگلسو گے۔ کسے نے اپنے ہتھیاں پیراں تہ ہتھیاں سنگ تُساں اُپر حملہ کیتا اے تہ بدلے بچ تُس وی اپنی دو گنی طاقت نال اپنے دُشمن اُپر حمل کر سو گے۔

بے شک اِس قسم فی دُشمنی بچ چرچا خوب ہونی اے۔ ڈاڈا ہلہ غلہ مچنا اے۔ رولہ رپہ پینا اے۔ تماشائی اکھٹھے ہونے ہین۔ بندے فی عزت تہ شہرت کی چارچن لگنے ہین۔ اپنے اپنے ہمدرد تہ خیر خواہ باندے اشنے ہین، نالے اپنے تہ پرائیاں فی پشان ہونی اے۔ مگر گجھ کم ہمت، کمزور دل تہ پست حوصلے والے لوک اپنے دُشمن نامقابلہ اِس انداز بچ تہ اِس رولے رپے والے طریقے نال بالکل ہی میہہ کرنے ہین، اُنہاں نا آکھنا اے کہ ایہہ طریقہ سراسر ظلم تہ زیادتی اے، نالے جڑ تہ جبر اے۔ ایہجے لوکاں نا پہناویں کوئی کتنا ہی بڑا دُشمن، کیاں نہ ہووے تہ پہناویں بکے تھیں نکا دُشمن ہی، کیاں نہ ہووے، اوہ بس اپنے ہر دُشمن کولوں ڈرنے رہنے ہین تہ اس کولوں دُردور نسنے پچھنے رہنے ہین۔ اوہ آپوں تہ ایہجی کوئی حرکت میہہ کرنے ہین جے جس تھیں کسے کی پتہ لگے کہ فلانا فلانا نہ اُنہاں نا دُشمن اے۔ یا فر ایہہ کہ ایہہ خود کسے نے دُشمن بنے ہوئے ہین۔ اصل بچ اک مصلحت تہ درگزر انہاں لوکاں نے، سر اُپر سوار ہونی اے تہ دُشمن انہاں نے، سر اُپر سوار رہنا اے۔ مگر کہہ مجال کہ ایہجے مصلحت پسند لوک اپنے دُشمن نے مقابلے بچ باندے آئی جان۔ دراصل مصلحت پسند ایہہ ہی لوک اپنے دُشمن ناموصلہ بدھانے رہنے ہین، مگر اُنہاں کی مدان بچ آونے ناموقعہ کدے وی میہہ دینے ہین۔ اتھے تکر جے آخر اُنہاں نا دُشمن تھکی ہاری تہ پئی جانا اے۔

دراصل ”میرے دشمن توں میری دوستی کو ترسے“ ناپیغام دینے والے ایہہ ہی
 بُزدل تہ کم ہمت لوک ہونے ہین۔ اُساں ایہجے کئی شیر تکے ہین کہ اُنہاں نا دشمن اُنہاں
 اُپر ہر حربہ استعمال کرنا اے، مگر اوہ اگے تھیں لُس تھیں مس نیہہ ہونے ہین۔ اُنہاں نا
 دشمن چاہنا اے کہ اوہ مشتعل ہوئی تہ کوئی جوابی کاروائی کرن تہ اوہ اُنہاں نی عزت مٹی
 بچا ملائے تہ اُنہاں نی مٹی پلپد کری تہرے۔ مگر اوہ کجھ ایہجے تہ اِس قدر بُزدل، کم ہمت
 تہ ڈرپوک ہونے ہین کہ دشمن نے ہر وار تہ ہر حملے کی بیکار کری چھوڑنے ہین۔ کدے
 سچے تھیں تہ کدے کھبے تھیں نکلی جانے ہین تہ کدے لفکا کھائی بچی جانے ہین تہ اُنہاں نا
 دشمن بس دُند رمتی تہ رہی جانا اے۔ اُنہاں ہی بُزدل لوکاں بچوں بعض ایہجے وی
 ہونے ہین جیہڑے اک لے عرصے توڑیں خاموشی سنگ پر کھنے تہ سمجھنے رہنے ہین تہ
 جس ویلے آپوں رچی تہ پرچی جانے ہین اُس ویلے بس اتنا ہی آکھنے ہین۔

لڑائیاں دیکھ لیں، مار کٹائیاں دیکھ لیں
 بھلا ہو دشمن تیری سب بُرائیاں دیکھ لیں

مگر بعض بہادر تہ حوصلہ مند لوک دشمن سنگ مقابلہ کرنے واسطے ڈٹ جانے
 ہین۔ اپنی ذاتی تہ کئی بڑے کم سٹی سٹائی، چھوڑی چھڑائی تہ بڑے جوش تہ خروش نال
 اپنے دشمن نال مقابلہ کرنے ہین۔ باقی والیاں کی وی دشمن نال ڈٹ جانے تہ بدلہ
 لینے ناپیغام دینے ہین۔ نال ہی فائدے وی گننے رہنے ہین۔ اُنہاں نے مطابق دشمن
 نی حیثیت اک رشتہ دار جیسی ہونی اے تہ ایہہ رشتہ نبھانا بیہوں ضروری ہونا اے، کیاں
 کہ اک دشمن ہی ایہہ پہچان کروائی سکنا اے کہ تِساں نا دوست کون کون اے۔ تِساں
 نے پرالے واسطے کیہڑا اگے آئی رہیا اے۔ ورنہ اک سدّھا سادا بندہ تہ ساریاں کی
 ہی دوست سمجھی تہ بیٹھا رہنا اے۔ اُنہاں نے مطابق دشمن اک پہچان دینا اے، شہرت

دینا اے بندے نے معیار تہ دم خم نا اتہ پتہ اک دشمن نی بدولت ہی ہوئی سکنا اے تہ
 اس گل ناوی پتہ لگی جانا اے کہ اپنے دشمن نا مقابلہ یا اس اُپر حملہ کرنے ہوئیاں اوہ
 کیہڑے کیہڑے ہتھیاراں تہ اوزاراں نا استعمال کرنا اے۔ یعنی چنگے تہ معیاری
 ہتھیاراں نا استعمال کرنا اے یا اوچھے واراں نا سہارا ہٹا اے۔ اس قسم نے لوک دشمن
 کی بڑی قدر نی نگاہ سنگ تنکنے ہین تہ دشمن نا ہونا نہایت ضروری سمجھنے ہین۔ اوہ اس
 گل کی کھلے دل سنگ مننے ہین کہ دشمن عمرت تہ سبق سکھانا اے تہ جیہڑا سبق تہ سکھ
 اک دشمن سکھانا اے اوہ سبق تہ سکھ اک بڑے تھیں بڑا استاد وی میہ سکھائی سکنا اے
 کیاں کہ دشمن آزمائش بچ بانا اے امتحان کہنتا اے تجربے بچوں کڈھنا اے نیکی تہ
 بدی نی پہچان کروانا اے تہ گندن بنانا اے۔ انہاں لوکاں نے مطابق جس نا کوئی
 دشمن میہ اے اوہ بے سُر اے بے تالا بے لگام تہ غیر شائستہ بندہ اے۔ ایہہ صرف دشمن
 ہی اے کہ جیہڑا اک بندے کی کیہڑے ویلے گتھے تہ کس طراں بولنا اے سکھانا
 اے۔ ایہہ دشمن ہی اے جیہڑا اک بندے کی گل بات کرنے نا ہنر تہ سلیقہ سکھانا اے۔
 اتھے تک کہ دویاں کی الزام دینے یا مندیاں چنگیاں آکھنے ناوی سلیقہ تہ ہنر سکھانا
 اے کیاں کہ دشمن ہر کم اُپر نظر تہ ہر گل اُپر پکڑ رکھنا اے۔ حرام زادے تہ رام زادے
 بچ فرق کروانا اے تہ اک بے لگام تہ سرکش کی اپنیاں حداں نے اندر محدود رکھنا اے۔
 غور سنگ تکیا جائے تاں دشمن نے ہو روی بے شمار فائدے ہین۔ سرور عثمانی
 ہوراں نے مطابق ے

زیست کا قصہ سمٹ کر بند مٹھی میں رہا
 جب تک مجھ کو خیال دشمن جانی نہ تھا
 ہاں جی! تکیا تھساں کہ دشمن نا خیال آونے نال ہی زندگی اڈن لگ پئی اے۔

دوستاں تہ خداں پار کرن لگ پئی اے۔ دشمن تھیں بغیر کہہ خاک زندگی سی۔ بس اک
مٹھی بچ بند تہ محدود۔

ہُن غالب ہوراں کی وی سُو ے

دشمن کا زیادہ تم سے ہے مجھ کو ملال

دشمنی کا لطف، شکووں کا مزا جاتا رہا

یعنی دشمن نی وجہ تھیں بندے کی گل بات کرنے واسطے اک موضوع لھیا رہنا
اے۔ اپنے پرائیاں تہ یاراں دوستاں نی محفل بچ دشمن ناچر چاہتہ گل بات نا موضوع بنا
رہنا اے۔ سچ کچھو تہ ہر پل ہر کہڑی کھل مکھلیاں تہ تصور بچ وی دشمن ہی رچیا بسیا
رہنا اے۔ اس طراں جذبیاں تہ جوش کی زندہ رکھنا اے۔

اس تھیں علاوہ وی دشمن بڑے کم نی چیز اے۔ دشمن نے سپنے اُپردال وی دلی
جائی سکنی اے تہ کئی کئی طور طریقیاں سنگ دلی جائی سکنی اے۔ دشمن ٹساں اُپر کئی کئی وار
کرے۔ تابد توڑ حملے کرے۔ ہر حربہ استعمال کرے۔ ٹساں کی اشتعال دے، مگر ٹس
ٹس تھیں مس نہ ہوو۔ اس نی خواہش نے مطابق رائی برابر وی پورے نہ اُترتہ ایہہ
دشمن نے سپنے اُپردال دلنے نے برابر ہوئی جانا اے۔ دشمن نی پُرانی تھیں پُرانی دوستی
بچ بھڑبانا تہ دشمن نے پرانے تھیں پرانے تہ پیارے دوست کی اُس نے پاسے نالوں
چکی تہ اپنا دوست بنائی لینا وی دشمن نے سپنے اُپردال دلنے نے برابر ہونا اے تہ ہراوہ
کم کرنا جیہڑا ٹساں نا دشمن بیہہ چاہنا۔ مثلاً ٹساں نا دشمن چاہنا اے کہ ٹس بس اک ہی
کم کرو، صرف تہ صرف بچے پیدا کرنے رہو۔ اس کم تھیں علاوہ کمائی تہ ترقی کرنے
جیسا ہو کوئی کم کاج نہ کرو۔ ٹساں نا دشمن چاہنا اے کہ ٹس اس نی گالی گلوچ تہ طعنے
مینے سنی تہ مشتعل ہوئی جاو۔ اُس نے خلاف جوابی کاروائی کرو تاں جے اوہ ٹساں نے

دُند کھٹے کری دُند پہنی آپوں تسکین حاصل کرے۔ مگر تُس اُس نیاں ساریاں خواہشاں اُپر پانی پھیری چھوڑو۔ فیملی پلاننگ کری چھوڑو۔ کمائی تہ ترقی کرنے جاؤ۔ ایہہ تہ اسے طراں نیاں ہو رکئی گلاں کری تہ تُس اپنے دُشمن نے سپنے اُپر دال دٹی سکے او۔

انہاں فاندیاں کی نظر بچ رکھنے ہوئیاں لوک دُشمن بنانے تہ پالنے ہین۔ کئی کئی طریقیاں سنگ بنانے ہین۔ اک اندازے نے مطابق دو بندیاں، دو گروپاں یا دو مُلکاں نے درمیان اُج تک جتدیاں وی لڑائیاں ہوئیاں ہین، انہاں فی شروعات زبان فی بدولت ہوئی اے۔ یعنی دُشمنی ناہیں زبان نے ذریعے بویا جانا اے تہ پالیا پوسیا جانا اے۔

کسے کی کوئی الزام دیتی تہ اپنے دُشمنان فی تعداد بچ باہدا کیٹا جائی سکنا اے۔ کسے اُپر چوری چکاری ناشک کری تہ اُس کی اپنا دُشمن بنایا جائی سکنا اے۔ گما ہنڈی نال اگر اچھے تعلقات نیہہ ہین تاں سب تھیں طاقتور تہ خطرناک دُشمن تُساں نا گما ہنڈی ہی ہوئی سکنا اے۔ ذرا سوچو کہ اک گما ہنڈی کہہ نیہہ کری سکنا۔ تُساں نے کہہ نے اندر تک بھی سکنا اے۔ تُساں نے مُلک بچ گھس بیٹھ کری سکنا اے۔ سازشاں نا جال بنی سکنا اے۔ کہہ یا مُلک کی دو پھاڑ کری سکنا اے، کیاں کہ دُشمن سنگ ٹکر لانا کوئی زنگا جیہا کم نیہہ اے، سگوں بہادری، جوانمردی تہ فخر نا کم اے۔ ایہہ وی ضروری نیہہ اے جے بڑے آدمی نا دُشمن وی کوئی بڑا ہووے۔ اک نیکے تھیں زنگا بندہ وی بڑے تھیں بڑے بندے نال دُشمنی نبھائی سکنا اے۔ تاں جے فخر کری سکے۔

تجربہ کار لوکاں یعنی دُشمن فی پہٹھی بچ تہی تہ کُندن بنی نکلے لوکاں، دُشمن نیاں کئی قسماں دہسیاں ہین۔ مثال نے طور ور بلا وجہ نا دُشمن ”ایہہ اوہ دُشمن ہونا اے جس کی تُساں نال کوئی لین دین نیہہ ہونا، بس اُس کی تُساں نیاں خوبیاں، صفتاں تہ

کامیابیاں بالکل ہی چنگیاں میہ لگنیاں ہین۔ اوہ ٹساں نیاں اچھائیاں تہ خوبیاں تکی تکی
تہ سڑی لکی جانا اے تہ بس بلا وجہ ہی تسا ہڑا دشمن بنی جانا اے۔“

زخمی دشمن: ایہہ اوہ دشمن ہونا اے جیہڑا اٹساں نے ہتھوں یا زبان تھیں یا فر
کسے ہو رگل تھیں زخمی ہو یا ہونا اے۔ ٹس پھلکی چلے نے ہونے ہو مگر اُس اپنے زخماں
کی تازہ رکھیاں ہونا اے۔ تسا ہڑی تاک بچ لگا رہنا اے تہ موقعہ آونے ہی دشمنی نبھانا
شروع ہوئی جانا اے۔

اذیت پسند دشمن: ایہہ دشمن قدم قدم اُپر تکلیف دینے والا ہونا اے۔ اُس کی
وی لین دین کجھ میہ ہونا، مگر دُوے بندے کی تکلیف دینے بچ اُس کی اک خاص
طراں نی ٹھنڈ پئی اے تہ سکون لبھنا رہنا اے۔ دُوے بندے کی پریشان کری تہ اوہ
آپوں خوش ہونا اے۔

وقتی دشمن: ایہہ جذباتی قسم نا دشمن ہونا اے تہ تھوڑی جی دیر تہ تھوڑے جے
وقت واسطے دشمنی نبھانا اے۔ بس کسے نا پسند وجہ یا گل اُپر پھڑکی جانا اے۔ وقتی طور اُپر
مشتمل ہوئی جانا اے۔ فر اگا کچھ میہ تکلنا۔ فر جیاں ہی اُس نا غصہ ٹھنڈا ہونا اے تہ
اوہ اپنے ہوش و حواس بچ واپس آئی جانا اے۔ بلکہ کجھ حد تکر پچھتا نا وی اے۔ نالے
مذید دشمنی نبھانے تھیں وی باز رہنا اے۔

بہر حال ایہہ تہ ظاہر تہ باہر نی دُنیا نے دشمن ہین۔ بعضے لوک انہاں دشمنناں
کی کجھ سمجھنے ہی میہ ہین۔ رائی برابر وی اہمیت میہ دینے ہین۔ انہاں نا کوئی سر
وی پھنی چھوڑے اوہ اُف میہ آکھنے ہین۔ دراصل انہاں نے نیڑے اصل دشمن
تہ انسان نی اندر نی دُنیا بچ بسے ہین۔ انہاں نا مننا اے کہ اصل تہ سب تھیں زیادہ
طاقتور دشمن تہ اہمیت دینے نے قابل دشمن، جہاں نا اک انسان کی مقابلہ کرنا

ضروری اے۔ اوہ انسان فی ذات نے اندر ہیں۔ جہاں بچ انسان نا نفس پہنکھ،
ہوس تہ خواہشاں شامل ہیں۔

جی ہاں! اسے واسطے غالب آکھیا اے۔

رہبر بن کے ہوا جاتا ہے راہزن میرا

دل ہے یارب میرے پہلو میں یا دشمن

آکھیا جانا اے کہ جیہڑے لوک انہاں دشمنوں کی دریافت کری پنے ہیں۔ اوہ
طاہری دنیا نے دشمنوں تھیں لائق تہ بے نیاز ہوئی جانے ہیں۔ ظاہر تہ باہر فی دنیا
نے دشمنوں نا کوئی وی وار انہاں اُپر کارگر ثابت نیہ ہوئی سکنا اے۔ انہاں لوکاں کی
اپنے اندر فی دنیا نے دشمنوں تھیں فراغت ہی نیہ ملنی کہ اوہ باہر فی دنیا نے دشمنوں
کی کوئی تھوڑی بہتی اہمیت دیتی سکے۔

انہاں فی لڑائی اے تہ بس اپنے آپ سنگ ہی اے۔ اوہ اگر مقابلہ کرنے ہیں
تہ بس اپنے نفس سنگ اپنی پہنکھ سنگ اپنیاں خواہشاں تہ ہوس سنگ۔ اوہ اگر کسے کی
مارنے ہیں تہ بس اپنی پہنکھ نفس ہوس تہ خواہشاں کی مارنے ہیں۔ اوہ اگر ڈرنے ہیں
تہ بس موت نے عذاب کولوں ڈرنے ہیں۔ اوہ بے بس تہ لاچار ہونے ہیں اُس لڑائی
کولوں جیہڑی جسم تہ روح نے مابین ہونے واسطے مقرر اے۔ ایہہ لوک بس
انہاں دشمنوں سنگ ہی لڑنے چھگڑنے رہتے ہیں۔ انہاں دشمنوں کولوں ہی خوف
زدہ رہتے ہیں۔ انہاں کی باہر فی دنیا نے دشمنوں فی خبر ہی نیہ دینی۔



زبان

جناب عالی! بولی تہ سبھی جانے والی زبان نی کوئی اہمیت تہ افادیت مہہ اے
جدول توڑیں اپنے منہہ بچ اک جیتی جاگنی زبان نہ ہووے۔

ایاں تہ ہر جانور تہ ہر زندہ چیز نے منہہ بچ گوشت نی اک نرم تہ نازک جینی
زبان ہونی اے، مگر انسان نی زبان نی گل ہی گجھ ہور اے۔ یقین سنگ ہی مہہ بلکہ
دعوے سنگ آکھیا جانی سکنا اے کہ انسان کی اشرف المخلوقات اکھوانے ناحق تہ درجہ
دوانے بچ اس نی زبان ہی اگے اگے رہی ہوئی گی تہ زبان نی بدولت ہی انسان کی
ایہہ خطاب نصیب ہو یا ہوئی گا۔

بعض جانوراں مثلاً اونٹ، کھوڑا، گائے داند تہ منجھ وغیرہ نی چہہ بڑی لمی ہونی
اے، مگر سوائے کھانے پینے یعنی کہناہ بوٹ چرنے تہ تک منہہ صاف کرنے تھیں علاوہ
ہور کیہڑے کم نی ہونی اے۔ ایہہ تہ انسان ہی اے جیہڑا اپنی چہہ نال کھانے پینے تہ
طراں طراں نے ذائقے چکھنے انگلیاں چٹنے تہ ہوٹھ تر کرنے تھیں علاوہ وی ہور کئی کم
اپنی چہہ سنگ کر لینا اے۔ مثلاً کسے کی ہدایت تہ نصیحت کرنا، ٹوکنا، کنا، لعنت ملامت
کرنا، غیبت کرنا، انگل چکنا تہ ایے جے کئی ہور کم وغیرہ۔

انگل چُکنے بچ پہنایں جے الزام تہ انگلی نے سر ہی جانا اے، مگر اس نے چُکھے
اصل کار فرمائی تہ چہھ نی ہی ہونی اے۔ آکھیا جانا اے کہ بعض لوک صرف تہ صرف
چہھ نی ہی کمائی کھانے ہین۔ کم نے ناں اُپر اپنے ہتھ نال تپلے نے دوٹوٹے میہہ کرنے،
مگر چہھ کولوں کم پتیاں ہوئیاں کدھرے کسے نی تعریف کیتی، خوشامد تہ چا پلوسی کیتی،
کسے نی پُغلی ماری تہ کسے کی سکھا لیا تہ پہو کا یا تہ کسے نی سچی چوٹھی گواہی دیتی تہ اتنا
کمائی پنے ہین کہ انہاں نی تہ نال ہی انہاں نے کُتے قبیلے نی گزر بسر چنگی طراں ہون
لگ پئی اے۔

انسان کی حیوانِ ناطق آکھیا گیا اے۔ یعنی انسان نے مُنہہ بچ بولنے چالنے
والی چہھ میہہ ہونی تہ انسان ہونے نے باوجود وی اوہ انسان اکھوانے نامستحق میہہ
سی ہونا تہ حیوان ہی آکھوایا اے۔ اس طراں وی تہ انسان اکثر ایچے کم کری شوڑنا اے
جیہڑے اُسکی حیواناں نے زمرے بچ شامل کرنے واسطے کافی ہونے ہین۔ لیکن
قدرت نا ایہہ کتنا بڑا احسان تہ کرم فرمائی اے کہ بندے کی زبان دیتی تہ زبان بچ
بولنے نی طاقت عطا کری تہ اس کی حیواناں تھیں برتر ہی میہہ کیتا بلکہ زبان بچ انہی
طاقت رکھی اے کہ بس تکلایاں ہی بنی اے۔

جانور بولنے نی طاقت تھیں محروم ہونے نی وجہ سنگ حیوان اکھوانے ہین تہ
مختلف طریقیاں سنگ اپنے غم تہ غصے اپنیاں خواہشاں تہ اپنی طاقت نامظاہرہ کرنے
ہین۔ مثلاً ہاتھی اپنی طاقت نامظاہرہ اپنی سُنڈھ سنگ کرنا اے تہ پہنارے پیراں نال
کسے کی ماری دینا اے۔ سُنڈھ اپنے سُنڈھاں نال وار کرنا اے۔ شیر اپنے نوکیلے پنجیاں تہ
تیز دندان نال چیر پھاڑ کرنا اے۔ مکھی، مچھر، سپ تہ بچھوڈنگ مارنے ہین، مگر انسان
ایہہ سارے کم تہ اسے طراں نے ہور متے سارے کم پیٹھیاں پیٹھیاں ہی صرف اپنی

چھ سنگ ہی کری چھوڑنا اے۔ اسے واسطے اک شاعر نے آکھیا اے کہ۔

تلوار سے، نیزے سے، نہ خنجر سے ملا ہے

جو زخم تیری زبان کے نشتر سے ملا ہے

دراصل چھ اک چھپیا نا رستم اے۔ اس نی طاقت نا اندازہ اس گلوں تھیں
وی لایا جائی سکنا اے کہ قدرت نے اس کی دندان نی مضبوط کندھ نے اندر محفوظ کری
تہ اوٹھاں نا پلیر وی دتا اے، تاں جے ایہہ کہٹ تھیں کہٹ اپنی طاقت نا مظاہرہ کری
سکے۔ صرف ایہہ ہی نیمہ اس نا کہٹ تھیں کہٹ حصہ آزاد رکھنے ہوئیاں باقی نا سارا
حصہ گلے تھیں اندر گم کری رکھیا اے۔ اس سب نے باوجود چھ فی کار فرمائی بندے کی
بتا ہی نے منہہ نے اندر توڑیں لئی جانی اے۔ بے بسائے کھر ویران کرنے نے نال
نال پورے معاشرے کی اپنی پلیٹ بچ لئی سکئی اے۔

جسم نے باقی حصیاں نے مقابلے بچ اپنی قد کاٹھی نے لحاظ سنگ چھ پہنا ویں
ہی نرم تہ نازک ہونی اے، مگر جسراں ہر چمکنے والی چیز سونا نیمہ ہونی، اسے طراں ہر نرم
تہ نازک چیز کمزور نیمہ ہونی۔ ایٹے وجہ اے کہ چھ نا حملہ بڑا سخت ہونا اے تہ بعض
اوقات جان وی لئی سکنا اے۔

اصل بچ چھ اک ہتھیار اے جیہڑا ہر وقت حضرت انسان کی دستیاب رہنا
اے تہ ایہہ اُسے نی مرضی اے کہ اوہ کس ویلے، کس جگہ، کیاں تہ کس طراں اس نا
استعمال کرنا اے تہ کیہڑے کیہڑے فائدے حاصل کرنا اے۔

ہاں جی! زبان اگر ہتھیار نہ ہونی تاں اک شاعر کی ایہہ ہرگز نیمہ سی آکھنا پینا
زبان کاٹ رکھتی ہے تلوار کی
نہ رکھے اسے بے نیام آدمی

ایہہ منیا گیا اے کہ کھر یلو چھگڑیاں نے ناں اُپر خود کشی کرنے والیاں نے
چکھے دراصل زبان نی ہی کارفرمائی ہوئی اے۔ ایہہ وی منیا گیا اے کہ دُنیا بچ جس قدر
وی قتل و غارت ہوئی اے تہ ملکاں نے درمیان جیہڑیاں وی خون ریز لڑائیاں لڑیاں
گئیاں ہین، اُنہاں نامنڈھ بہانے بچ زبان ہی اوّل رہی اے۔

زبان نی اُنہاں خصوصیتاں تہ صفتاں نی بدولت اِس نے بارے بچ بہت
ساریاں کہانیاں تہ کہاوتاں وجود بچ آئی تہ خاصاں تہ عامّاں نی زبان نا حصہ ہوئی
چکلیاں ہین۔ مثلاً ایہہ ہی زبان راج کرائے تہ ایہہ ہی زبان گردن پھنائے.....
زبان ہی ہاتھی چڑھوائے تہ زبان ہی عمر کٹوائے وغیرہ وغیرہ۔

مرد تہ کالسری نے حوالے سنگ وی زبان کی بحث نا موضوع بنایا جارہیا
اے۔ آکھیا جانا اے جے مردنی زبان اک ہوئی اے۔ اِس حوالے سنگ وی کئی
کہانیاں تہ کہاوتاں مشہور ہوئی چکلیاں ہین۔ مثال نے طور اُپر ”جان جائے مگر زبان نہ
جائے۔ زبان اے تہ ایمان اے۔ زبان بدلے لئے تھیں بہتر اے کھر بدلنا۔“ مگر اُج نے
زمانے بچ اِس طراں نیاں گلاں تہ کہاوتاں اپنی اہمیت تہ اثر کھو چکلیاں ہین۔ اُج
دعوے سنگ ایہہ آکھیا ایہہ جانی سکنا اے کہ مردنی زبان اک ہوئی اے، کیاں کہ اُج
نے زمانے بچ مردنی زبان نے مقابلے بچ کالسری نی زبان طاقت تہ اہمیت حاصل
کری چکی اے۔ اپنی نا سمجھی تہ پہو لے پن نی وجہ سنگ اُج اگر کوئی مرد اپنے طور اُپر
کسے سنگ کوئی سودا طے کرنا اے یا کسے طراں نالین دین کرنے نی زبان کری آونا اے
تہ کھر بچنے اُپر زبانی نی زبان نے سامنے بے بس ہوئی تہ رہی جانا اے۔

جتھے تک میاں بیوی نی زبان نا تعلق اے تہ اِس ضمن بچ ماہر لوکاں نا آکھنا
اے کہ اِس حقیقت نے باوجود کہ جس ویلے بیوی نی زبان چلنی اے تہ اُس ویلے مرد نا

ہتھ چلنا اے بیوی نی زبان میاں نے مقابلے بچ کئی گنا تیز رفتار تہ طاقتور ہونی اے جس نا مقابلہ کرنا کھر والے نے بس نی گل تھیں باہر ہونا اے تہ مزے نی گل ایہہ اے کہ جد تھیں داج مخالف تہ کھر یلو تشدد مخالف قانون بنیا اے زانیاں نی زبان پہلاں نی نسبت متی ہی لمی ہو رہی اے تہ ایہہ ہی وجہ اے کہ اپنی لمی تہ طاقتور زبان نے بل بوتے اُپر کئی کھر والیاں طلاق حاصل کرنے بچ کامیاب تہ کامران ہوئی جانیاں ہین تہ کئی اپنے کھر والے نی دوئی شادی کروائی تہ ساہ سُنیاں ہین۔

آہاں جی! اس حقیقت تھیں کسے کی تہ کھر والیاں کی وی رائی برابر اختلاف میہہ اے، بلکہ فخر اے۔ کیاں کہ بیوی نی زبان نی بدولت ہی کئی کھر والے فلسفی بنے ہین تہ شہرت وی حاصل کیتی اے۔ بعضے دُنیا چھوڑی چھڑائی تہ آخرت تہ اپنی عاقبت سنوارنے بچ بچئی گئے تہ بعضے انہاں ساریاں مصیبتاں تہ جہمیلیاں تھیں بچیاں ہوئیاں خود کشی کی ترجیح دینے آئے ہین۔ صرف ایہہ ہی میہہ بیوی نی زبان کھر والے کی صرف فلسفی، عابد، صابر، شاکر تہ پرہیزگار ہی میہہ بنانی اے سگوں اس تھیں علاوہ وی بہوں کجھ بنانی اے۔

اک مشہور افسانہ نگار کی انٹرویو نے دوران پچھیا گیا ”تُس اتنے بڑے تہ کامیاب افسانہ نگار کس طراں بنے ہو؟“ افسانہ نگار ہوراں جواب دتا کہ ”ایہہ کریڈٹ ماہری زبانی کی جانا اے۔ میں آج جو کجھ ہاں صرف تہ صرف اپنی کھر والی نی بدولت ہی ہاں۔“ ”اوہ کس طراں؟“ انہاں کولوں مذید پچھیا۔ انہاں آکھیا ”تُساں سُنیا ہوئی گا کہ ہر کامیاب مرد نے پچھے اک کالسری نا ہتھ ہونا اے۔ بس ماہری افسانہ نگاری نے پچھے ماہری کھر والی نا ہتھ رہیا اے۔“

افسانہ نگار ہوراں نے اس جواب اُپر خوش ہوئیاں ہوئیاں انہاں کولوں مذید وضاحت چکھی گئی، تاں جے انہاں نی کُہر والی نی وی تعریف کری تہ داد دتی جانی سکے۔ اُس ویلے انہاں گھلی طراں دہسنیاں ہوئیاں آکھیا ”دراصل ماہری کُہر والی سخت مزاج، تیز طرار تہ زبان دراز اے۔ کُہر والی نیاں انہاں ہی صفتاں نے کارن میں اُس کولوں دُور دُور رہنا شروع کری کہند ا۔ مگر جینے تہ وقت گزارنے واسطے تہ کوئی سہارا چاہی نا ہونا اے۔ میں اخبار رسالے تہ کتاباں پڑھی پڑھی تہ اپنا وقت نپان لگاں۔ بس پڑھنیاں پڑھنیاں میں افسانہ نگار بنی گیا ہاں۔“

آہاں جی! تکیا تِساں، زنانی نی زبان ہووے، اُس نے اتھروں ہوون یا اوہ خود ہووے، ہر جگہ اوہ کامیابی حاصل کری رہی اے۔ مرد نے موہنڈے سنگ موہنڈا ملائی تہ چلنے نا نعرہ ہُن گئے وقتاں نی علامت بنی تہ رہی گیا اے۔ اُج نے وقت بچ کالسری مرد کولوں اگے جانی رہی اے تہ فاسٹ جانی رہی اے۔ پہاویں زبان نا میدان ہووے یا کوئی ہور!

بہر حال میاں بیوی نے معاملات تھیں ہٹے ہاں، کیاں کہ گل زبان نی ہوئی رہی اے۔ ایّاں تہ ساریاں نے مُنبہ بچ نرم تہ نازک گوشت پوست نی تہ لگ بھگ اک ہی رنگ تہ رُپ نی زبان ہوئی اے، مگر حساب کتاب رکھنے تہ ضرب تقسیم کرنے والیاں اس کی وی کنیاں قسماں تہ خانیاں بچ بندھی تہ رکھیا نا اے۔ مثال نے طور اُپر قینچی نی طراں چلنی زبان، تلخ تہ تُرش زبان، تیز طرار تہ کاٹ دار زبان، سدھی سادھی زبان، ہسنے ہسانے والی زبان، مٹھی زبان تہ بے ضرر زبان وغیرہ۔

قینچی نی طراں چلنی زبان واسطے مشہور اے کہ ایہہ بڑی تیز طرار ہوئی اے تہ تیز تیز بولنی اے۔ اپنے سُننے والیاں کی بولنے نا موقعہ کہٹ ہی دینی اے۔ جس ویلے

بہت زیادہ اُچھل کد شروع کرنی اے، اُس ویلے اس کی بڑے مناسب جے مشورے سنگ نوازیانا اے۔ مثال نے طور اُپر ”زبان کی لگام دیو“، ”زبان مُنہ بچ رکھو“ تہ ”زبان سمہالی لو“ وغیرہ وغیرہ۔

اپنی تیزی ہور طراری نی بدولت ایہہ اکثر دنداں کولوں زخمی ہوئی تہ لہولہان وی ہوئی جانی اے۔ اسے زبان نی تیزی کی مد نظر رکھنے ہوئیاں آکھیا گیا اے کہ لمی جنگاں والے تھیں اُگے نکلیا جانی سکنا اے مگر لمی چھو والے کولوں اُگے ہونا ناممکن اے۔ تلخ تہ تڑش زبان واسطے آکھیا جانا اے کہ ایہہ خوبصورت تہ سونہیاں مُنہواں بچ ہوئی اے تہ اُنہاں کی بُری نظر کولوں بچانے ناکم کرنی اے۔ جی ہاں! ایہہ خوبصورتاں کی چنگی لگنی اے تہ اُنہاں کی راس وی آونی اے، مگر ایہہ کوئی اتفاق نیہہ اے بلکہ ایہہ قُدرت نی کار فرمائی اے تہ اپنے بندیاں واسطے قُدرت نی ہمدردی تہ کرم نوازی اے۔ تاں جے اس زبان نے زہر تہ تلخی کی برداشت کیتا جانی سکے تہ مدید مصیبتاں تھیں بچیا جانی سکے۔

تیز طرار تہ کاٹ دار زبان واسطے آکھیا جانا اے کہ ایہہ اپنے سُننے والیاں کی کہنی تہ ٹکنی جانی اے تہ اُنہاں نے کیلجے تہ روح وی لہولہان کری چھوڑنی اے تہ الزام قینچی نے سر رکھی چھوڑنی اے۔ عام طور اُپر اسے زبان ناخمیا زہ بے چارے دنداں تہ نک کی وی پہگلتا پینا اے۔

سَدھی سادھی زبان صرف تہ صرف ادبیاں کول ہونی اے، تاں جے عام لوک وی اُنہاں کی پڑھی، سچھی تہ تعریف کری سگن۔
ہسنے ہسانے والی زبان مذاقیاں تہ مسخریاں نے حصے بچ جانی اے، مگر ایہجے لوک کہٹ کہٹ ہی ہونے ہن۔

مٹھی تہ رسیلی زبان واسطے آکھیا جانا اے کہ ایہہ جس ویلے بولنی اے تہ صرف کنناں بچ ہی میہہ بلکہ سُننے والیاں نے مُنہہ بچ وی رَس کھولنی اے۔ سُننے والے نی زبان پہاویں کتنی ہی کوڑی تہ کھٹی کیاں نہ ہووے، اوہ مٹھی ہوئی جانی اے۔ اس زبان نی خاصیت ایہہ اے کہ ایہہ بگڑے معاملے تہ مسئلے سلجھانے تہ حادثے تہ چنگڑے ٹالنے بچ معاون تہ مددگار ہونی اے۔ اس تھیں علاوہ خوشگوار ماحول تہ ترقی نی ضامن ہونی اے۔

مگر جتنے تک بے ضرر زبان نا تعلق اے۔ اس کی سمجھنا قدرے مشکل اے۔ اس کی سمجھنے واسطے دماغ اُپر زور دینا پینا اے۔ کیاں کہ اس کی تیز طرار تہ تلخ تہ تڑش زبان نے پلڑے بچ رکھی تہ تولیا تہ پرکھیا میہہ جانی سکنا اے۔ البتہ گجھاں مثالاں نی مدد سنگ اس کی بخوبی سمجھیا جانی سکنا اے۔ مثال نے طور اُپر کوئی ٹساں اُپر بڑے سخت تہ سنگین الزام لائی رہیا اے، مگر ٹس سچے ہوتہ تھوئی تھوئی لائی تہ مکر رہے ہوتہ ٹساں اُپر چھوٹے الزام لگی رہے ہین۔ مگر کسے وی بندے نی زبان ٹساں نے حق بچ کھل میہہ رہی اے۔ محض اِس واسطے کہ دُوا بندانا راض ہوئی جاسی گا۔ بس ایہہ ہی بے ضرر زبان ہونی اے۔ بے ضرر زبان کسے کی ناراض میہہ کری سکنی اے۔ اِس واسطے سچ بولنے تھیں وی قاصر نہی اے۔

ٹساں کسے نا نقصان ہونیاں ہونیاں اپنیاں اکھیاں سنگ تکیا اے۔ ٹساں کسے کی لٹنیاں تہ مار کھانیاں ہونیاں تکیا اے۔ مگر کورٹ کچہری نے چھمیلیاں تھیں بچنے واسطے ٹس اپنا مُنہہ میہہ کھولی رہے ہوتہ سمجھی جاو کہ ٹساں نے مُنہہ بچ وی اک بے ضرر زبان اے۔ اِس زبان نی اک خوبی ایہہ وی اے کہ ایہہ گھلی طراں کسے نی تعریف وی میہہ کری سکنی اے۔ ٹس بڑے بڑے کارنامے انجام دیو مگر بے ضرر زبان تھیں

اک لفظ وی تُساں فی تعریف تہ حوصلہ افزائی واسطے نیمہ نکلن لگا۔ ایہہ زبان عام طور اُپر چُپ چاپ رہنا پسند کرنی اے تہ اپنے آپ کی محفوظ سمجھنی اے۔ مختصر ایہہ کہ ایہہ زبان کسے نے کاری تہ کم نیمہ آونی اے۔

زبان نے ماہر لوکاں حکومتی محکمیاں تہ پیشیاں نے حوالے سنگ وی زبان نے بارے بچ گل بات کیتی اے۔ پولیس نی زبان بڑی کارگر دہسی گئی اے جیہڑی کہ مار گٹائی نے نال نال گالی گلوچ نی مدد سنگ بے قصوراں کولوں وی جرم قبول کروائی لینی اے۔

وکیلاں نی زبان کی وی کامیاب آکھیا گیا اے کہ جیہڑی کالے کی چٹا تہ چٹے کی کالا کرنے نی مہارت رکھنی اے تہ مجرماں کی وی بری کرانے بچ اپنا کمال دہسنی اے۔

ادھار منگنے والیاں نی زبان واسطے آکھیا گیا اے کہ ایہہ قابل اعتبار نیمہ ہونی اے۔ ایہہ اُردو شاعری نے محبوب سنگ میل کھانی اے۔ وعدے نی پابند نیمہ ہونی اے۔

لیڈراں نی زبان واسطے آکھیا گیا اے کہ ایہہ بڑی پُکُشش ہونی اے۔ عوام اک بار نیمہ، بلکہ کئی کئی بار اس نے چٹانے بچ آئی جانے ہین تہ لیڈراں نیاں خاطر داریاں کرنے رہتے ہین۔

اُفسر نی زبان دوطراں نی ہونی اے۔ اک بار رعب با وزن با وقار تہ حکم کرنے والی۔ دوئی بے رعب بے وزن بے وقار تہ حکم مننے والی۔ پہلی قسم نی آفس بچ چلنی اے تہ دوئی کھر بچ کھر والی نے سامنے لرزنی اے۔

بہر حال زبان کوئی وی ہووے اس نی اہمیت تہ افادیت مسلم اے۔ جس

•••••
ویلے دو فریق لڑائی تہ جنگ وجدل پنج اپنا سب کچھ گنوائی تہ تھکی ہماری تہ چڑرچڑر
ہوئی جانے ہین اُس ویلے ایہہ زبان ہی اُنہاں کی اک ٹیبل اُپر آئی تہ اُنہاں نے
مسئلے تہ معاملے سلجھانی اے۔ اس واسطے اک شعر پنج ابھیا ردوبدل کری تہ
آکھیا جانی سکنا اے۔

رَب کا شکر ادا کر بھائی
جس نے ہماری زبان بنائی



لاڑی ہو رگڈی

مگی ایہہ سمجھ نہیہ اشنی جے ’لاڑی ہو رگڈی‘ دواں چوں کس کی کس ورت رج دیواں۔ چاہت نے کس خانے بچ کس کی رکھاں۔ ایّاں تہ اک لاڑی ہی بیوں اے گو بچیاں نا پہنار ہو لے کرن واسطے ہو وی بیوں گجھ.....! تکیا جُلے تاں لاڑی کیہڑی کیہڑی جانی نہیہ پھیرنی تھورنی۔ ڈرائنگ روم تھیں لئی رسوئی تکر، بیہڑے تھیں لئی چھتے توڑیں..... ایہہ کر..... اوہ کر! کہہ رے نے اکس کو نے تھیں ہنی دُوے کو نے تکر دوڑانی ہنی اے۔ خیر کہہ رے کی چھوڑ دباہر لی خبر کہنے آں۔ ہر دُوے روز پیو کے ہسپتال، شاپنگ مال، سیر سپاٹیاں نی جائیاں وغیرہ نے دورے وی کروانی ہنی اے ہو ر انہاں کماں بچ اگر اک ماسہ وی کوتاہی ہوئی جائے تاں تہ کدے کدے کورٹ کچہری نے چکروں لوائی شوڑنی اے ہو ر اگر نال گڈی وی ہووے تاں تہ گل ہی نہیہ۔ اُج اُتھاں، کل اُتھاں..... جتھاں نہیہ وی جانا، اُتھاں وی جانا اے۔

ماہڑے واسطے تہ اک زنانی ہی بیوں سی، مگر زنانی نی فرمائش جے گڈی چاہی نی اے۔ ہُن مسئلہ ایہہ اے جے جس کی کہہ رے بچ امن تہ سکون نی لوڑا اے، اوہ زنانی نی کوئی فرمائش ٹالی ہی نہیہ سکنا ہو ر زنانی کیہڑی کیہڑی فرمائش نہیں کرنی اے۔

حقیقت ایہہ اے جے صرف اکس چیز کی چھوڑی زنانی ہر چیز نی فرمائش کر سکنی اے۔
 ”مگی ایہہ چاہی نا۔ مگی اوہ چاہی نا۔ فلاں نے کول ایہہ اے۔ فلاں نے کھر ایہہ
 اے۔ فلاں نی زنانی ایہہ لایا نا اے۔ ابھی جیولری اے وغیرہ وغیرہ۔ مگر کہہ ٹساں
 کدے ایہہ سُنیا اے جے کسے نی زنانی آکھیا ہووے جے ”ماہڑے واسطے اک
 ساکن آؤ“۔ یقیناً کدے وی نیہہ! کیاں جے مڑی تھڑی شوہر بچارے نی ایے اک
 خواہش ہونی اے۔ زنانی نی ہرگز نیہہ۔

گڈی نی گل چلی تہ اسیں گڈی نے بارے بچ سوچن لگ پیئے۔ سوچی
 سوچی آخر کار اُساں کی گڈی کہنی ہی پئی۔ گڈی نال واسطہ پیا تہ کئی گلاں باندے
 پیاں۔ میں کئی رازاں تھیں واقف ہویاں ہور میں اس نتیجے ورنہ پچیاں جے زنانی ہور
 گڈی دواں بچ کافی گلاں سانجھیاں ہونیاں ہین۔

نویں نویں گڈی ہووے یا نویں نویلی لاڑی دوئے خوشی ناباعث ہونیاں
 ہین۔ یعنی اپنی ذات ہور صفتاں نے حوالے نال اکس دُوے نال بہت حد تکرر لنیاں
 ہین۔ کیاں جے پہلی سانجھی گل تہ ایے اے جے دواں بچ اک خاص کشش ہور چمک
 دکھ ہونی اے۔ اپنے ہوون یا پرانے کھرے والے ہوون یا باہر والے سارے ہی
 نویں گڈی ہور نویں لاڑی کی تنکن نی خواہش رکھنے ہین۔ دواں نی وجہ تھیں مٹھائیاں
 ہور مبارکبادیاں نا اک نہ تھمن والا سلسلہ چل پینا اے۔ دواں نے ذریعے چہل پہل
 لگ جانی اے۔ نویاں نویاں جائیاں اُپر جان نا موقع ملنا اے ہور نال نال بیوں کجھ
 تنکن ناوی موقع ملنا اے۔ طراں طراں نے لوکاں نال میل جول بدھنا اے۔ دوئے
 یعنی لاڑی ہور گڈی ثابت قدم رہون تاں جتاں بے چارہ کسے حد توڑیں پہلاں
 کولوں محترم تہ معتروی ہو جانا اے۔

گڈی خریدی تہ آدمی بہوں خوش ہونا اے جے ہُن اوہ گڈی والا ہو گیا
اے۔ بعد بچ کہہ ہونا اے گڈی کتنا خرچہ منگنی اے کتنے چالان کٹوانی اے اس گلے
نی اس کی کوئی پرواہ نہیہ ہونی۔

بالکل اس طراں ہی بیاہ کرن والا بندہ وی بیاہ نے ویلے بہوں خوش ہونا اے
جے اوہ کامیاب رہیا۔ ہُن اوہ صرف صاحب نہیہ سگوں صاحب بیگم اے۔ بعد بچ
کہہ ہونا اے۔ زنانی کہی نہیہ اے کبھی نکلی اے تک پہنچال ہور سجنے سنور نے نے
سلسلے بچ کتنی مہنگی پینی اے انہاں ساریاں گلاں نال اس کی بیاہ ویلے کوئی غرض ہی نہیہ
ہونی ہور نہ ہی کوئی پرواہ ہونی اے۔

دواں کی ہی پہاویں اوہ لاڑی ہووے یا گڈی کسے دُوے نے حوالے نہیہ
کیتا جاسکنا۔ دواں بچوں کسے کی وی کدھرے وی کہلیاں یا گھلے میدان بچ چھوڑنا
پوئے تاں اک عجیب جیہا ڈر خطرہ دماغے اُپر سوار رہنا اے۔ دِلے بچ طراں طراں
نے ہور نا قابل بیان وسواسے آن جان لگنے پین۔ چوراں ہور بد معاشاں دواں نیاں
نظراں انہاں اُپر نکلیاں رہنیاں پین۔ اس تھیں علاوہ دواں نی تک پہنچال نی بہوں
ضرورت ہونی اے ہور کدے کدے تہ مرمت نی وی!

دواں نے میک آپ ہور مینٹنس واسطے اک جنے کی اپنی آمد نی بچوں اک
مخصوص حصہ بکھ کری رکھنا پینا اے۔ سُنیا نا اے جے کوئی جناب کسے نی بیگم کی ڈاڈے
شوق نال تکرنا پیا سی اُسے ویلے اُس نا کھرے والا اُس نے کنے بچ گوشے کرن لگا
جے ”کسے روز بغیر میک آپ تھیں بغیر تکرنا پیا تاں تہو انیاں مارنیاں مارنیاں ہوا
ہو جاسیں گا۔“

ایہ جینی حالت گڈی نی وی اے۔ میلی کچلی یا دھڑے نال بہری نی گڈی

اگر کسے بڑے شہرے بچ دسی جائے تاں جرمانہ ہو جانا اے۔ لہذا خوبصورت دسنے ہو
دھسالنے واسطے دواں کی سجاوٹی سنواری رکھنا بہوں ضروری اے۔ تاں ہی تہ جائی جائی
بیوٹی پارلر ہو سرورس اسٹیشن بنائے گئے ہین۔ بس لوڑا اے انہاں کولوں فائدہ چکن نی
ہو راوہ سو فیصد!

اک ہو رگل جیہڑی دواں بچ ساجھی اے ہو ر جیہڑی ساریاں کولوں اہم اے
اوہ ایہہ اے جے دواں نے معاملے بچ احتیاط ہو ر تدبیر بہوں ضروری اے۔ ماسہ اک
بے احتیاطی ہوئی میہ جے انسان دردناک انجام تکر پہچی سکنا اے۔ چھٹ اک اکھ لگی
میہ جے کوئی نہ کوئی حادثہ یقینی ہو گیا۔

انہاں گلاں تھیں بچنے واسطے دواں نا یعنی گڈی ہو ر لاڑی نے مزاج تھیں
واقفیت بہوں لازمی اے ہو ر ایہہ گل باندے با چھڑا اے جے متی مدت نہ سہی مگر تھوڑا
بہتا وقت تہ ضرور چاہی نا اے دواں نے مزاج کی جان تہ پرکھن واسطے! مگر اس لوک
اتھے ہی مار کھا شوڑ نے ہاں۔ لاڑی ہووے یا گڈی دواں نے معاملے بچ اسیں بہت
جلد باز ہو ر تاو لے ہونے ہاں۔ بغیر اک دووے کی جانے پرکھے ہو بچ اڈن تہ اڈان
لگنے ہاں ہو ر منہواں پہنا رٹھینے ہاں۔

اصل بچ انسان نی اسے تاو لے پن نا نتیجہ ہونا اے جے آج بڑی تھوم تہ نام
نال بیاہ ہو یا ہو ر کل پرسوں طلاق ہو گئی۔ یا فر نوں نو یلی لاڑی نی خود کشی نا الزام اپنے
سرے ور کہنی اپنے ماء پیو سمیت سلاخاں نے کچھے چلے گئے۔ آج کل نے اخبار
ایہجیاں خبراں نال پھرے ہونے ہین۔

ہلا دھسو ہاں کیہڑا بے وقوف اپنے ہتھوں نوں نو یلی لاڑی کی اگ لانا اے۔
مگر اس لوک اپنے تاو لے پن نی وجہ تھیں ہو ر صرف ہو ر صرف اکس دووے تھیں

ناواقفیت فی وجہ تھیں ایچے سنگین الزام اپنے سر کہنے جے حالات پیدا کر شوڑ نے ہاں۔
 اسے طراں گڈی نے مزاج تھیں ناواقفیت ناوی ایے جیسا نتیجہ نکلنا اے جے
 اک بکھی گڈی ہندی ہور دوئی بکھی کجھاں ہفتیاں یا مہینیاں اندر ہی پھنی تروڑی
 ورکشاپ پچائی شوڑ نے ہاں۔ مَن تَس دہسو ہاں جے جس لاڑی نے ہتھاں فی
 حالیں مہندی وی نہ لٹھی ہووے ہور جس گڈی نے ٹائر رائی نے دانے برابر وی نہ
 کہتے ہوون، سیٹ کور تکر میلے نہ ہوئے ہوون ہور اوہ حادثے نے شکار ہو جاوَن، کتنے
 افسوس فی گل اے۔ مگنی گل ایہہ اے جے ایہہ دوئے شعلہ مزاج ہونیاں ہین۔ ماسہ
 اک لاپرواہی ہور بے احتیاطی کیتی نیہہ جے ”ایہہ جاوہ جا“ ہوئی گئیاں دوئے۔ ماسہ
 جیئی وی لاپرواہی نال دوئے پھڑکی جانیاں ہین۔ دواں بچ اک گل ہور سانجھی اے جے
 دواں کی ہی اپنے کنٹرول بچ رکھنا بھوں ضروری اے ہور دوئے اگر کنٹرول بچ رہون
 بندے نے حکم نے مطابق چلن تاں زندگی بھوں خوشحال ہور آرام دہ ثابت ہوسی گی
 ورنہ! اصل بچ دواں فی عزت و آبرو ہور سلامتی بس اسے بچ اے جے
 بندے نے کنٹرول ہور بس بچ رہون۔ اگر لاڑی کنٹرول تھیں باہر ہو جائے تاں بندہ
 کسے کی مُنہہ دہسن نے قابل نیہہ رہنا ہور گڈی جس ویلے کنٹرول تھیں باہر ہو جانی
 اے تہ اوہ اپنا آپ کسے کی دہسن نے قابل نیہہ وئی۔ کیاں جے جس ویلے گڈی
 کنٹرول تھیں باہر ہونی اے تہ اوہ کسے نہ کسے جانی یا چیز نال ٹکرا سی گی ہور مُنہواں پہنار
 ٹھسی گی۔ اس ناخلیہ ہور چہرہ چکنا چور ہو جاسی گا ہور ایہہ گل سِروں ہی چنگی نیہہ ہونی
 جے نویں نویں گڈی بچ تڑٹ جائے۔ سچی گل تہ ایہہ اے جے دواں بچ اک ہور گل
 سانجھی اے جے دوئے مُنہہ زور ہونیاں ہین۔ بھوں ضبط ہور کنٹرول نے باوجود وی
 اکثر بے قابو ہور سر کھل ہوئی جانیاں ہین۔

نویں نویلی لاڑی جس ویلے احترام ہو رنا زخمرے برداشت کرن نے باوجود اپنا کڑا رویہ جاری رکھنی اے ہو ر اپنا بڑا پن ہو ر دبدبہ قائم کرنے واسطے سرگھل ہو جانی ہے۔ اس نا نتیجہ ایہہ نکلنا اے جے اس نے منہویں اُپر پہلی چنڈھ لگنی اے ہو ر اس نے سارے خاب چکنا چڑر ہو جانے ہین۔ ایہہ گل وی بہوں افسوسناک ہوئی اے جے نویں نویلی لاڑی نے منہویں ور چنڈھ ماری جائے۔ دواں نال جُوی اک حقیقت ایہہ وی اے جے گڈی ہووے یا لاڑی منہواں پہنا رٹھی وی چُپ چاپ میہ بہنیاں۔ باندی گل اے جے ”چلتی کا نام گاڑی“ گڈیے کی چالور کھنے واسطے اس نی مرمت ضروری ہوئی اے۔ اس واسطے اس کی ور کشاپ بچ سٹنا پینا اے۔

زنانی چنڈھ کھائی چُپ کری بھیئی جائے تاں تہ اوہ زنانی میہ کوئی منج گاں ہوئی۔ پہلے وقتاں بچ لاڑی مار کھائی پیو کے نہی جانی سی۔ اُج کل لاڑی واسطے دو مین سیل نے بوہے گھلے ہونے ہین۔ جتھاں کھر والے کی سزا دوانے نے کئی طریقے استعمال کیے جانے ہین ہو ر جتھاں بچی کھر والے کی کئی طریقیاں نال تلیاں رگڑائیاں جانیاں ہین۔ انہاں دواں بچ اک ہو ر گل سا بچی ایہہ اے جے اگر بگڑ جاو ن تاں دوئے بڑی پھیر دی طراں ٹرنا پھرنا ہو ر جینا اوکھا کر دینیاں ہین۔ مثلاً لاڑی بگڑی جائے تاں کھر میہ چلنا۔ بندہ کھرے بچ ریٹی وی نہ کھرے نار ہنا اے نہ کہاٹ نا۔ سنگ تر وڑ چھوڑے تاں وی باقی زندگی گزارنی اوکھی ہو جانی اے۔ زندگی ڈگمگان لگنی اے ہو ر بندہ رنڈ وا آکھوایا جان لگنا اے۔ گڈی بگڑی جائے تہ سفر طے میہ ہونا۔ بندہ گڈی سمیت چھوٹے کھان لگنا اے۔ زندگی داؤ اُپر لگ جانی اے۔ دواں نے معاملے بچ اک ذری وی پھیل چُک ہوئی میہ جے بندے ہر حال بچ سزا پہنکنتی ہی پہنکنتی اے۔ دواں کولوں کسے قسم نی وی صلے ہو ر اچھائی نی میند کرنی فضول اے۔

بہر حال انہی وی کوئی نی جے دواں بچ ہر اک گل سانجھی اے۔ کجھاں
 معاملیاں بچ دوئے لاڑی ہو رگڈی بالکل ہی بکھ بکھ ہین۔ مثلاً راتیں اک دو بجے یا
 کسے ویلے ٹساں نا پروگرام بنی گیا یا کوئی مجبوری پئی گئی، کسے کے نے سلسلے بچ
 کدھرے نیڑے یادو رجانا اے تاں کہہ مجال جے ٹساں نی گڈی کی کوئی عذر یا انکار
 ہووے۔ ٹسیں اپنی گڈی نامنہ جدھر چاہسو اُدھر موڑی سکسو گے ہو راوہ دروڑ پیسی
 گی۔ ٹساں کی لاڑی ہار گڈی کی منان نی لوڑیہ لگی پینا۔ سو سو جتن ہو ر خوشامد نہ کرنا
 پیسی گی۔ کسے طراں نی منت عاجزی نی لوڑ نہ پیسی گی۔

اس تھیں علاوہ ٹسیں جس ویلے چاہسو گڈی چھوڑی سکے او پچی سکے او مگر
 لاڑی کولوں آسانی نال جان نیہہ چھڑوائی سکے۔ اپنی بچی تڑٹی گڈی دیسی نویں آنی
 سکسو گے، مگر لاڑی نے معاملے بچ ایہہ گل ناممکن اے۔ گڈی اگر سستے تھیں سستے ہی
 یکسی تاں وی کجھ نہ کجھ دیسی جاسی، مگر لاڑی نامعاملہ اس نے برعکس ہی ہونا اے۔
 پہلاں تہ اس کولوں جان ہی نیہہ چھٹنی ہو ر اگر چھٹی وی جائے تاں مہر سمیت خرچہ
 پانی ہو ر نال بال بچے وی دینے پینے ہین۔ اسراں اک چنگا پہلا انسان یتیم تہ مسکین
 ہوئی جانا اے۔ مکنی گل ایہہ جے گڈی کجھ نہ کجھ دیسی جانی اے، مگر لاڑی سب کجھ
 دینی جانی اے۔ اگر کجھ دینی اے تہ ٹھیر ساری رسوائی، خجالت، تنہائی ہو ر ٹھیر سارے
 الزام تاں جے بندہ ہو ر کسے نے قابل ہی نہ رہوے۔ لہذا دواں نے معاملے بچ
 بیوں متی احتیاط نی ضرورت ہونی اے۔



لڑائی

لڑائی تھیں گُن واقف میہ۔ اک جانی پشانی چیز اے۔ گھٹنے گھلانے والیاں
کی گمنامی نے کہیرے تھیں باہر کڈھنی اے۔ چرچا بچ رکھنی اے۔ ناں مشہور کرنی
اے۔ شہرت بٹورنی اے۔ نت نویں انداز اختیار کرنی اے۔ نویں نویں لوکاں سنگ
میل جول کرانی اے۔ دوستاں یاراں نا حلقہ بدھانے بچ بڑی مددگار ثابت ہونی
اے۔ تماشا نیاں نی پہنچا کھٹھی کرنی اے۔ اس نی وسعت تہ طوالت نی کوئی حد میہ
ہونی۔ حسبِ توفیق کوئی جتنا چاہوئے اس کی طول دینی دے۔

لڑائی نی بسم اللہ کیاں طریقیاں نال ہونی اے۔ کدے کدے ایہہ اچانک
ہی پہنچ کی جانی اے تہ کدے کدے سوچی سمجھی تہ اک منصوبہ بند طریقے سنگ اس نا
آغاز کیتا جانا اے تہ خاطر خواہ نتیجہ وی حاصل کیتے جانے ہن۔ اس نے وجہ دنا تعلق
انساناں نے وجہ دنا ہی ہونا اے۔ یعنی لڑائی چنے جاگنے نا اک ثبوت وی ہونی
اے۔ البتہ ایہہ کسے کہلے بندے نے بس ناروگ میہ اے کہ اوہ لڑائی کی وجود بچ آنی
تہ زندہ رکھے۔ جس طراں تاڑی اک ہتھ سنگ میہ بجنی اے اسے طراں کوئی اک کہلا بندہ
اس کی وجود بچ آنی تہ مدد تقویت تہ شہرت میہ بخشی سکنا۔ عام طور اُپر ایہہ دوواں یا

دوواں تھیں زیادہ لوکاں، قوماں یا مملکاں نیاں آپسی کوششاں نی بدولت وجود بچ آونی
اے تہ اپنے اپنے گما ہنڈیاں چاہنے والیاں، ہمدرداں تہ خیر خواہاں نی بدولت تہ شمولیت
سنگ خوب پھیلنی تہ پھلنی اے۔

بندیاں نیاں آپسی لڑائیاں نیاں کوششاں جس ویلے کامیاب نیہہ ہوئی
سکدیاں تہ اُس ویلے اوہ جانوراں کی آپس بچ لڑانے نا اہتمام تہ انتظام کرنے ہین۔
کدے کبوتر، کدے داند، کدے لیلے ہنڈو، کدے لگڑاں تہ کدے چھوٹیاں سنڈیاں
کی آپس بچ لڑوائی تہ اپنے جذبیاں نی تسکین کرنے ہین۔ حالانکہ جانور آپس بچ لڑنا
پسند نیہہ کرنے، مگر تربیت تہ ماحول نی اہمیت اپنی جگہ مننے نے قابل اے۔ جس ویلے
لڑنے نی تربیت کیہتی جانی اے ماحول مہیا کیتا جانا اے، اس ویلے حیوان وی گھٹنے
واسطے تیار ہوئی جانے ہین تہ کریڈٹ انساناں نے حصے بچ جانا اے۔

اس بچ کوئی شک نیہہ کہ ہر دو فریق اپنے اپنے فائدے تہ جیتنے نی خاطر ہی
لڑائی لڑنے ہین، مگر انہاں نی لڑائی نی بدولت دُورے ترے لوک وی فیضیاب ہونے
ہین۔ کدیاں نی دال روٹی چلنا شروع ہوئی جانی اے۔ اس دال روٹی نا کھوں کی اس
قدر چسکا پئی جانا اے کہ اوہ اسے کوشش بچ لگی جانے ہین کہ کدے نہ کدے لڑائی لگی
رہوے تہ انہاں نی دال روٹی چلنی رہوے۔

کدے زمین یا مکان نے حوالے سنگ لڑائی لگے تہ متعلقہ محکمے نے لوکاں نی
آمدن بچ خاطر خواہ باہدے نا سبب بنی اے۔ اگر کدے چوری چکاری تہ مار کٹائی تک
نوبت آنی تہ جہنی اے تہ معاملہ پولیس، تھانے تھیں ہونیاں ہوئیاں عدالت تکر جائی ہو جھنا
اے تہ ایہہ لڑائی پولیس، گواہاں، ڈاکٹراں، وکیلاں تہ باقی ساریاں متعلقہ لوکاں نی
روزی روٹی نا اک کامیاب ذریعہ ثابت ہوئی اے۔

لڑائی پہناویں جے اک فطری جذبہ اے، مگر اس دُنیا بچ کجھ ایچے بُدل وی موجود ہین کہ جہاں کی لکھ بُرا آکھو، مندیاں چنگیاں آکھو، کئی کئی ناں رکھو، کئی الزام دیتی جاؤ، مگر کہہ مجال جے لڑائی کرنے واسطے ذرا وی آمادہ ہوئی جان۔ ابھیاں سیانیاں کی کوئی بُدل وی نیہہ آکھی سکنا۔

ویسے ایہہ اک حقیقت اے کہ ہر ایریا غیر لڑائی نیہہ لڑی سکنا۔ کیاں کہ گھلنا تہ لڑائی لڑنا اک فن اے۔ اک ہنر اے۔ اک کمال اے تہ کمال ہر کسے نامقدر نیہہ ہوئی سکنا۔ کمال تہ کسے بہادر تہ جوانمرد نے حصے بچ ہی آئی سکنا اے۔ ظاہر اے کہ لڑائی لڑنے والے بہادر ہونے ہین۔ اپنی پہچان آپ ہونے ہین۔ اُنہاں کی کسے نے حوالے نی ضرورت نیہہ ہونی اے۔

تکلیا گیا اے کہ جیہڑے لوک آپوں لڑائی لڑنے نے اہل نیہہ ہونے، اُنہاں بچوں کجھ لوک ہوراں کی لڑانے تہ گھلنا تہ انتظام تہ اہتمام بخوبی کرنے رہنے ہین۔ لڑائی نے حوالے سنگ اگر گروپ بندی کیتی جائے تہ ترے طراں نے لوک اہمیت نے حامل ہونے ہین۔ اک اوہ جیہڑے لڑائی لڑنے نے فن بچ ماہر تہ تاک ہونے ہین۔ دُوے اوہ جیہڑے لڑائی لڑنے نے فن تھیں ناوقف ہونے ہین۔ البتہ ہوراں کی لڑانے نے فن تہ کمال نال مالا مال ہونے ہین۔ ترنیا گروپ تماشا نیاں نا ہونا اے۔ تکلیا جائے تہ ترنیا ہی گروپ بڑے اہم ہونے ہین۔ پہلا گروپ اگر لڑنے واسطے تیار رہنا اے۔ سر تہڑنی بازی لائی دینا اے تہ دُو اگر وپ وی کجھ کہٹ نیہہ اے۔ ایہہ گروپ لڑائی لڑنے نے جواز مہیا کرنا اے۔ اگر لڑائی شروع ہوئی گئی اے تہ اس کی بدھانے واسطے دوڑ دھوپ کرنا اے۔ خیر خواہ تہ ہمدرد بننا اے۔ کدے جاسوسی نا فریضہ انجام دینا اے۔ اس گروپ نا لگ بھگ اُوے رول ہونا اے جیہڑا اہلیاں نی لڑائی بچ بندرنا ہونا اے۔

ترے گروپ نا کسے سنگ کوئی لینا دینا میہ ہونا۔ اس گروپ نا کم صرف
تماشہ تکنا ہونا اے۔ اس گروپ فی موجودگی لڑنے والیاں واسطے ہمت، حوصلہ تہ غیرت
نا باعث ہونی اے۔ غیرت کی جگانا اے تہ اس طراں اوہ ہور جذبے سنگ لڑائی بچ
جٹ جانے ہین۔

عام طور اُپر لڑائی وی ترے قسم فی ہونی اے..... زبانی، جسمانی تہ
عدالتی۔ زبانی لڑائی نا بڑا فائدہ ایہہ اے کہ اس بچ کوئی ظاہری چوٹ نظر میہہ آونی
تہ نہ ہی ثبوت تہ گواہ وغیرہ جٹانے نے تھینے کرنے پینے ہین۔ ایہہ ہوائی فائرنگ
نے برابر ہونی اے۔ اس لڑائی نال زخم لگنے یا رت نکلنے نا کوئی چانس میہہ ہونا۔
البتہ ایہہ لہو نے اتھروں روائی سکئی اے۔ اس لڑائی نا سب تھیں بڑا فائدہ ایہہ اے
کہ ایہہ پریکٹیکل تہ جسمانی لڑائی کی دعوت دینی اے۔ اسے طراں جسمانی لڑائی
نے وی بڑے فائدے ہونے ہین۔ جسمانی لڑائی سنگ جسم مضبوط تہ مستحکم ہونا
اے۔ لڑائی فی سب تھیں اُچی قسم نا ناں عدالتی لڑائی اے۔ اس لڑائی کی لڑنے تہ
جیت اپنے ناں کرنے واسطے لوکاں کی کئی کئی سالوں تکر عدالت بچ ٹرنا پینا اے۔
عدالتی لڑائی فی بدولت بندیاں نا ناں مشہور ہونا اے۔ ایہہ لڑائی لوکاں کی چونکیاں
با عمل تہ دوڑ دھوپ بچ مصروف رکھنی اے۔ بعض لوک لڑائی کی غربت تہ افلاس فی
پیداوار سمجھنے ہین، مگر سچ ایہہ اے کہ اس کی غریب فی چھو نیڑی تھیں لئی تہ امیر نے
بنگلے تک نہنیاں ہوئیاں تکیا جائی سکنا اے۔ پارلیمنٹ ہاؤس جتھے پڑھے لکھے تہ
امیر ترین لوک ہونے ہین اُتھے وی آئے دن لڑائی نے منظر تکنے بچ آونے ہین۔
دُنیا نے امیر ترین تہ طاقتور مُلک لڑائی کی ہی ترجیح دینے آئے ہین تہ اپنی قابلیت نا
لوہا منوانے آئے ہین۔

کئی مُلک جیہڑے دُنیا نے نقشے اُپر اک نقطے نے برابر دسے ہِن، مگر اپنیاں
 لڑائیاں تہ اسے طراں نیاں دوئیاں تریاں کاروائیاں نی بدولت عالمی منظر نامے بچ
 اوّل نمبر اُپر رہنے ہِن۔ صاف گل ایہہ اے کہ اوہ اگر لڑائی بچ ماہر نہ ہونے تہ کوئی
 اُنہاں نے ناں تھیں وی واقف نہ ہووے آ۔ مگر گجھ لوک لڑائی نا مفہوم سمجھنے تھیں بڑے
 قاصر ہِن۔ اوہ لڑائی کی محض غربت تہ افلاس نی پیداوار سمجھنے ہِن۔ اس واسطے ضروری
 اے کہ اوہ اپنے نقطہ نظر نی وضاحت کرن۔

لڑائی نی اک ہو روی قسم اے جس کی خفیہ لڑائی آکھیا جانا اے۔ ایہہ لڑائی اکثر
 انسان اپنے آپ نال ہی لڑنے رہنے ہِن۔ اس لڑائی نے بارے بچ کسے ویلے گل
 کرساں گے۔



مظلوم

حضرات!، ایساں تہ تہو ائی کالسریاں ہی دینیاں آئیاں ہین کہ انہاں اُپر ظلم
ہونے ہین تہ اوہ مظلوم ہین تہ حقیقت وی ایہہ ہی اے جے کالسریاں اُپر ظلم ہوئے
ہین، اُج وی ہونے ہین تہ اُگے وی ہونے رہسن گے۔
تاریخ گواہ اے کہ کالسریاں زمانہ قدیم تھیں ظلم ستم چہلنیاں آیاں ہین۔
اُج وی سارا سنسار اِس گل نی گواہی دینا اے کہ کالسریاں اُپر ظلم ہونا اے۔
مگر ایہہ وی اک حقیقت اے کہ کالسریاں اُپر ہونے والے ظلم و ستم کی ہر
دورتہ ہر زمانے بچ محسوس کیتا گیا اے۔ اس کی بُرائی غلط آکھیا گیا اے تہ کالسریاں کی
بذات خود ظلم و ستم نے خلاف آواز چلنے واسطے حوصلہ دتا گیا اے۔ اِس طراں ہر دور تہ
ہر زمانے بچ اک دُنیا کالسریاں نی ہمدرد تہ خیر خواہ وی رہی اے۔ تکیا جائے تہ اِس
دُنیا بچ ہو روی بڑے لوک مظلوم ہین، جیہڑے گناہ کیتے بغیر سلاخاں چکھے بھیجی جانے
ہین، اوہ وی مظلوم ہین۔ جیہڑے لوک فٹ پاتھ اُپر رہنے ہین تہ ساری عمر منگی منگی
گزارہ کرنے ہین، اوہ وی مظلوم ہین۔ چپچک بم تہما کے بچ مرنے والے وی مظلوم
ہین۔ طراں طراں نیاں مانگاں تہ شرطیں لئی اغوا کیتے جان والے تہ حد درجہ مظلوم
ہین۔

بہر حال انہاں ساریاں تھیں ہٹی کے تکیا جائے تہ بالخصوص کالسریاں نے مدِ مقابل بچ تکیا جائے تہ اُساں کی جیہڑی سب تھیں زیادہ مفلوک الحال تہ مظلوم مخلوق نظر آونی اے اوہ کُہر والیاں نی ذات گرامی اے۔ ایہہ ذات ہوراں تھیں تہ بالخصوص کالسریاں تھیں وی زیادہ مظلوم اِس واسطے اے کہ اِس مخلوق نا اُج توڑیں کوئی ہمنوا تہ ہمدرد پیدا نیہہ ہوئی سکيا۔ ایہجا کوئی سائباں نیہہ بنیا جتھے ایہہ پناہ لئی سکے۔ ایہجا کوئی قانون نیہہ بنیا جیہڑا اِس کی کوئی راحت دیتی سکے۔ ایہجی کوئی تنظیم نیہہ بنی جس نا اوہ سہارا دینی سکے۔ کُہر والی نسی تہ پیو کے جانی اے نال تہمکی وی دیتی جانی اے ہور بچیاں کی وی سنگ لئی جانی اے۔ خرچے نے طور اُپر کُہر بار تھیں لئی کے کُہر والے نے گوچے وی صاف کری جانی اے۔

مگر کُہر والا جائے تہ جائے گُتھے ہور کس اگے فریاد کرے۔ کالسری سپنہ ٹھھی تہ جانی اے تہ تھانے جانی رپورٹ لکھانی اے کہ ماہڑا کُہر والا مگی مارنا کُٹنا اے۔ ہُن اگر ایہہ ہی کُجھ کسے بدنصیب کُہر والے نال ہونا اے تہ تھانے جانی تہ کس مُنہہ سنگ رپورٹ لکھوائے کہ ”کُہر والی مگی مارنی کُٹنی اے۔ چچے بیلنے نال مارنی اے۔ پہنکھیاں مارنی اے۔“ کہہ اُس نی مردانگی اُپر حرف نیہہ آن لگا۔ کہہ اُس نے اُکا مجروح نیہہ ہون لگی۔ اِس واسطے اوہ کدھرے نیہہ جانا تہ نہ ہی جانے نی کوشش کرنا اے۔ فرض کیتا اوہ ٹری وی جانا اے۔ اپنی اُکا عزت تہ مردانگی کی لت ماری تہ اگے نکلی وی جانا اے تاں وی کہہ کیاں جے اُس اُپر یقین ہی کون کرسی گا۔ اُلٹا لوک اُس کی پاگل جھسن گے۔ نالائق بُز دل تہ کُہر والے نے ناں اُپر اک دھبہ سمجھیا جاسی گا۔

کُہر والی ٹھاٹھ سنگ جانی کے رپورٹ لکھوانی اے کہ ماہڑا کُہر والا مگی گالیاں کڈھنا اے۔ مگر کوئی کُہر والا اگر قسم کری وی تہ آکھے کہ کُہر والی مگی گالیاں

کدھنی اے تہ کوئی اُس نی گل اُپر یقین ہی بیہ کرن لگا۔ اُلٹا اُس ناندق اُڑایا جاسی گا
تہ طراں طراں نے موضوع کتے جاسن گے کہ ایہہ کچیا کھر والا اے کھر والی نی
گالیاں تھیں ہی ڈری گیا اے۔

مگر زمانہ جاننا اے تہ سارے تجربہ کار جاننے ہین کہ کھر والی نیاں گالیاں
ازاراں تہ تھیا راتھیں بڑھی چڑھی تہ ہونیاں ہین۔ نہایت دل آزار ہونیاں ہین۔
نشرت ہونیاں ہین۔ جگر نے آر پار ہوئی جانیاں ہین۔ آری کٹاری تہ تلوار تھیں تیز تہنار
ہونیاں ہین۔

ہُن انہاں گالیاں تھیں بچنے واسطے کھر والا اپنی کھر والی کولوں دؤر دؤر تہ ڈریا
ڈریا رہنا اے۔ زیادہ تر کھر تھیں باہر رہن لگنا اے۔ سوچاں بچ گم چٹھے سدھے کم کرن لگنا
اے۔ ابھی صورت حال بچ اُس اُپر نہایت سنگین الزام لگائے جانے ہین۔ کھر والی نے
حوالے سنگ لا پرواہی برتنے تہ ہوروی کتنے ہی سارے الزام۔ ہُن اک بے گناہ ہی
جاننا اے کہ چٹھو ٹھے الزام لگنے سنگ روح کس قدر فنا ہوئی جانی اے۔

غور کرنے نی گل اے کہ مظلوم کالسریاں نی حمایتی ساریاں کالسریاں
مظلوم کالسریاں نے حمایتی سارے مرد تہ مظلوم کالسریاں نے حمایتی سارے آہنڈی
گماہنڈی، مگر کوئی دہسے کہ مظلوم کھر والے ناکیہڑا حمایتی اے۔ فرض کرنے ہاں اُس
نے حمایتی اُس نے پہنیں پہراتہ ماء پیو ہو سکے ہین، مگر اوہ تہ پہلاں ہی بلکہ اوّل روز
تھیں ہی نشا نے اُپر ہونے ہین۔ ایچے کتنے ہی بدنصیب کھر والے ہین جیہڑے اپنیاں
سمیت جیلاں بچ جائی چکے نے ہین۔

جد کہ کھر والی نے حمایتی اُس نے پہنیں پہراتہ ماء پیو ہونے ہی ہین، مگر
انہاں تھیں علاوہ ہر خاص تہ عام آدمی، سارے نے سارے گرائیں تہ گماہنڈی، سکھی

سہیلیاں تہ خاص طور اُپر قانون کُہر والی ناسب تھیں بڑا ہمدرد حمایتی تہ سہارا ہونا اے۔
 اِس دُنیا بچ اگر کوئی کہلاتہ بے سہارا اے تہ اوہ بے چارہ کُہر والا ہی اے جیہڑا نہ اُگلی
 سکنا اے تہ نہ ہی نگلی سکنا اے۔ جد تھیں کُہر یلو تشدد مخالف قانون بنیا اے کُہر
 والے بے چارے ہور وی معصوم تہ مظلوم ہوئی گئے ہین۔

منیا کہ ایہہ قانون کالسریاں نی بڑی مدد تہ حوصلہ افزائی کر رہیا اے۔ اِس
 قانون نی مدد تہ شہہ نی بدولت کئی کالسریاں طلاق حاصل کرنے بچ کامیاب ہوئی
 چکیاں ہین۔ اِس تھیں علاوہ خود سوزی یعنی اپنے آپ کی اگ لانے تہ خود کشی جئے کئی
 خطرناک تہ دلیرانہ قدم وی اُٹھائی چکیاں ہین۔ انہاں نیاں کامیابیاں ناپہاں پہاویں
 ہی کُہر والیاں اُپر پوڑے۔ کُہر والا پہاویں کُہن نی طراں پٹھیا جائے، مگر انہاں نی بلا
 تھیں۔

اقوامی متحدہ اک خاموش تہ بے ضرر ادارہ اے۔ اوہ ہوراں نے معاملیاں بچ
 کدے کدائیں ہی دخل دینا اے تاں جے کوئی فریق ناراض نہ ہوئی جائے، مگر قسمت
 نے راز تلو کہ حقوق نسواں نے حقدار اتھے وی موجود ہین تہ کالسریاں کی ہور طاقتور
 بنانے واسطے آئے دن نویں نویں شوشے چھوڑنے رہنے ہین۔ مگر کُہر والے اپنی اُچی
 تہ معتبر ذات کی لئی تہ چُپ چاپ بیٹھے ہین۔ اِس مظلوم مخلوق نے اپنے بارے بچ
 کدے سوچیا ہی نیہہ اے۔ اگر سوچیا اے تہ بس اتنا ہی سوچیا اے کہ کس طراں اپنی
 ساکھ بچائی جائے تہ کس طراں اپنا پُہر قائم رکھیا جائے۔

اَساں کی اِس حقیقت تھیں انکار نیہہ اے کہ کالسریاں مظلوم نہیں ہین مگر ایہہ
 وی اک حقیقت اے کہ اِس خوبصورت دُنیا بچ ایہجے کُہر والیاں نی کمی وی نیہہ اے
 جیہڑے کالسریاں تھیں وی زیادہ مظلوم تہ مجبور ہین تہ اپنی اپنی کُہر والیاں نی بدولت

ہی مظلوم ہیں۔ انہاں اُپر مدید ظلم ایہہ اے کہ انہاں کی کوئی مظلوم مننے واسطے تیار ہی
 نیہہ اے۔ انہاں اُپر ہونے والے ظلم و ستم کی کوئی محسوس ہی نیہہ کرنا اے تہ کرے وی
 کوئی کس طراں ایہہ مظلوم مخلوق اپنے اُپر ہونے والے ظلم و ستم نے خلاف اپنی آواز
 چلنی ہی نیہہ اے بلکہ اپنی آواز وی دبائی رکھنی اے۔ جد کہ گجھ حاصل کرنے واسطے گجھ
 چھوڑنا وی پینا اے۔ مگر ایہہ گل اس مخلوق نے پلے پلے وی تہ تاں نا۔ اصل بچ
 کالسریاں اپنی کوششاں تہ ہمت و حوصلے سنگ کئی مشکل مرحلے طے کیتے ہیں تہ کئی
 قانونی جواز وی حاصل کری ہندے ہیں۔ کُہر والے اگر اسے طراں خاموشی سنگ مار
 کھانے رہے تہ مار کٹائی نی بدولت جسم اُپر آنے والیاں چوٹاں تہ زخماں نے نشان
 چھپانے واسطے چھوٹھے بہانے بنانے رہے پھنگھ تہ ترہیہ برداشت کرنے رہے تہ حد
 تھیں زیادہ صبر تہ برداشت نا مظاہرہ کرنے رہے تاں اوہ دن دؤر نیہہ اے جے
 کالسریاں کُہر والے نی مار کٹائی تہ ٹھکائی کرنے نا قانونی حق وی حاصل کرنے بچ
 کامیاب ہو جاسن گکیاں۔ دراصل خود نیہہ تہ دُویاں کولوں وی سکھیا جانی سکنا اے۔
 ہر سال مارچ نے مہینے بچ حقوق نسواں نے بڑے اُچے اُچے نعرے لگنے رہنے ہیں۔
 ہُن ویلہ اے کہ کُہر والے وی اپنے حق حقوق واسطے واز اُچی کرن۔ مگر پہل کرے
 کون؟ گل اتھے آئی تہ لگی جانی اے کہ مردانگی کی گتھے چھوڑیا جائے۔

کُہر والی پھنگارنی اے تہ کُہر والا سہی جانا اے۔ اگر جوابی کاروائی نے طور اُپر
 ہتھ چکنا اے، جیل جانا اے۔ اس واسطے ایہہ مظلوم تہ معصوم مخلوق بس اپنے آپ کی ہر
 طراں نے وار تھیں بچانے تہ ہر طراں نے وار کی چھپانے نی کوشش بچ رہی اے۔ اللہ
 اس نی لاج تہ شرم رکھے۔ آمین!



گُرسی

حضرات! تُوں یقین کرو یا نہ کرو، اُساں کی گُرسی بے حد عزیز اے۔ اِس واسطے میہ کہ سرکاری عہدیدار ہاں ہو را اپنے کُہر نے کم کاج فی تھ کاوٹ آفس بچ بکھی تہ پورا پورا دن گُرسی اُپر بھینٹی تہ اُتار نے ہاں۔

ممکن اے تُوں ایہہ وی آکھو کہ ”واہ! ایہہ کے تِگ ہوئی، پہلا گُرسی جیئی نعمت کس کی عزیز نہ ہوسی۔ چواں حرفاں تہ چواں جنگاں والی گُرسی واسطے ہی تہ ہر کوئی سر تہڑنی بازی لانا رہنا اے۔ اتھے تک کہ کدے حکومتاں گرائیاں جانی رہیاں ہین تہ کدے مندر تہ مسجداں!

جی آہاں! تُوں ناکہنا بجا۔ بے شک گُرسی من لہجانی اے۔ فرش توں عرش تک پہچانی اے۔ سَکھ تہ آرام دینی اے۔ سرکاری دفتراں بچ فور تھ کلاس ملازماں واسطے کدے شجر ممنوع ہونی سی ہُن اوہ وی گُرسی اُپر براجمان ہوئی تہ سرکاری ملازم ہونے نا گھلم گھلا اظہار کرنے ہین۔

دراصل عزت ہو ر شہرت بچ گُرسی نے اوہ مقام حاصل کیتا اے کہ اِس کی حاصل کرنے واسطے حضرت انسان تھیں ہُن گجھ وی دؤ رہیہ رہیا۔

بے شک گُرسی انسان فی قدر و منزلت بچ باہد کرنی اے۔ چتر توڑیں انسان گُرسی اُپر قابض رہنا اے، اُس کی وی آئی پی فی حیثیت ملنی ہئی اے۔ حضرت آقا، عالی جناب تہ سرکار جیسے شاہی خاندان سنگ تعلق رکھنے والیاں لفظاں تہ آداباں سنگ اِس کی رجھایا جانا

اے۔ اس نے اُگے چُکھے تہ سچے کھجے ہر وقت لوکاں نی پہنچو لگی رُہنی اے۔ کسے نے سلام نا جواب دینے نی نہ اُس کی فرصت ہونی اے تہ نہ ضرورت۔ گُرسی اپنے اُپر براجمان ہونے والے نی عزت ہو ر شہرت نی ضامن تہ پناہ گاہ ہونی اے۔ کسے مائی نے لعل نی ایہہ ہمت تہ جسارت نیہہ ہونی کہ اوہ کُرسی اُپر براجمان شخصیت کی اکھ چُکی تہ تکی سکے۔ صرف ایہہ ہی نیہہ، گُرسی ہر پوشیدہ عمل ہو ر راز نی پردہ دار ہونی اے۔ اتھے تک کہ سی بی آئی وی کافی تانک چہا نک تھیں بعد اکھیاں ملنی رہی جانی اے۔

مگر اُساں نے نزدیک گُرسی نے عزیز ہونے نیاں گجھ ہو ر ہی وجہاں ہین۔ فرصت نیاں کہو یاں بچ اس اکثر گُرسی کی تکلے رہنے ہاں۔ اُساں کی گُرسی نے انگ انگ بچوں وقار تہ جلال نظر آؤ نا اے۔ جنس نے لحاظ سنگ گُرسی بے شک نسوانی صنف بچ شمار ہونی اے، مگر اس نی فطرت تہ انداز ہو ر اطوار بچ نسوانیت نی ماسہ رفق وی نظر نیہہ آؤ نی۔ ایہہ چھوئی موئی بالکل نیہہ۔ ایہہ اپنے آپ بچ دم خم رکھنی اے۔ اس نے انگ انگ تھیں شان و شوکت ٹپکنی اے ہو ر ایہی اوہ خاص وجہ اے کہ اُساں کی ایہہ بے حد عزیز اے۔ ایہہ اپنے مضبوط بازواں نے صدقے بڑے تھیں بڑے وارنا مقابلہ کری سکنی اے۔

گُرسی نی ساخت رنگ رُپ ہو ر ایہہ کہ گُرسی کیہڑی چیز نی بنی نی اے تھیں قطع نظر ٹس وی اگر گُرسی کی گجھ چر واسطے اگر غور سنگ تکلے تہ ٹساں کی گُرسی بچ اعلیٰ درجے نا وقار تہ فخر یہ انداز نظر آؤ سی گا ہو ر شاید ایہہ ہی وجہ اے کہ کوئی شخص کتنا ہی حلیم تہ شریف ہوؤے پہناویں ہی کہہ بچ کہہ والی نے ہر حکم نی تعمیل کرنے والا ہو و آے مگر گُرسی اُپر بہنیاں ہی اس نے تن من بچ اکڑ اکڑ اتا تہ غرور رچی بسی جانا اے ہو ر دُونیاں واسطے اس نا ہر حکم مننا ضروری ہوئی جانا اے۔

گُرسی نی اہمیت اس ویلے کچھ زیادہ ہی اُساں نے سامنے آؤنی اے جس ویلے اُساں نیاں نظراں اُنہاں لوکاں اُپر پینیاں ہین جیہڑے کسے نہ کسے وجہ تھیں گُرسی تھیں دست بردار ہوئی چلے نے۔ گُتھے اوہ وقت کہ کسے نے سلام نے جواب بچ اپنے سر کی جنبش دینے نی وی زحمت گوارہ نیہہ سن کرنے ہو رگتھے اُج کہ دو نیاں سنگ سلام کلام کرنے نی تگ بچ سر چلکی تہ اکھیں پھلائی رکھنے ہین۔

اگر سوال پچھیا جائے کہ انسان بڑا اے کہ گُرسی تہ اس نا جواب گُرسی تھیں اُترے ہو نیاں کی تکی تہ بہ آسانی دتا جائی سکنا اے کہ گُرسی بڑی اے تہ اشرف المخلوقات ہونے نا دعویٰ دار حضرت انسان گُرسی تھیں کئی درجے کہٹ اے۔

گُرسی نے سنگ میز وی ہونا اے۔ میز کی بجاطور اُپر گُرسی نی شریک حیات آکھیا جائی سکنا اے تہ گُرسی نی اہمیت نا اندازہ اس گل تھیں وی ظاہر ہونا اے کہ ساری دؤڑ دھوپ گُرسی واسطے کیتی جانی اے ہو ر میز کی ذرا وی اہمیت نیہہ دتی جانی۔ ایہہ بے چارہ خادم گُرسی نال اپنے آپ ہی دستیاب ہوئی جانا اے۔ جس طراں بوہٹی نے نال داج یا فر داج نے نال بوہٹی۔ اُس اُج تکر اس اُلجھن کی سمجھی نیہہ سکے کہ داج بوہٹی واسطے یا بوہٹی داج واسطے آندی جانی اے۔ جس ویلے سُننے ہاں کہ نویں نویلی بوہٹی موت نے مُنہہ بچ چلی گئی اے اُس ہو ر اُلجھی جانے ہاں کہ داج تہ بوہٹی کہہ دوئے اک واسطے لازم تہ ملزوم ہین۔

جتھے توڑیں گُرسی تہ میز نا تعلق اے ساری اہمیت گُرسی کی دتی جانی اے تہ میز اک ذمہ دار شریک حیات نی طراں اپنیاں خدمتاں انجام دینیاں ہو نیاں ہر وقت گُرسی نے سامنے ریہی تہ اک ٹہال نا کم انجام دینا اے۔ گُرسی نیاں کئی قسماں ہو نیاں ہین۔ اک گُرسی تہ اوہ اے جس کی اُس اپنی پسند سنگ دام دیتی تہ بازار بچوں خریدی تہ آنے ہاں۔ دوئی گُرسی اوہ اے جیہڑی کسے مخصوص عہدے واسطے وقف ہوئی اے۔ اُج نے زمانے بچ

اس کی عہدے نے عوض بچ خرید یا جانا اے۔ مگر مشکل ایہہ ہونی اے کہ اس نے دام بازار بچ پکنے والی گریاں فی طراں مقرر نہیہ ہونے ہور نہ ہی ایہہ گھلے عام پکنیاں ہین۔ جس نے کول زیادہ مال ہوسی اوہ ہی اس کی خرید نے بچ کامیاب ہوسی۔

عام طور اُپر سرکار فی طرفوں دو یا تین خالی گریاں فی پھر پائی واسطے اشتہار کڈھیا جاسی گا تہ باصلاحیت خواہشمند حضرات کولوں بچ سورست سوروپے نے ڈرافٹ سمیت درخواستاں طلب کیتیاں جاسن۔ سال مہینے دن تہ پل پل گنتے تھیں بعد انٹرویو نا دن نصیب ہوسی گا۔ اس دوران ہر اُمیدوار سر تھوڑی بازی لائی رکھسی گا۔ سفارش کرنے والے لوڑے جاسن۔ معاملات طے پاسن۔ لین دین ہوسی مگر ہزاراں خواہشمنداں بچوں صرف اک دو ہی کامیاب ہوسن گے۔ اس طراں سرکاری گریاں تھو کھاوی دیتی جانیاں ہین۔

بہر حال ”ہر شے کو ہے تغیر لازم“ نے مصداق گرسی فی تعریف تہ اہمیت بچ تغیر بلکہ اک انقلاب آیا اے۔ آج اگر گرسی کی حاصل کرنا مشکل اے تہ گرسی کی بچائی رکھنا ہوروی مشکل اے کیاں جے آج کل لوک گرسی سرکانے بچ تہ گرسی فی جنگ چھی تہ تھوڑا م سنگ گرانے بچ بڑے ماہر ہین۔ گرسی اُپر بھیتی تہ حکومت کیتی جانی اے۔ اس واسطے ضروری اے کہ اس کی مضبوطی سنگ پکڑی رکھیا جائے۔

گرسی نے حسب نسب نال تعلق رکھنے والیاں بچ صوفہ وی شمار ہونا اے۔ ذات پات نے حوالے سنگ اُچا، جنس نے لحاظ سنگ مذکر، جسم نے لحاظ سنگ چنگا پہنار تہ گبر و رنگ روپ تھیں وی چنگا۔ چمک دمک دی خوب نالے آرام دینے والا، مگر اوہ شان و شوکت، اوہ شہرت تہ اوہ گل گتھے جیہڑی گرسی نے جھے بچ جانی اے۔ اس اہڑی تہ جان اے گری.....!



بیگم دولت

فیملی پلاننگ نے منصوبیاں سنگ اتفاق رکھنے نے باوجود بیگم دولت نے بیچ
اولاد داں ہوئیاں۔ رشوت، نیاز، سوغات، تحفہ، تہ کمیشن..... چنگی گل ایہہ ریہی کہ
اولاد جانی نا جنجال نیہہ بنیاں۔ بلکہ سارے ہی چلنے پُزے تہ مصروفیت نے عالم بیچ
گم۔ اس طراں پنجاں نیاں بیچ ہی انگلیاں کہیو بیچ!
کافی عرصہ تھیں سب کچھ ٹھیک ٹھاک چلنا پیاسی، مگر اک روز ایہہ ہویا کہ ذرا
جینی لا پرواہی برتنے نی وجہ تھیں رشوت رنگے ہتھوں پکڑی گئی تہ پولیس نے ہٹا چرھی
گئی۔ اوہ بہتیری چیخی چلائی..... ”بدبختو! مگی چھوڑو۔ مجرماں کی یہ ٹس پکڑی نیہہ
سکئے، بس میں ہی ٹساں کی لہی ہاں۔ کچھ شرم تہ کرو۔ جہاں کی پکڑنا ہونا، انہاں کی ٹس
نسے ناراہ دہسنے ہو۔ کجھاں کی پکڑی وی تہ چھوڑی چھوڑنے ہو۔ میں تہ پہلاں تھیں
پابندیاں بیچ جکڑی نی ہاں۔ اُلٹا ٹساں وی مگی ہی پکڑیا اے۔ میں آنکھنی ہاں
چھوڑو مگی۔“

مگر اس ناکوئی چارہ نہ چلیا تہ پولیس اُسکی اپنے سنگ لئی ٹری گئی۔ تھکاوٹ تہ ندامت سنگ رشوت پر سیو پر سے ہوئی نی سی۔ رستے بچ اک جگہ اُس آکھیا ”ماہڑیاں زنجیراں کھولو تہ ہتھ بچوں پہناو پس پکڑی ہو۔“ پولیس نے جیاں ہی رشوت کی ہتھ بچوں پکڑیا تہ فراوہ انہاں کی نسیناں لکھی نیہ۔ مگر کھائی بچوں نکلیا تہ کھوہ بچ بڑیا نے مصداق چھنی لکھی رشوت فر کجھ لوکاں نے ہتھ چڑھی گئی تہ لوک اُس کی پکڑی تہ اک پیرا ہوراں کول جائی جچے تہ اُس نے خلاف شکایت کرنے ہوئیاں آکھیا ”ایہہ ہُن کھر کھر جانی اے تہ شریف لوکاں نے ایمان اُپر ڈورے سٹھی اے۔ اُساں اپنی بہادری نے طفیل پکڑی آندا اے۔“ پیر اُس ویلے اپنے عقیدت منداں نے بٹکار کھر بے بیٹھے نے سن۔ جہاں بچ بڑے بڑے عہدیدار سن۔ پیر ہوراں گرجدار آواز نال کچھیا ”پہنیں رشوت! ایہہ لوک کہہ آکھن ہین؟ اس تھیں پہلاں کہ لوکاں نے ایمان کمزور کرنے نے جرم بچ تگلی تعزیر لائی جائے کہہ اپنی صفائی بچ توں کجھ بول سکنی ہین؟“

رشوت ہتھ نہھی تہ کھلی گئی۔ ”حضرت! جان نی امان ہووے تہ عرض کراں۔ چوری تہ سپہ زوری۔ میں انہاں دواں نا پہنا رہیہ چائی سکنی۔ اس واسطے سارا سارا بچ دہسنی ہاں۔“ ساریاں کن تھری ہندے تہ رشوت بڑے مودبانہ انداز بچ بولن لگی۔

”حضرت! نیاز تاساں کول پچھنی اے، تحفہ عہدیداراں نے کھر جانا اے۔ سوغات بڑے بڑیاں نے کھر جانی اے۔ کمیشن افسراں نے کھر آونا اے تہ ماہڑی بچ بچ بس شریف تہ سدھے سادھے لوک ہی ریٹی جانے ہین جہاں کی کوئی نیہہ پچھنا۔ میں انہاں نی مدد کرنی ہاں۔ انہاں نا چٹھا ہنڈی گرم کرنی ہاں ہو رجتھے وی آونی جاوونی ہاں ایمانداری کی ہتھ بچوں نیہہ جان دینی ہاں۔ میں کسے کی تھو کھا نیہہ دینی ہاں۔ آئندہ میں کسے نی پکڑ بچ نیہہ آون لگی۔ بس اس دفعہ مگی معاف کیتا جائے۔“

رشوت فی ایہہ صاف گوئی سی یا فر اس ناسر یلا لہجہ پیر ہوراں اُس فی چہم چھاڑ
ضرور کیتی مگر سزا دیئے تھیں پر ہیز ہی کیتی۔

اتفاق سنگ اسے نشست بچ نیاز سوغات تحفہ تہ کمیشن وی موجود سن۔ انہاں
کی ایہہ گل بہوں مندی لگی کہ رشوت ساریاں نے سامنے انہاں کی بدنام کری چھوڑیا۔
اوہ سارے رشوت نے خلاف ہوئی گئے کہ ایہہ اُساں اُپروی پابندی لگوان لگی اے۔
حق وراثت کی لئی تہ بیگم دولت نے کھر بچ پہلاں ہی اختلافات چلی رہے
سن۔ رشوت نے اس طراں پکڑے جانے اُپر اوہ سارے اک جٹ ہوئی تہ اُس نے
خلاف ہوئی گئے۔ سارے ملی تہ رشوت ناک دم کرن لگے۔

مگر رشوت کسے نے مُنہ نہیہ سی لگنا چہنی۔ اس واسطے نوک چھونک
برداشت کرنی وُنی سی۔ مگر کتھے توڑیں۔ برداشت فی اک حد ہونی اے۔ اک روز
مقابلہ آرائی واسطے اس وی کمر کُسی ہندی۔ اس طراں پنجاں بچ جی تہ لڑائی ہوئی۔
رشوت اپنی وکالت آپ کرنے ہوئیاں آکھیا ”میں تُساں ساریاں تھیں بڑی
ہاں۔ زندگی نے اتار چڑھاؤ تکے ہین۔ میں تجربہ کار ہاں۔ بڑیاں بڑیاں کی ماہڑا سہارا
لینا پینا اے۔ میں کسے کی اندر تہ کسے کی باہر کڈھنی ہاں۔ کسے کی عرش تہ کسے کی فرش
دہسنی ہاں۔ میں جس کم بچ ہتھ بہنی ہاں کری تہ چھوڑنی ہاں۔ نہیہ تہ چھان نہیہ چھوڑنی
ہاں، مرنے دم تکر وی۔“

تحفہ سرا چا کری تہ بولیا ”پہنیں! ایہی تہ تو اہڑے بچ بُرائی اے نا۔ توں ہمیش
چہ چانچ وُنی ہین۔“

”چپ رہو، گول مٹولیا! ایہہ شہرت اے۔ اُج کل لوکاں نامزاج بدل لیا نا اے۔ کل تک
لباس کالسریاں فی زینت ہی، اُج نمائش کالسری فی زینت اے۔ مگر توں کہہ جانیں۔“

رشوت کڑکی تہ بولی تہ تھے سر اپنے جنواں بچ دینے والی گل کیتی۔ ادھروں
سوغات بولی پئی ”پہنیں! توں منے یا نہ منے“ مگر بچ ایہہ اے کہ توں پہر و سہ لائق
نیہہ ہیں۔ ادھروں آونی ہیں تہ ادھروں نکل جانی ہیں۔ لیکن میں بڑی معتبر ہاں۔“
رشوت نے کہوری تہ سوغات کی تکیا تہ بولی ”مگی نیتا نہ سمجھ۔ پہر و سہ لائق
اوہ نیہہ ہین جیہڑے وعدے کرنے ہین مگر نبھانے نیہہ ہین۔ ووٹ اک پارٹی نے
ناں اُپر لینے ہین تہ گھس بیٹھ دو جی بچ کرنے ہین۔“ ادھروں کمیشن اک ساتھ کئی وار
کری چھوڑے ”پہنیں! توں چھینی لگنی رہی ہیں۔ راتی چلنی ہیں۔ محفلاں تھیں ڈرنی
ہیں۔ اشاریاں کنایاں بچ گلاں کرنی ہیں۔ تگی منہہ لائیاں ہر کوئی ڈرنا اے۔“ رشوت
بولی ”خاک پابندی اے ماہڑے اُپر۔ کسے دن ماہڑے نال ٹری تہ تک۔ میں دفتر اں
بچ کھلم کھلا آونی جانی ہاں۔ فائلاں نی تھوڑ چھڈنی ہاں۔ توں تہ صرف موٹیاں لوکاں
نے کم آونا ہیں۔ میں ہر کسے نے کم آونی ہاں۔“

مگر کمیشن کتھے ہارمن والا سی۔ اوہ اکڑی تہ بولیا ”مگی اپنے اُپر ناز اے۔ ایہہ
سمجھ کہ میں سرکاری لائسنس یافتہ ہاں۔ بڑیاں بڑیاں سنگ ماہڑا رشتہ ناٹھ اے۔ میں
ٹھاٹھ سنگ ٹرنا پھرنا ہاں۔ تو اہڑی طراں منہہ نیہہ چھپانا۔“

نیا تہ اپنے آپ کی مٹھا میوہ آکھوانے تھیں باز نیہہ سی رہی۔ اوہ آکھنی سی جے
میں مزاراں اُپر چڑھنی ہاں۔ آسماناں نی سیر کرنی ہاں۔ احترام سنگ پیش کیتی جانی
ہاں۔ ساریاں نیاں چھولیاں پہر نی ہاں۔ مگر رشوت بحث تہ تکرار بچوں کسے کی دی
اگے بیہہ سی ہون دینی تہ بیگم دولت بے خبرستی فی سی۔

شور شرابے سنگ اُسنی اکھ کھلی تہ اوہ کہہ تگنی اے کہ اس نے لاڈلیاں سارا
کہر سر اُپر چھنکیا نا اے۔ اوہ بے حد دکھی ہوئی تہ لگی لاڈ پیار سنگ سمجھان ”مگی ٹساں

اُپر ہرگز ایہہ اُمید نیہہ سی کہ تئس اک ہی ماؤنی اولاد ہوئی تہ آپس بچ اس طراں کہلسو
گے۔ دُنیا تہا ہڑے دم نال چلنی اے۔ ساریاں رونقاں سارے ہنگامے تہ سارے
رشتے ناطے تہا ہڑے طفیل ہین تہ تئس ہو کہ آپس بچ لڑی لڑی تہ ماہڑے تک بچ دم کیتا
نا اے۔“

مگر بیگم دولت نی نصیحت نا انہاں اُپر رائی برابر وی اثر نیہہ ہو یا تہ اوہ بحث و
تکرار نیاں منزلاں تھیں گزری تہ ہاتھ پائی اُپر بھی گئے۔ اس وقت بیگم دولت چینی
”ماہڑیو لاڈلیو! آپس بچ نہ لڑو۔ اپنے اختلافات کی اس قدر مت بدھاؤ کہ امریکہ کی
دخل اندازی کرنے نا جواز تھ آئی جائے۔“

پتہ نیہہ اس گل بچ کیہڑی طاقت سی۔ اوہ اک دم لڑنا چنگڑنا پہلی تہ ہنسی خوشی
اک دُوے نال تھ ملانے ہوئیاں نعرہ لان لگ پئے ”اُس اک ہاں۔ رنگ روپ
پہناویں بکھرے ہین فروی اُس اک ہاں!“



(مک چک)